

"QUE A VOSSA FÉ, SEJA A VOSSA CULTURA / ATU IMI NIA FIAR SAI IMI NIA KULTURA"



REVISTA VIZITA PAPA FRANCISCO

Revista ne'e hakerek hosi Mídia SAPNewsTL ho objetivu hodi asegura, prezerva, memoriza no haklaken istória vizita Papa Francisco ne'ebe úniku, diferente, ineskesível maka Timor-Leste marka iha istória igreja katólíka mundial.

Revista murak ne'e deskreve mensajem importante sira husi Santu Padre Papa Francisco, Prezidente Repúblika José Ramos Horta, Primeiru Ministru Kayrala Xanana Gusmão, Presidente CET Dom Norberto do Amaral, Bispu Virgílio Cardeal do Carmo da Silva SDB, padre, madre, katekista, sarani sira no entidade oioin kona ba vizita Sua Santidade iha Timor-Leste, Singapura, Indonésia no Papua Nova Guinea.

Produsaun revista ne'e hetan apoiu finanseiru hosi operador telekomunikasaun Telkomcel iha Timor-Leste.

EKIPA

Peskiza & Elaborasaun : Clementino Bragança Machado, Sergio Alves da Costa, Ermelinda Soares, Marcela Mery da Costa, Conzita da Silva Mota Santos, Luis dos Santos Pailofo, Dircia Baptista Belo, Marciana da Conceição, Daniel da Silva, no Guilhermino Ramos da Cruz.

Editor : Eng. Sergio Alves da Costa & Pe. Mouzinho Pereira Lopes

Média SAP News Timor-Leste

Avenida Presidente Nicolau Lobato Fatuhada, Dili, Timor-Leste.

E-Mail : sapnewstimorleste@gmail.com

Tel + 670 75174566 & +670 &5700031

Website : www.sapnewstl.com

Copyright SAP News TL ©2025

INDISE

KAPÍTULU I.....	1
1. LIA MAKLOKEK	
1.1 Prefásiu.....	1
1.2 Introdusaun.....	2
1.3 Dom Virgílio Cardeal do Carmo da Silva Tatoli Ba Papa Francisco	3
1.4 Konselleiru SAPNewsTL, Pe. Mouzinho Pereira Lopes	4
1.5 Biografia Santu Padre Papa Francisco	7
KAPÍTULU II	9
2. Papa Francisco Vizita Indonésia, Papua Nova Guinea & Singapura	
2.1 Mensajen Santu Padre Ba Povu Indonéziu	9
2.2 Mensajen Papa Francisco Ba Kristaun PNG	11
2.3 Mensajen Sua Pontífise Ba Sidadaun Singapura	13
KAPÍTULU III.....	17
3. Durante Estadia Papa Francisco Iha Timor-Leste	
3.1 Bainhira Papa Francisco To’o Aeroportu Nicolau Lobato Comoro.....	17
3.2 Xefe Estadu Vatikanu Francisco Enkontru Ho Lideres Timoroan	18
3.3 Prezidente Repúblika José Ramos Horta, Agradeses Papa Francisco	23
3.4 Sua Santidade Vizita Koléjiu Orfanatu Irmã Alma.....	25
3.5 Xefe Supremu Igreja Katólíka Enkontru Ho Bispu, Padre, Madre, & Leigu Sira	27
3.6 Sua Santidade Prezide Misa Istóriu Tasi-Tolu, Timor-Leste.....	35
3.7 Papa Francisco Ko’alia Kona-ba Lafaek, Kuidadu	39
3.8 Líder Mundial Igreja Katólíka Ko’alia Ho Juventude Timorense.....	40
3.9 Wainhira Papa Francisco Husik Hela Timor-Leste.....	42
KAPÍTULU IV	44
4. Espresaun Gratidaun Hosi Povu Timor-Leste	
4.1 Lian Dom Virgílio Cardeal do Carmo da Silva, SDB	44
4.2 Expresaun Reprezentante Santa Sé Monseñor Marco Sprizzi.....	45
4.3 Primeiru Ministru Timor-Leste, Kayrala Xanana Gusmão Nia Lian	50
4.4 Sentimentu & Esperansa Hosi Povu Timor-Leste.....	55
KAPÍTULU V	73
5. Lia Agradesimentu & Maktakan	
5.1 Agradesimentu IX Governu Konstituisional Ba Órgaun Komuníkasaun Sosial.....	73
5.2 Primeiru Ministru Kayrala Xanana Gusmão Sertifika Mídia SAPNewsTL	74
5.3 Agradesimentu	75
5.4 Lia Maktakan	76
5.5 Bibliografia	77

1.1 Prefásiu

Rahun Kmanek :

Mídia Sa’ani Assamana Prazer News Timor-Leste (SAPNewsTL), nu’udar meu komunikasaun sosiál ida ne’ebe hari’i husi estudante Universitáriu sira, Formandu Jornalizmu Profisional sira no Estudante Sekundaria sira, iha ne’ebe hamriik nu’udar mídia online ho prinsípiu Informativu, Inspirativu, Konstrutivu, Produtivu, krítiku no Edukativu hodi hari’i Sosiedade Timor-Leste ida Justu, Prósperu, Solidáriu no Fraternu.

SAPNewsTL órgaun komunikasaun sosiál ida ne’ebé livre no independente hosi poder polítiku no poder ekonómiku, iha ne’ebe sei desenvolve nia atividade editoriaál ho liberdade no karakter jornalizmu ida ne’ebé iha qualidade. Hala’o nia atividade jornalista nian hodi garante no promove prinsípiu Governasaun di’ak, Kontrolu Sosiál, Inspirativu, Divertimentu no kaer metin kultura damen, domin, unidade, justisa, liberdade, demokrásia no responsabilidade.

Mídia ne’e hari’i iha loron 26 fulan febreiru 2022, nu’udar loron dahuluk hodi kolleta no publika notísia, hafoin lansa ofisial iha loron 24 febreiru 2023 husi Sua Exelénsia Sekretáriu Estadu Komunikasaun Sosial Sr. Merício Juvinal dos Reis “Akara” no hetan akompaña husi Membru Konselleru Konsellu Imprensa nian Sr. Expedito Dias Ximenes, hamutuk ho Konselleru SAPNews nian Pe. Mouzinho Pereira Lopes, Eng. Armindo de Jesus, Sr. Pascoal Pinto Soares Lemos no Konvidadus sira hotu hodi publika ofisial husi Konsellu Imprensa iha loron 5 Abril 2023.

Repúblika Demokrátiku Timor-Leste nu’udar estadu ida ne’ebé restaura ninia independénsia iha loron 20 Maiu 2002, iha ne’ebé estadu ida ne’e ninia povu maioria fiar iha Igreja Katólíka hamutuk 99,6 % nu’udar okupa fatin daruak iha mundu, hafoin Estadu Vatikanu.



Iha 1989, Santu Padre João Paulo II vizita Timor-Leste ho lema ‘Neon Ida De’it, Laran Ida De’it’ ho liafuan save ‘Imi Masin Rai Nian No Naroman Mundu Nian (Mt. 5, 13-14)’, liu tiha dékada tolu, Sua Pontifise Francisco halo vizita pastoral ho tema ‘Atu Imi Nia Fiar Sai Imi Nia Kultura’.

Ita hotu presiza aproveita momentu istóriu ne’e hodi hatur valor fraternidade, unidade, onestidade, responsabilidade, laran di’ak, laran kmaus, hanoin pozitivu no haraik an sai kultura moris sosiedade Timoroan nian.

Durante vijita Papa Francisco nian, Mídia ida ne’e hola papel importante iha kobertura hodi kolleta no divulga mensajen importante sira husi Sua Santidade atravez website, live streaming iha pájina facebook, tiktok no youtube.

Mídia SAPNews hola inisiativa halo elaborasaun ba revista ida ne’e sai hanesan memória ida ne’ebé atu tau iha Biblioteka sira hodi fo ba jerasaun tuir mai bele lee no hatene. Nune’e molok hakotu atu hateten katak “Momentu espesial sira ne’ebe akontese sei la repete tan, nune’e mós istória ne’ebé iha sei la lakon wainhira ita hakerek”.

Respeitozamente

Clementino Bragança Machado
Prezidente Mídia SAPNews

1.2 Introdusaun



Timor-Leste nu'udar estadu direitu demokrátiku ne'ebé ukun an, hari'i husi vontade popular no respeito ba dignidade ema moris ida-idak nian, estadu ne'ebé povu 99,6% relijiaun katólíka, sempre fo respeito ba diversidade no universalidade. Iha tinan 1989, Santu Padre João Paulo II vizita Timor-Leste ho lema 'Imi Masin Rai Nian No Naroman Mundu Nian', liu tiha tinan tolu nulu resin-lima, Papa Francisco halo vizita pastoral ho eslogaun 'Atu Imi Nia Fiar Sai Imi Nia Kultura' nu'udar tema sentral iha momentu istóriu ne'e, liafuan save maka fiar no kultura, fiar hanesan buat abstratu ne'ebé labele haree ho matan no kaer ho liman, maibe fiar ne'e bele expresa hosi hanoin, orasaun, hahalok no toman ema nian. Kultura mak ábitu ne'ebé sosiedade hatudu hosi atetude no prátika iha família, igreja no nasaun.

Tuir Biblia, Saun Tiagu haktuir, 'fiar moris ho nia hahalok, fiar sai lolos ho hahalok mos, Abrão fiar ida ne'e nu'udar Maromak nia justisa'(Tiago 3:22-23). Fiar ne'ebe la ho hahalok, fiar ne'e mate, enkuantu hahalok ne'ebe la ho fiar, hahalok ne'e la folin. Fiar ne'e konkretiza liu hosi hatudu dalan, servi no domin, karidade no moris ho unidade iha diversidade, la haree kor, ras, relijiaun, etnia no grupu. Mensagem, 'atu imi nia fiar, sai

imi nia kultura'(que a vossa fé, seja a vossa cultura), katak ita nia fiar sai identidade, sai adultu iha fiar no hahalok, hanesan Dom Bosco dehan 'sai sarani di'ak no sidadaun honestu' la'os de'it iha igreja wainhira tuir missa, maibe sai kultura ba missa, toman iha orasaun, respeita malu, haraik an, perdaun, servi malu iha familia, grupu, institusaun, nasaun no mundu inteiru.

Santu Padre nia visita ho vizaun hametin fiar katóliku, promove unidade nasional, inspira ema hotu halo nia fiar sai kultura damen, amizade, fraternidade, solidariedade, karidade, toleránsia, halakon violénsia, diskriminasaun, exploraun, explotaun, korupsaun, koluzaun, nepotismu no injustisa sosial iha mundu.

Mídia SAPNewsTL hanoin hamutuk no deside hakerek revista vizita Santu Padre Papa Francisco hodi prezerva no aseguar nafatin memória furak no kmanek ne'e hodi hatutan hosi jerasaun ba jerasaun iha istória Timor-Leste nian, aliende ne'e bele promove kultura literasia iha sosiedade liu hosi halo leitura, análise, peskiza no hakerek nu'udar papel krusiál ba juventude iha sékulu XXI.

Revista vizita Papa Francisco ne'ebé ho tema "Imi Nia Fiar Sai Imi Nia Kultura", ne'e bele fanun no motiva ema hotu hodi moris iha fiar no hahalok ne'ebé loos, sai kultura familiar, servi, laran metin iha Maromak, tulun malu no moris hamutuk iha toleránsia, unidade iha diversidade nia laran tuir prinsípiu dokumentu fraternidade umana nian hahú husi família, instituisaun to'o nasaun.

Respeitozamente

Sergio Alves da Costa
Diretor SAPNews

1.3 Lia-menon Dom Virgílio Cardeal do Carmo da Silva SDB



Sua Santidade Papa Francisco, lori sarani sira hotu nia naran ne'ebé reza iha eukaristia solene ida-ne'e, partikularmente hodi povu timoroan nia naran, hakarak hato'o ami-nia sentidu agradesimentu kle'an ba ita-boot nia prezensa iha ami-nia leet.

Ohin, fatin Tasi-Tolu (Timor-Leste) dala ida tan sai epísentru no eventu istóriu ba povu timoroan, hafoin vizita Amu-Papa João Paulo II nian iha tinan 1989 hodi marka pasu desizivu ida ba prosesu autodeterminasaun, ohin ho prezensa Santu Padre Papa Francisco marka pasu desizivu ida iha prosesu konstrusaun nasaun nia identidade no kultura.

Ita ninia prezensa iha rai glorifikadu ida ne'e hatudu sinál katak Maromak besik ba ema simples, kiak, haraik-an, no marjinalizadu sira. Ita-boot ninia proximidade, domin no atensaun ba rai ida-ne'ebe kuaze lakon ba horizonte mundiál, Santu Padre hatudu duni modelu lider ho fuan Aman Maromak nian.

Tasil-Tolu, 10/09/2024

Dom Virgílio Cardeal d. C. da Silva SDB

Timor ne'ebé nasaun ki'ik no illa ne'ebé dook tebtebes maibé ema sira ne'e simples no moris ho orijinalidade husi sira nia fiar iha Jesus Kristu.

Illa Timor ne'ebé uluk rekuñese ho illa Sándalu, ai-kameli nia morin atrai esploradór no navegadór sira, maske nune'e iha momentu istóriu determinadu ne'e sándalu nia morin kruza ho morin Evanjellu nian.

Ho misionáriu sira-nia esforsu konstante, perfume evanjéliku habelar iha territóriu tomak no Igreja Katólíka iha Timór moris nafatin to'o ohin loron, igreja katólíka Timor moris ho nia misaun buka atu sai lian no esperansa ba ema ki'ak sira no sira ne'ebé vizita liu hosi servisu, kooperasaun mútua entre estadu no igreja Timor iha prosesu hari'i estadu no afirma identidade, ita presiza rona didiak ema ki'ak no marjinalizadu sira nia hakilar.

Papa Francisco loron tolu ne'e nia vizita ba rai Santa Krús no Santa Maria hela iha memória, hela iha ema ida-idak no sai sinál ksolok nian atu garante ba nia ita-nia orasaun ba saúde, forsa no matenek iha ezersísu nia ministériu nu'udar susesor ba Saun Pedro, Pastor Universál Igreja nian.

“Ita ninia prezensa iha rai glorifikadu ida ne'e hatudu sinál katak Maromak besik ba ema simples, ki'ak, haraik-an, no marjinalizadu sira”.

1.4 Konselleiru SAPNewsTL, Padre Mouzinho Pereira Lopes

“Que A Vossa Fé, Seja A Vossa Cultura”.

Belun sira

Ksolok boot to'o mai ho visita Santu Padre ba dala-2 iha ita rain. Katóliku no Timoroan, ita hotu tuir ida-idak nia situasaun koko fó folin vizita Kristu nia saseluk ho ekselente ne'e. Nune'e ha'u hatun mata dalan balun tuir doutrina katólíka, ne'ebé la sempre aseitavel maibé sempre sai matadalan hodi halo biban visita ne'e iha duni folin, fó matak no malirin.



Ha'u hahú ho lema:, **"Que a vossa fé seja a vossa cultura, (Atu imi nia fé sai imi nia lisan)"**. Tema iha leten ne'e nakhili ona nu'udar lema (logotipu) visita apostólíka Amu Papa Francisco iha Timor. Mensajen ne'e forte no kro'at basuk hodi kona kedas timor-oan nia ain kloor, tanba sa ? Tanba fé mak sai prinsipíu ita nia lisan (kultura).

Ema balun hanoin katak lisan mak sai fali prinsipíu hodi fé ba Maromak no ninia doutrina mak tenki tuir fali lisan. Ita presiza loke didi'ak matan hodi haré no halo leitura, loke tilun hodi rona, katak iha lema la dehan: **“Que a vossa cultura seja a vossa Fé”**, maibé sim: **“Que a vossa Fé seja a vossa cultura”**.

Konsekuénsia tuir kedas mak povu sarani hakarak ka lakohi, hahú ona hakle'an fé (fiar katólíka), ho maneira hotu. Ema labele apátiku

atu apreende fé iha Maromak, apreende sa mak Maromak haruka halo, tanba fé ne'e kmanek (graça, dom) Maromak haraik mai ita ema. Em vez de kultura fali, ita ema rasik mak kria hodi hatudu ita nia identidade espesial, ita nia kondisaun no toman katak la'os Maromak mak halo. Maske la'os Maromak mak kria maibé tanba ninia omnipoténsia, nia bele de'it motiva hodi hamosu ema nia matenek atu halo lisan ida sai kmanek ba ema hotu nia di'ak, iha ne'e mak ita distingue lisan-di'ak no lisan-aat.

Atensaun liafuan temi ka hakerek mak “Fé”. Ita nia lian tetun “Fiar”. Tradusaun ne'e laduun kona tanba fé ne'e eksklusiva, relasaun vise-versa ema ho ninia Maromak, enkuantu liafuan “Fiar” temi ba buat barak, fiar Osan, fiar apá, fiar doben, fiar rai-na'in, fiar governu, fiar sorte, fiar ema siik-na'in, fiar Maromak, nune'e ba oin.

Ha'u hanoin, fiar ida nune'e mak halo ema balun hanoin katak fiar Maromak ne'e hanesan de'it ho fiar ema fekit ka uma lisan, ka fahi ida ka fiar ha'u nia apá. Fiar ba Maromak hetan redusaun ba buat kualker liu-liu ba mós lisan (kultura). Nune'e ikus mai fiar Maromak sai la kle'an, no bele husik tiha fiar ne'e, hanesan husik kolega ka husik partidu ka uma-lisan. Redusaun ne'e hamosu ona buat ida naran “Relativismu”, katak atu fiar ka la fiar depende ha'u nia mood ka ha'u nia kakutak de'it, la depende ba Mistériu boot moris nian ne'ebé ninia hun iha Maromak. Fiar ida nune'e iha português hanaran “Crer” ou “Crença”, lian Indonezia dehan Percaya (kepercayaan).

Em vez de fé, hatudu fiar Exclusiva, absolutu ba de'it Maromak, hodi kautela ba perigu Relativismu. Tan ne'e mak ema la dehan, por exemplu: “Ha'u iha fé ba ha'u nia uma-lisan, iha fé ba partidu, rikosoin, doben, nst, maibé sim: Fé ba Na'i Maromak. Liafuan fé iha lian Indonezia

katak iman, absoluta no sempre ba de'it Maromak.

Di'ak tebes se katóliku oan ka ema kualker hatene distingue ona liafuan rua ne'e ba ninia atitude tomak iha Maromak futar-oin, iha ema hotu no kriatura tomak nia leet, tanba qualidade Fé hahú hosi kompreensaun nune'e.

Vizita Amu Papa

La iha buat ida kmanek liu se la'os hahalok fó de'it. Ne'e doutrina fiar katólíka kona ba domin, no karidade. Papa iha ninia otas no moras, hakarak fo ninia tempu no ninia-an mai haré Timor-oan sira. Ita Timor-oan fo ita nia tempu, no soin simu nia.

Biban di'ak tebes ita fó tributu ba ita nia belun peregrinu sira, nu'udar sagrada eskritura haruka, wee ka ai-han simples, uma ka mahon, assistência médika, transporte nesessária, orasaun no perdaun, Hasé no hamnasa ba malu, no seluk tan ne'ebé ita bele halo nu'udar peniténsia no liu-liu induljénsia pesoál.

Kompriende Kona-Ba Fé & Lisan

Hafoin vizita Santu Padre, ha'u hato'o doutrina kreda kona-ba oinsa ita kompreende fé no lisan (kultura). Oras ne'e, ita hakle'an fé katólíka relasiona ho toman balu iha ita lisan, interkonektada ho mensajen “Que a vossa fé seja o vossa cultura”. Ha'u hahú ho liafuan sira ne'e: “siik ho destinu/sorte (inklui ta-bula, haré animal aten), hamulak ba mate klamar ka rai na'in ka beiala sira nia uma lisan (espiritismo), uza biru ka ai-kulit hodi hetan sorte inklui májiku ka feitikaria. Bele ka lae ? Tuir duni doutrina katólíka ka lae ? Ne'e hotu kahur tan ho china nia “*Feng shui, astrologia horoscop ka zodiac liga ho ema ida nia futuro ka sorte*”, tama iha ita nia vida lor-loron no dala wa'in halo konfuzaun.



Oinsa katóliku ida foti medida iha ninia hahalok relasiona ho buat hirak ne'ebé dala-wa'in haktuir iha lisan Timor ? Mai rona Maromak futar-lia iha Sagrada Eskritura ne'ebé igreja hatun iha katesiamu nu'udar doutrina.

Livru Deuterónimio 18,10-12: *Não permitam que se ache alguém no meio de vocês que queime em sacrifício o seu filho ou a sua filha; que pratique adivinhação, ou se dedique à magia, ou faça presságios, ou pratique feitiçaria. faça encantamentos; que seja médium, consulte os espíritos ou consulte os mortos. O Senhor tem repugnância por quem pratica essas coisas, e é por causa dessas abominações que o Senhor, o seu Deus, vai expulsar aquelas nações da presença de vocês.*

Maromak konfirma ne'e mos liu hosi profeta Jeremias niaibun (29, 8)” Basá, Na'i kbi'it tomak na'in Maromak Israel nian, dehan nune'e : keta husik profeta no matan dook sira lohi imi. Lalika fo atensaun ba mehi, ita-boot motiva sira atu halo, Jesus rasik hato'o sintese iha liafuan todan nune'e: “*Hadomi Na'i, o nia Maromak, ho o nia fuan tomak ho o nia klamar tomak, no ho o nia matenek tomak.*” (Mat 22:37).

Iha textu bibliku hotu, la iha leet ida ne'ebé fo biban ema fiar-na'in iha Kristu atu prátika fali májiko, matan-dook hodi siik ema ka destinu ruma, lia-na'in ko'alia ho espíritu ruma sa tan espíritu aat tuir feitiçaria, usa ai-kulit ka biru atu hetan sorte, inklui prátika sira hanesan Feng

shui, zodiac, siik liman, Sdsb, no jogo oi-oin koko sorte ka destinu moris nian. Hirak ne'e hotu sei akaba ho insatisfasaun, husu beibeik vitima, la fiar iha an rasik, no aat liu mak lakon fiar iha Maromak kbiit-tomak na'in (omnipotente) no ninia Providênsia.

Nune'e Igreja KatóliKa hanorin iha katesismu: Nú, 2111: labele prátika superstisau,: la fo importânsia ba Maromak maibé ba fali magia ka buat lulik seluk ruma. Nú.2115: Maromak bele revela futuru liu hosi ninia profeta ka santu ruma. Maibé sempre Maromak nia Providênsia (graça sira) mak boot liu no importante liu.

Ema labele monu ba imprevidensia. Nú. 2116: Tenki rejenta forma hotu-hotu siik nian (adivinhausaun): rekursu ba satanás ka espírito aat, bolu ba matebean ruma ka prátika sira ne'ebé halo ema hanoin katak ho buat nune'e, sira bele 'loke segredu' futuru nian (cf Deut 18,10; Jer 29,8); konsulta horoskop, astrologia, haré no siik liman, interpreta sinal ruma ka orakel (konsulta ho espírito ka mate klamar), paranormál no husu mediasaun.

Hirak ne'e hotu haksumik hakarak atu ita ukun fali tempu, história no ikus mai ukun ema; nune'e mós hanoin atu dada kbiit mágiku ka espírito nakukun nian. Ne'e hotu kontráriu ho onra no hamta'uk domin nian be ita fó de'it ba Maromak.

Nú. 2117. Prátika hotu magia nian no feitizmu ne'ebé ema halo hodi uza kbiit sira ne'e atu serví fali nia-an ka nia aproveita hodi hetan kbiit sobrenatural atu domina fali ema seluk - biar atu fó saúde di'ak ba ema karik mós - kontra tebes

virtude Religiaun kona-ba adora Maromak mesak ida de'it. Hahalok hirak ne'e sei condenadu liután wainhira ema ida halo atu fó terus no desastre ba ema seluk, no mos wainhira husu tan fali kbiit espírito aat nian.

Nune'e mos ema uza ai kulit ka biru, labele hetan fatin iha moris sarani. espiritismu dala-wa'in hatalin ho hahalok siik sasán ou hahalok mágiku; tanba ne'e Inan Santa Kreda fo hanoin ho sériu atu ninia oan sira kuidadu ho buat nune'e. Rekurco ba aimoruk tradisional labele lejítima fali hahalok bolu kbiit aat nian no explora ema nia fiar.

Respeita ba toman hamulak tradisional, kuta ho malusbeen no seluk tan labele sai toman mágiku nian. Ema presiza lori buat hotu ba de'it Maromak (presta culto só para o Senhor, nosso Deus). Kbiit seluk la iha ninia folin.

Lia Taka

Ha'u fiar katak ema balun lakohi simu doutrina nune'e, tamba hanoin katak sira nia toman ne'e hahú lakon no la benefisia ona ba sira. Maibé katolisidade la depende ba ema ida simu ka lae, gosta ka la gosta; maibé sim katak ema haka'as-an ho badinas hodi konfia (dependênsia) ba Kristu nia graça, Kristu nia hakarak ne'ebé ita hanaran Providênsia divina. Buat hotu ne'ebé la tuir Kristu, labele hetan fatin iha lisan katólíka.

Espera revista ne'e bele sai mata dalan ida ba sarani katólíka hotu iha Timor-Leste hodi halo leitura, kaer metin mensajem forte sira no banati tuir duni sagrada eskritura haruka ho lema “Que a vossa fê seja a vossa cultura”.

Konseleiru SAPNewsTL

Pe. Mouzinho Perreira Lopes

“Respeita ba toman hamulak tradisional, kuta ho malusbeen no seluk tan labele sai toman mágiku nian. Ema presiza lori buat hotu ba de'it Maromak”.

1.5 Biografia Santu Padre Papa Francisco



Santu Padre Papa Francisco ho naran los, Jorge Mario Bergoglio moris iha nasaun Argentina, Buenos Aires, 17 Dezembru 1936 hosi Aman Mario Jose Bergoglio husi Italia (1908-1959) no Inan Regina Maria Sivori husi Italia (1911-1981).

Jorge Mario Bergoglio hala'o nia estudu iha Colegio Maximo De San Jose (Argentina), Estudu Filozofia no Teologia San Minguel (Argentina), Institutu Teologia no Filozofia Milltown (Irlandia), no hala'o estudu ba mestradu Filozofia no Teologia Sankt Georgen (Alemanha).

Jorge Mario Bergoglio hatan ba Maromak nia bolu (Ordenasaun Saserdotal) iha loron 17 Dezembru 1969, simu Ordenasaun Episkopál (fiar metin iha na'i ka bispu) iha 27 Junhu 1992, Liu tiha tinan neen, Nia sai bibi atan kreda nian (Arsebispu) iha tinan 1998, tuir mai simu kna'ar Cardeal iha loron, 21 Feveireiru 2001 husi Papa João Paulo II iha Argentina.

Hala'o misaun Cardeal durante tinan 12, Jorge Mario Bergoglio hetan konfiansa sai

Susesor São Pedro (Papa) ba dala atus rua neennulu resin-neen (266) iha loron, 13 Marsu 2013. Agora servisu nu'udar Amu-Papa, soberanu hosi Sidade Vatikanu, Nia nu'udar Bispu dahuluk husi Roma sai membru ida husi Sosiedade Jezús nian (Jezuista sira), Papa dahuluk husi Amérika, Hemisfériu Súl, no dahuluk ne'ebé moris ka bo'ot iha li'ur Europa nian dezde Papa Gregório III iha sékulu VIII.

Iha nia moris, Papa Fransisco hatudu ba públiku ninia simplesidade, haraik-an, fiar an, énfaze ba Maromak nia mizerikórdia, vizibilidade internasionál nu'udar papa, preokupa tebes ema kiak sira, no kompromisu ba diálogu interrelijiozu.

Nia hetan kréditu ho aprosimasaun ida ne'ebé ladún formál ba papadu duké nia antesesór sira, wainhira hili atu hela iha uma bainaka nian Domus Sanctae Marthae duké iha apartamentu papal sira iha Palásiu Apostóliku nian ne'ebé uza hosi papa sira uluk. Nia mantein katak Igreja tenke nakloke liután no akollidu. Nia la apoia kapitalizmu ne'ebé la iha frenu, Marxizmu ka versaun marxista sira hosi teolojia libertasaun nian.

Francisco mantein Igreja nia hanoin tradisionál sira kona-ba abortu, kazamentu, ordenasaun feto nian, no selibatu kleru nian. Nia kontra konsumerizmu no apoia asaun kona-ba mudansa klimátika, foku hosi nia papadu ho promulgasaun hosi Laudato si (ekolojia).



Iha diplomasia internasionál, Papa Francisco ajuda restaura temporariamente relasaun diplomátika kompletu entre Estados Unidos no Kuba, apoia kauza refujiadu sira nian durante krize migrasaun sira iha Europa no Amérika Sentrá. Desde 2018, nia sai hanesan oponente vokál ida ba neo-nasionalizmu. Ninia papadu tau énfaze ida iha combate abuzu seksuál hosi membru sira kleru nian hodi halo relatóriu sai obrigatóriu no responsabiliza sira ne'ebé la konsege halo.

To'o ohin loron, Lider Supremu Igreja Katólíka Mundiál hala'o ona viajem apostólíka ba dala 46º, hafoin vizita país sira iha Asean hanesan Indonésia, PNG, Timor-Leste no Singapura, antes Luxemburgo no Bélíca iha fulan Setembru tinan 2024.

Papa Francisco ne'ebé halo ona tinan ualunulu resin-hitu (78), kondisaun saúde ne'ebé labele la'o no hamrik kleur, uza de'it kadeira roda maibe la lakon isprítu vontade no responsabilidade hodi servi, vizita, advokasia, haklaken lialos no fó sasin kona-ba Maromak, aliende ne'e Sua Pontífise ne'e mós defende paz, estabilidade, fraternidade, diálogu, toleránsia no respeito mutual iha nivel nasional, rejional no internasionál.

Papa Francisco hateten "Na'i, ho kbíit ne'ebé lakan husi nínia líafuan, konvida ita atu loke dalan moris nian, atu hadook an husi tasi-ibun sira ne'ebé paradu husi toman aat sira, husi ta'uk no laran-manas, ita braní atu moris foun ida.

Santa Teresa de Calcutá, ne'ebé ohin loron ita selebra nia memória, tau matan la kolen ba ema kiak sira, promove dame no diálogu, dala ida nia dehan : "Baínhira ita la iha buat ida atu fó, mai ita fó buat ida ne'e bá no hanoín, maski imi la ko'a buat ida, nunka kole atu kuda".

KAPÍTULU II

2 Papa Francisco Vizita Indonésia, Papua Nova Guinea (PNG) & Singapura

2.1 Rona, Hanoin & Halo ! Tau Matan Ba Ema Ki'ak, Promove Diálogo & Damen



Imagem : Presidente República Indonésia Joko Widodo & Papa Francisco Iha Indonsésia, 05/05/2024. Foto : Média RI

SAPNewsTL : Durante vizita Sua Santidade Papa Francisco iha Indonezia, loron 05 Setembru 2024, Sua Santidade husu ba sarani katólika sira hodi rona no moris tuir Na'i Maromak nia evanjellu.

“Primeiru rona liafuan tanba buat hotu mai husi rona, loke ita-nia an ba Na'i, simu prezente folin-boot amizade nian ho Na'i Maromak. Importante liu mak moris tuir liafuan ne'ebé ita simu, la'ós de'it sai rona-na'in mamuk no bosok ita-nia an rasik (Tiago 1:22); atu labele foti risku hodi rona de'it ho ita-nia tilun no la husik Nai nia liafuan tama iha ita-nia fuan, muda ita nia hanoin no asaun sira ne'ebé ita halo”.

“Na'i nia liafuan ne'ebé fó no ida ne'ebé ita rona presiza sai moris atu bele muda moris, sai inkarnasun iha ita-nia moris. Atitude bázika rua "rona liafuan no hamoris liafuan",reflete iha evanjellu ne'ebé foin

haklaken primeiru rona liafuan. Evanjelista haktuir mai ita katak ema barak hale'u Jesus no “hakarak rona Maromak nia liafuan” (Lucas 5:1). Sira buka Nia, sira hamlaha no hamrook ba Maromak nia liafuan no sira rona ida-ne'e repete iha Jesus nia liafuan sira”.

Papa Fransisco fó hanoin hikas "agora senáriu ne'e repete dala barak iha evanjellu ne'ebé hateten mai ita katak ema nia fuan buka nafatin lia-loos ne'ebé bele hakonu no satisfás ninia hakarak ba ksolok, labele satisfás ita de'it ho ema nia liafuan, kritériu mundu nian no julgamentu mundu nian”.

“Ita presiza nafatin naroman ida husi leten atu fó naroman ba ita-nia hakat sira, bee moris nian ne'ebé hamate hamrook dezertu klamar nian, konsolasaun ida ne'ebé la dezanima tanba mai husi lalehan no la'ós husi tranzitóriu mundu nian. Iha tranziénsia nia leet liafuan ema nian, iha nesesidade ba Maromak nia liafuan, bússola úniku ba ita-nia viajen ne'ebé iha kanek no lakon barak nia leet, iha kapasidade atu orienta ita ba sentidu loloos moris nian”.

“Maun-alin sira, ita keta haluha ida-ne'e, dixípulu ida nia knaar dahuluk la'ós atu hatais vestidu espirituál perfeitu iha li'ur, ka halo buat extraordináriu sira ka hala'o emprendimentu boot sira. Pelu kontráriu, pasu dahuluk konsiste ita hatene koloka an hodi rona liafuan úniku ne'ebé salva, katak Jezús nia liafuan. Hanesan ita haree iha epizódiu Evanjellu nian, bainhira Mestre

sa'e Pedro nia ró atu dook uitoan hosi tasi-ibun, nune'e bele haklaken di'ak liután ba ema-lubun (kf. Lukas 5:3)"

"Ita-nia moris fiar nian hahú bainhira ita ho haraik-an simu Jesús iha ita-nia moris, fó fatin ba Nia, tau ita-nia an iha rona ba Maromak nia liafuan no husi ne'ebá ita reflète, nakdoko, no muda. Iha tempu hanesan, Maromak nia liafuan ezije atu inkarna loloos iha ita tanba ne'e ita simu bolun atu moris tuir nia liafuan".



Credit: VAMP
Imagem : Papa Francisco rein Lider Boot Meskita Istiqlal, Nasaruddin Umar nia liman iha Jakarta,05/09/2024. Foto :VAMP

Santo padre konta "Defaktu, hafoin Jesus haklaken hotu tiha ba ema-lubun husi ró laran, nia fila ba Pedro no dezafia nia atu foti risku hodi apostá iha liafuan ida-ne'e: "Tau ba bee kle'an no soe imi-nia rede atu kaer ikan" (v. 4). Maromak nia liafuan la hela de'it hanesan ideia abstratu furak ida ka emosaun momentu ida de'it. Maromak nia liafuan ezije mudansa iha ita-nia perspetiva, hodi permite ita atu muda ita-nia fuan ba Kristu nia fuan, Nia bolu ita atu brani soe rede Evanjellu nian ba tasi mundu nian, "halai iha risku atu moris domin ne'ebé nia hanorin ona mai ita ne'ebé nia fo moris".

"Na'i, ho kbiit ne'ebé lakan husi ninia liafuan, konvida ita atu loke dalan moris nian, atu hadook an husi tasi-ibun sira ne'ebé paradu husi toman aat sira, husi ta'uk no laran-manas, ita brani atu moris foun ida. Klaru, sei iha nafatin difikuldade no razaun sira atu hatete lae, Mai ita haree dala ida tan ba Pedro nia atitude: mai husi kalan susar ida bainhira nia la kaer buat ida, kole no laran-kraik, maibé, envezde hela hanesan paralizadu iha sentidu vaziu nian ka hetan difikuldade husi nia fallansu rasik, nia dehan: "Mestre, ami serbisu maka'as kalan tomak no la hetan ikan ida. Tuir Ita-Boot nia orden, ha'u mós sei soe rede sira-ne'e. Hafoin, akontese buat ruma ne'ebé hakfodak, katak milagre ró ne'ebé nakonu ho ikan to'o besik mout (kf. v. 7)".

"Maun-alin sira, bainhira hasoru knaar oioin moris loroloron nian hodi hasoru bolun ne'ebé ita hotu sente atu hari'i sosiedade ida ne'ebé justu liu hodi la'o ba oin iha dalan dame no diálogo nian, ne'ebé kleur ona iha Indonézia, ita dalaruma sente labele, sente todan husi kompromisu boot hanesan ne'e, ne'ebé la sempre produz rezultadu sira ne'ebé hein, ka ita-nia sala sira ne'ebé parese difikulta ita-nia viajen moris nian. Maibé, ho haraik-an no fiar hanesan Pedro, husu mós mai ita atu labele sai dadur ba ita-nia fallansu sira, no envezde hateke ba ita-nia rede mamuk sira, hateke ba Jesus no tau fiar iha Nia".

"Ita sempre bele foti risku atu sai ba tasi klean no soe fali rede sira, maski bainhira ita liu ona kalan ida fallansu nian, tempu deziluzau nian bainhira ita la kaer buat ida. Santa Teresa de Calcutá, ne'ebé ohin loron ita selebra nia memória, tau matan la kolen

ba ema kiak sira, promove dame no diálogu, dala ida dehan: “Bainhira ita la iha buat ida atu fó, mai ita fó buat ida ne’ebá no hanoin, maski imi la ko’a buat ida, nunka kole atu kuda”.

“Ha’u mós hakarak dehan ba imi, ba nasaun ida-ne’ebé iha arkipélagu furak no diversu, keta baruk atu sa’e ró no soe imi-nia rede sira, keta kolen atu mehi no hari’i fali sivilizasaun ida dame nian! Brani nafatin atu mehi kona-ba maun-alin sira”.

Santu Padre kontente tebes vizita Indonésia, país ne’ebé furak tebes, maibé presiza reforsa relasaun sosial sira iha nasaun refere.

“Indonézia hanesan nasaun ida ne’ebé sei dezenvelope hela, no buat ida ne’ebé karik presiza atu dezenvelope mak relasaun sosiál sira. Ha’u kontente tebes ho ha’u nia vizita ba nasaun ne’e. Furak tebes!”

2.2 Papa Francisco : Sai Forte & Keta Ta’uk, Labele Haketak An Hosi Maromak



Imajem : Santu Padre Papa Francisco iha Papua Nova Guiné, 07/09/2024. Foto : Vatican News

SAPNewsTL : Sua Santidade Papa Francisco husu sarani Papua Nova Guiné atu aten-brani, labele tauk no loke aan ba ksolok evanjellu, hanesan profeta Isaías tanba Nai Maromak sei mai salva ema hotu iha loron ikus.

"Liafuan dahuluk Maromak ko’alia ba ita ohin mak sai forte, keta ta’uk! (Isa 35:4). Ho dalan ida-ne’e, profeta Isaías dirije ba ema hotu ne’ebé dezesperadu, nia mós enkoraja ninia povu maske iha difikuldade no terus

nia leet, konvida sira atu hateke ba orizonte esperansa nian no futuru ida iha-ne’ebé Maromak sei mai salva ita. Tanba Na’i sei mai duni, no iha loron ne’ebá, "ema matan-delek sira nia matan sei nakloke, no tilun-diuk sira nia tilun sei nakloke" (Isaías 35:5)"

"Distánsia husi ema tilun-diuk sira, Ita haree ida-ne’e iha área jeográfika sira ne’ebé ita bolu, iha lian ohin-loron nian, "marjen sira", rejiaun Dekápolis lokaliza iha mota Jordaun nia sorin, dook hosi sentru relijiozu Jeruzalem nian. Liután, ema tilun-diuk ne’e mós experimenta distánsia sira seluk, nia dook husi Maromak no husi ema seluk tanba nia labele komunika, nia tilun-diuk nune’e nia labele rona, nia mós monok nune’e nia labele ko’alia, nia haketak-an hosi mundu, izoladu, dadur ida hosi nia kondisaun tilun-diuk no beik, atu nia labele to’o ba ema seluk ka komunika ho sira".

Papa Francisco husu sidadaun Papua Nova Guiné atu labele izola ann husi ema seluk no Maromak tan mundu nia egoizmu no odio

tanba aksaun sira ne'e bele hadook ema sarani sira husi Maromak no ema seluk.

"Loos duni, iha tipu ida tilun-diuk interiór no silénsiu fuan nian ne'ebé mosu kada vez ita taka ita-nia an husi ema seluk no mos Maromak tanba egoísmu, indiferensa, tauk atu foti risku ka ariska ita-nia an, ódiu. Buat sira ne'e hotu hadook ita hosi Maromak, maun alin sira, ita-nia an rasik, no hosi ksolok moris nian".

"Istória Jesus nian katak Jesus hakbesik aan ba povu no liu husi nia besik, Jesus kura ema nia silénsiu no tilun-diuk. Loos duni, bainhira de'it ita sente dook, ka ita hili atu hadook-an hosi Maromak, hosi ita-nia maun-alin sira ka hosi sira ne'ebé diferente hosi ita, ita taka an, taka an hosi li'ur. Ita remata hodi hanoin de'it kona-ba ita-nia ego rasik, tilun-diuk ba Maromak nia liafuan no ita-nia maluk sira nia hakilar, nune'e ita labele ko'alia ho Maromak ka ita-nia maluk sira".

"Maun-alin sira, imi hela iha rai dook ida-ne'e, karik imi imajina katak imi haketak hosi Maromak no husik malu. Ida-ne'e la loos, lae! imi hamutuk iha Espíritu Santu no Maromak, Maromak dehan ba imi ida-idak, "sai nakloke"! Importante liu mak loke ita-nia an ba Maromak no ita-nia maun-alin sira, loke ita-nia an ba Evanjellu hodi halo nia sai sentru ba ita-nia moris". Nia husu

"Ohin, Maromak mos dehan ba imi, "Aten barani, povu Papua Nova Guiné, keta tauk! Loke imi nia an! Loke imi nia an ba ksolok Evanjellu nian; loke imi nia an atu hasoru Maromak; loke imi nia an ba imi nia maun alin sira nia domin no alin fetu sira. Atu ita ida labele sai tilun-diuk no beik nafatin.

Aleinde ne'e, atu Beatu Giovanni Mazzuccini akompañá ita-boot sira iha viajen ida-ne'e, tanba iha difikuldade no ostilidade barak nia leet nia lori Kristu ba ita-boot nia leet, atu nune'e laiha ema ida maka tilun-diuk ba mensajen ksolok salvaun nian, atu ema hotu bele loke sira nia nanál hodi hananu Maromak nia knananuk sira".

Durante estadia iha Papua Nova Guiné, Santu Padre kaer liman ho Governadór-Jerál Papua Nova Guiné Sir Bob Bofeng Dadae hodi asina Livru Honra nian iha Uma Governador Port Moresby.

Papa Francisco hakerek karta katak Santu Padre sente kontente hasoru povu Papu Nova Guine, hein katak povu bele hetan naroman no forsa iha orasaun hodi la'o hamutuk hetan justisa no paz iha mundu inteiru.

"Kontente bele hasoru povu Papua Nova Guiné, ha'u espera sira hetan nafatin naroman no forsa iha orasaun hodi la'o hamutuk iha dalan justisa no dame nian." Hakerek Santu Padre ba Povu iha PNG, 07/09/2024.

Xefe Estadu Vatikanu ne'e sublinha Papua Nova Guiné país ne'ebé forte iha dezvoltamentu liliu dezvoltamentu ba arte ne'ebé desenvolve tebes.

"Ha'u gosta Papua Nova Guiné no haree nasaun ida ne'ebé maka forte iha dezvoltamentu. Hafain, ha'u hakarak bá Vanimu hodi hasoru grupu padre no madre sira husi Arjentina ne'ebé serbisu iha ne'ebá no ha'u haree organizaun ne'ebé di'ak tebes. Iha nasaun hotu-hotu, arte desenvolve

tebes: dansa sira, espresaun poética sira selu. Maibé iha Papua Nova Guiné no Vanimo

dezenvolvimentu arte nian impresionante. Ida-ne'e impresiona tebes ha'u".

2.3 Francisco : Matenek Halo Ema Loko An, Maibé Domin Konstrutivu



Imajem : Papa Francisco iha Singapura, 12/09/2024.
Foto : Vatican News

SAPNewsTL : Durante prezide Misa iha Estádio Nasionál Singapura, Sua Santidade Papa Fransisco louva Singapura nia progresu ne'ebé halo nia nasaun sai avansadu liu iha rejiaun Asiatiku ho realizasaun dezenvolvimentu tomak. Maski nune'e, Santu Padre mós fô hanoin katak buat ne'ebé importante liu mak domin konstrutivu.

"Oras ne'e, kona-ba na'an ne'ebé saran ona ba lulik sira, ita hotu hatene, Matenek halo ema loko an, maibé domin hari'i" (1 Cor 8:1). Saun Paulo dirije liafuan sira-ne'e ba maun-alin sira comunidade sarani nian iha Korintu. Iha ninia karta sira ba comunidade ida-ne'ebé riku ho karizma barak, 'ha'u fo agradese nafatin ba Maromak tan imi, tan Maromak nia grasa ne'ebé haraik tiha ba imi iha Jesus Kristu, imi sai riku iha buat hot ho liafuan no matenek'(kf. 1 Kor. 1, 4-5), dala barak Apóstolu rekomenda atu comunidade kuda komuñaun iha domin".

"Mai ita rona Paulo nia liafuan sira, hamutuk ita agradese ba Maromak ba Kreda ida iha Singapura ne'ebé mós riku ho don sira, Kreda ida ne'ebé dinámiku, buras no envolve iha diálogu konstrutivu ho Konfisaun no Relijiaun oioin seluk ne'ebé fahe ida-ne'e. rai furak ida ne'e".

"Tanba ne'e, ha'u hakarak reflète kona-ba Paul nia liafuan sira hodi foti hanesan pontu partida ba sidade ida-ne'e nia furak, arkitetura majestuoza no brani liuliu kompleksu Estádio Nasionál impresionante ne'ebé kontribui hodi halo Singapura sai famozu".

"Primeiru, mai ita hanoin katak, ikusmai, orijen sira hosi edifísiu magnífiku sira-ne'e, hanesan esforsu barak iha impaktu pozitivu ba ita-nia mundu, maski ema ida bele hanoin katak sira iha relasaun liuliu ho osan, enjeñaria, ka mezmua abilidade técnica, ne'ebé maka konserteza útil, útil tebes, buat ne'ebé ita hetan loloos maka domin, presizamente domin konstrutivu".

"Maski ema balu bele hanoin ida-ne'e hanesan deklarasaun ida ne'ebé ingénu hodi reflète, ita haree katak ida-ne'e la'ós kazu. Loos duni, maski hahalok di'ak sira bele hetan apoiu hosi ema sira ne'ebé matenek, iha kbiit, riku, no kriativu sempre iha feto no mane sira ne'ebé frajil hanesan ita ne'ebé lahó domin laiha moris, laiha impulsu, laiha razaun atu atua, laiha forsa atu hari'i".

"Maun-alin doben sira, se buat di'ak ruma eziste no sobrevive iha mundu ne'e, ne'e tanba de'it iha situasaun barak, domin manán ódiu, solidariedade liu indiferensa, laran-luak liu egoísmu. La ho ida-ne'e, laiha ema ida iha ne'ebe maka bele kria metrópole boot hanesan ne'e, tanba arkitetu sira sei la dezeń, traballadór sira sei la serbisu ba ida-ne'e, no sei la hetan buat ida".

"Entaun buat ne'ebé ita haree mak sinál ida, iha obra ida-idak nia kotuk iha ita-nia oin, iha istória domin barak atu hetan: kona-ba mane no feto sira ne'ebé unidu iha comunidade ida dedika ba sira-nia rain". Kona-ba inan sira no Inan. aman sira ne'ebé preokupa ho sira nia família, profisionál sira no traballadór sira ho tipu hotu-hotu ne'ebé envolve ho laran tomak iha sira nia knaar no knaar oioin. Tanba ne'e, di'ak ba ita atu aprende lee istória sira ne'ebé hakerek iha ita-nia uma oin no iha ita-nia dalan sira, atu pasa sira nia memória hodi fó hanoin mai ita katak laiha buat ida eternu ne'ebé moris ka buras lahó sira. Hadomi".

"Dalaruma ita-nia projetu sira-nia grandeza no grandeza bele halo ita haluha ida-ne'e, no lohi ita hodi hanoin katak ita bele sai kriadór úniku ba ita-nia moris, ita-nia rikusoin, ita-nia moris-di'ak, ita-nia ksolok. Maibé ikus mai, moris sempre lori ita fila fali ba realidade ida de'it: lahó domin ita la'ós buat ida".

"Fiar depois konfirma no esklarese, ita klean liután kona-ba fiar ida-ne'e, tanba fiar hateten mai ita katak abut husi ita-nia abilidade atu hadomi, ema hadomi ita mak Maromak rasik ne'ebé ho Aman nia fuan

hakarak no hakarak tebes atu halo ita eziste iha ita-nia moris. iha modu ida kompletamente desinteresadu ('Nia sei halo imi laran metin to'o rohan no sala laek iha Na'i Jesus Kristu nia loron, wainhira sasin ba Kristu sai metin iha imi', kf. 1 Cor. 8,6) ne ebe ho modu hanesan mós desinteresadu soi ita no liberta ita husi sala no mate, liuhusi mate no moris-hi as Ninia Oan-Mane mesak. Iha Jezús maka buat hotu ne'ebé ita iha no bele sai iha nia orijen no realizasaun".

"Nune'e, iha ita-nia domin, ita haree reflesaun ida kona-ba Maromak nia domin, hanesan Saun João Paulo II hateten bainhira nia vizita iha rai ida-ne'e (kf. Homilia iha Santa Misa iha Estádiu Nasionál, Singapura, 20 Novembru 1986). Hafoin nia aumenta pontu importante katak, "domin karakteriza ho respeito klean ba ema hotu, la haree ba rasa, kreda, ka buat ruma ne'ebé halo sira diferente hosi ita-nia an rasik" (ibid.)"



"Maun-alin sira, hakfodak ne'ebé ita sente molok ema nia obra sira, sira fó hanoin mai

ita katak iha milagre boot liután ne'ebé tenke hakuak ho hakfodak no respeito boot liután katak ita-nia maun-alin sira hasoru malu, lahó diskriminasaun, loron-loron iha ami nia viajen, hanesan ami haree iha sociedade no Igreja Singapura nian, étnikamente oioin maibé unido no iha solidariedade"

"Edifisiu ne'ebé furak liu, rikusoin ne'ebé folin liu, investimentu ne'ebé lukrativu liu iha Maromak nia matan, saida mak ne'e ? Ne'e ita-nia an rasik, ita hotu, tanba ita Aman ida de'it nia oan doben sira (kf. Lc 6,35), ne'ebé iha nia fatin simu bolun atu habelar domin. Leitura sira Missa nian ko'alia mai ita kona-ba ida-ne'e iha dalan oioin. Husi pontu-de-vista oioin, sira deskreve domin ida de'it, katak laran-maus iha apresiasaun ba ema fraku sira-nia vulnerabilidade (kf. 1 Kor 8,13), frugalidade hodi koñese no akompaña sira ne'ebé iha dúvida iha viajen moris nian (kf. Sal 138) laran-luak, laran-di'ak iha perdua ne'ebé liu kálkulu no sasukat hotu (kf. Lucas 6,27-38)"

"Domin ne'ebé Maromak hatudu mai ita, Nia konvida ita atu fahe ho ema seluk, "responde ho laran-luak ba nesesidade sira ema kiak nian, karakteriza ho kompaixaun ba sira ne'ebé tanis, lalais atu fó ospitalidade no persevera iha tempu provasaun nian. sempre prontu atu perdua, iha esperansa", perdua no iha esperansa to'o pontu atu selu fali "bensaun ba malisan sira, domin maka esénsia Evanjellu nian" (Saun João Paulo II, Homilia iha Santa Misa iha Edifisiu Estádiu Nasionál, Singapura, 20 Novembru 1986)"

“Loos duni, ita bele haree ida-ne'e iha santu sira, mane no feto sira ne'ebé sura labele ne'ebé hetan konkista hosi Maromak

mizerikórdia ida ne'ebé sai reflesaun ida mizerikórdia nian, eko ida, imajen moris ida”.

“Atu taka, ha'u hakarak hanoin hikas de'it rua hosi sira, Naran dahuluk mak Maria, ne'ebé ohin loron ita celebra nia Naran Santu Liu. Nia fó ona esperansa ba ema barak liuhusi nia apoiu no prezensa, nia kontinua halo ida-ne'e! Iha ibun hira mak Ninia naran mosu, no kontinua mosu iha tempu ksolok no triste nian! Ida-ne'e tanba iha nia, iha Maria, ita haree Aman nia domin manifesta iha modu ida furak liu no majestuoza liu, basá iha nia ita haree ternura – ita keta haluha laran-maus! - kona-ba inan ne'ebé komprende no perdua buat hotu no nunka husik ita. Tanba ne'e maka ami fila ba nia"

"Naran daruak maka santu ida ne'ebé ema hadomi tebes iha rai ida ne'ebé hetan ospitalidade iha ne'e dala barak durante nia viajen misionária sira. Ha'u ko'alia kona-ba Saun Francisco Xavier, ne'ebé simu iha rai ida-ne'e dala barak, ikus liu iha loron 21 fulan-Jullu tinan 1552"

"Ita iha nafatin karta furak ne'ebé nia dirije ba S. Inácio no ninia kompañeiru dahuluk sira, iha-ne'ebé nia espresa ninia hakarak atu bá iha universidade hotu ninia tempu nian hodi hakilar hanesan ema ne'ebé loko-an, sira ne'ebé iha estudu liu karidade, atu sira bele sente obrigadu atu sai misionáriu tanba maun-alin sira-nia domin atu "hakilar ho fuan tomak: 'Na'i, ha'u iha ne'e saida mak ita-boot hakarak ha'u atu halo?' (Surat, Cochín, Janeiro 1544)".

"Ita mós bele halo liafuan sira-ne'e sai ita-nian rasik, tuir Maria nia ezemplu: “Na'i,

ha'u iha ne'e; Ita hakarak ha'u atu halo saida?", atu sira bele akompaña ita la'ós de'it iha loron sira-ne'e, maibé nafatin nu'udar kontinuasaun kompromisu atu rona no hatán lalais ba konvite sira atu hadomi no moris ho justisa ne'ebé ohin loron kontinua mai ita husi Maromak nia domin rohan-laek".

Santu Padre hateten, nia la espera saida mak Singapura iha, nasaun ne'ebé dezvoltu tebes, ema moos, edukadu, sidade tebes no

edifisiu boot barak, inklui iha kultura inter-relijiun ne'ebé di'ak tebes.

"Ha'u la espera atu hetan Singapura hanesan ne'e. Sira bolu ida-ne'e Nova Iorque Leste nian, nasaun dezvoltu ida, ema moos, edukadu, sidade, edifisiu boot sira. Aleinde ne'e, ida-ne'e iha kultura inter-relijiun ne'ebé di'ak tebes."


"Maun-alin doben sira, se buat di'ak ruma eziste no sobrevive iha mundu ne'e, ne'e tanba de'it iha situasaun barak, domin manán ódiu, solidariedade liu indiferensa, laran-luak liu egoizmu. La ho ida-ne'e, laiha ema ida iha ne'ebe maka bele kria metrópole boot hanesan ne'e, tanba arkitetu sira sei la dezeń, traballador sira sei la serbisu ba ida-ne'e, no sei la hetan buat ida". Tenik Amu Papa ba Kristaun Singapura

"Maun-alin sira, imi hela iha rai dook ida-ne'e, karik imi imajina katak imi haketak hosi Maromak no husik malu. Ida-ne'e la loos, lae! imi hamutuk iha Espiritu Santu no Maromak, Maromak dehan ba imi ida-idak, "sai nakloke"! Importante liu mak loke ita-nia an ba Maromak no ita-nia maun-alin sira, loke ita-nia an ba Evanjellu hodi halo nia sai sentru ba ita-nia moris". Hatete Santu Padre Ba Povu Papua Nova Guiné

KAPÍTULU III

3 Durante Papa Francisco Estádia Iha Timor-Leste

3.1 Papa : Buat Ne'ebé Furak Liu Iha Timor Maka Ninia Emar Sira



SAPNewsTL : Hafoin to'o Aeroportu Internasional Nicolau Lobato Comoro Dili, Santu Padre Papa Francisco ho laran ksolok no fo agradese ba Maromak tanba bele lori nia to'o rai ida ne'ebé dook tebes husi Vatikanu.

Iha serimónia resepsaun, iha Labarik Na'in 3 kompostu hosi feto na'in 2 no mane na'in 1 hodi representa kultura Timor-Leste simu Santu Padre Papa Francisco.

Iha aeroportu internasional Nicolau Lobato, Presidente República José Ramos Horta no Primeiru Ministru Kayrala Xanana Gusmão hamutuk ho membru governu inklui Prezidente Autoridade Munisípiu sira simu Papa Francisco no hetan bensaun husi Santu Padre.

Husi Aeroportu Comoro, Papa Francisco ho karreta spesial ho oin midar no laran ksolok iha dalan fo bensa ba sarani sira ne'ebé forma naruk husi resintu aeroportu to'o Nunsiatu Motaél.

Hafoin deskansa iha Nunsiatu Motaél, Papa Francisco kontinua ba Palasiu Presidensial Nicolau Lobato Dili hodi halo sorumutu ho lider polítiku, sivil no militar sira.

Iha Palasiu Presidensial Nicolau Lobato, Santu Padre Papa Francisco sente ksolok no agradese ba Na'i Maromak tanba bele lori nia to'o Timor-Leste.

Papa Francisco enkoraja povu Timor-Leste atu moris ksolok iha fiar, armonia no diálogu tuir kultura Timor nian.

“Ha'u agradese ba Na'i tanba lori ha'u mai Timor-Leste no ha'u enkoraja ninia povu atu moris ksolok fiar nian, iha armonia no diálogu ho kultura”. Papa Francisco hakerek liu hosi karta ne'ebe prepara iha Palasiu Prezidensial Nicolau Lobato Dili, 09/09/2024.

Lider Mundial Igreja Katólíka ne'e konsidera buat ne'ebe furak liu iha Timor-Leste maka ninia povu.

“Buat ne'ebé di'ak liu no furak liu ne'ebé Timor-Leste iha mak ninia ema sira. Ha'u haraik bensaun ba ita-boot ho ha'u nia fuan tomak.”

Enkuantu, bainhira Papa Francisco to'o aeroportu sarani sira simu tuir kultura Timor-Leste nian.

3.2 Xefe Estadu Vatikanu Francisco Enkontru Ho Lideres Timoroan

3.2.1 Papa Francisco : Povu Timor Matenek, Transforma Moras Sai Ksolok



Imajem : Santu Padre Papa Francisco hamutuk ho Prezidente República José Ramos Horta iha Palásiu Prezidensial Nicolau Lobato, 09/09/2024.

SAPNewsTL : Durante enkontru ho Bispu, diplomáta no lider nasional sira, Santu Padre Papa Francisco konsidera Timor-Leste iha tradisaun ida ne'ebé riku ho istória, kultura, paisajem no hanorin beatitude espirituál sira.

Amu Papa Francisco hateten Timor Lorosa'e rai ida ne'ebé iha konfiansa, fiar iha Maromak, terus maibé matenek iha terus no metin iha esperansa.

“Tradisaun ida ne'ebé riku iha konfiansa, haraik-an iha Maromak, perdaun, mizerikórdia, pasiénsia, terus iha tribulasaun, ita-boot sira maka povu ida ne'ebé terus maibé matenek iha terus”.

“Ha'u hakarak liuliu atu hanoin no hahi'i imi-nia lideransa ne'ebé komprometidu atu alkansa rekonsiliaun ho imi-nia maun-alin indonéziu sira, dispozisaun ne'ebé hetan nia fonte dahuluk no puru liu iha hanorin sira Evanjellu nian”. Tenik Santu Padre Papa Francisco iha Palásiu Prezidensial Nicolau Lobato Dili, 09/09/2024.

Papa Francisco hatutan, damen no unidade mak boot liu iha mundu, Timor-Leste hatene transforma moras ba ksolok tanba metin iha fiar no esperansa.

“Kaer metin iha ita-boot nia esperansa, maski iha terus nia leet, agradese ba povu nia karakter no ita-boot sira nia fiar, imi transforma moras ba ksolok. Hakarak ba dame nafatin prevalese iha situasaun konfliktu sira seluk iha mundu tomak tanba unidade superior liu konfliktu. Dame no unidade maka superiór liu duké konfliktu”.

“Ba ida-ne'e, presiza mós purifikasaun memória nian ida atu kura kanek sira, kombate ódiu ho rekonsiliaun, no konfrontu ho kolaborasaun”. Hateten Santu Padre

Tuir loloos, misionáriu dominikanu dahuluk sira to'o hosi Portugál iha sékulu XVI, lori ho sira Katólisizmu no lian portugés, Hirak-ne'e hamutuk ho lian tétum, agora sai nu'udar lian ofisiál Estadu nian.

Kristaun moris iha Ázia to'o iha rejiaun sira-ne'e kontinente nian liuhosi misionáriu europeu sira ne'ebé fó sasin kona-ba ninia lokalizasaun universál no ninia abilidade atu armoniza ho kultura oioin. Bainhira hasoru Evanjellu, sira to'o iha sínteze foun ne'ebé aas liu no kle'an liu.

Kristaun sai enkarnadu, hakuak kultura sira, iha ne'ebá ritu orientál hosi povu oioin tama iha jogu tanba dimensaun importante ida hosi kristaun maka inkulturasan fiar nian.

Binomiál ida-ne'e ba vida sarani importante mak inkulturasan fiar nian no

evanjelizasaun kultura nian ida ne'ebé la'ós fiar ideolójiku ida maibé ida-ne'e maka fiar ida ne'ebé maka iha abut ho kultura.

Timor-Leste, Rai ida ne'ebé enfeitá ho foho, ai-laran, no rai-tetuk sira, hale'u ho tasi ne'ebé furak, riku ho buat barak, ai-fuan sira, no ai-laran sira, liu ona faze ida ne'ebé todan iha nia pasadu, hodi esperiênsia konvulsaun no violênsia ne'ebé dala barak akontese bainhira povu ida buka ninia independênsia tomak no buka ba autonomia hetan negasaun ka frustrasaun.

Husi loron 28 fulan-novembru tinan 1975 to'o loron 20 fulan-maiu tinan 2002, katak, hosi deklarasaun independênsia to'o nia restaurasaun definitiva, Timor-Leste moris liu iha tinan naruk ba paixaun no ninia julgamentu boot liu. Husi ne'ebá, nasaun ne'e bele hamriik fali, hetan dalan dame nian no loka ba faze foun ida ne'ebé hakarak dezvoltamentu, hadi'a kondisaun moris nian.

Xefe Estado Vatikanu ne'e agradece ba Maromak tanba iha periodu dramátiku ne'ebé nakonu ho terus no mate maibé la lakon esperansa hodi luta to'o hetan damen no liberdade.

“Ami agradece Maromak tanba imi tenke liu hosi periodu dramátiku hanesan ne'e iha istória, imi la lakon esperansa, no mós tanba hafoin loron nakukun no susar sira, ikusmai mosu ona madrugada dame no liberdade nian”.

Atu atinji objetivu importante sira-ne'e, iha abut iha fiar ajuda ona povu Timor Lorosa'e, hanesan São João Paulo II destaka bainhira nia vizita iha tinan 1989.

“Iha ninia omilia iha Tasi Tolu, nia temi katak sarani Katólíka Timor-Leste iha tradisaun ida ne'ebé moris família, kultura, no lisan sosiál iha abut iha Evanjellu, imi mak masin rai nian no naroman mundu nian”.

“Furak tebes atu ko'alia kona-ba polítika lolo-liman nian, ne'ebé matenek tebes. La'ós beik, lae. Tanba bainhira lolo-liman hetan traisaun, nia hatene luta. Nia hatene lori no hakat ba oin”.

Papa Francisco fo agradece ba Presidente José Ramos Horta tanba inkorpora deklarasaun fraternidade umana sai dokumentu nasional.

“Ha'u fo rekoñesimentu no agradesimentu ba Presidente República José Ramos Horta tanba iha okaziaun loron 20 aniversáriu independênsia nasaun nian, Timor-Leste inkorpora ona Deklarasaun kona-ba Fraternidade Humana nu'udar dokumentu nasional, obrigado barak ba Presidente República”.

“Ha'u asina ida-ne'e hamutuk ho Grande Imam Al-Azhar nian iha Abu Dhabi, hanesan deklarasaun ne'e rasik husu ita-boot sira halo ona atu ida-ne'e bele adota, inkorpora iha kurríkulu eskolár sira, ne'ebé maka fundamental”.

Santu Padre husu Timoroan sira hodi continua ho konfiansa foun iha matenek no konsolidasaun ba instituisaun sira nasaun nian, nune'e sidadaun sira bele sente ho efetivu reprezenta iha sira no iha kbiit tomak atu serbí povu Timor-Leste liu hosi hakat dejafiu no rezolve problema sociedade.

3.2.2 Papa : Timor-Leste Livre, Demokrátiku, Solidáriu & Inkluzivu



Imajem : Santu Padre Papa Francisco iha Aeroportu Internasionál Nicolau Lobato Dili, 09/09/2024. Foto : Conzita Mota

SAPNewsTL : Santu Padre Papa Francisco ho ksolok husu makaer ukun sira atu hari'i nasaun ida livre, demokrátiku, solidáriu no inkluzivu.

Iha Palasiu Presidensial Nicolau Lobato, Santu Padre Papa Francisco sente ksolok no agradese ba Na'i Maromak tanba bele lori nia to'o Timor-Leste. Papa Francisco hateten nia konfia Povu Timor-Leste Imaculada Conceição atu nafatin akompanha ba misaun hari'i nasaun ne'ebé livre, demokrátiku no solidáriu.

“Ha'u konfia Timor-Leste no ninia povu tomak ba Imakulada Conceição nia protesaun, imi-nia padroeira lalehan nian ne'ebé invoka iha-ne'e ho título Virjen Aitara nian”.

“Atu nia akompaña nafatin ita-boot sira no ajuda ita-boot sira iha ita-boot nia misaun atu hari'i nasaun ida ne'ebé livre, demokrátiku no inkluzivu, iha ne'ebé laiha ema ida maka sente eskluidu no ema hotu bele moris iha dame ho dignidade.” tenik

Papa Francisco iha Palásiu Prezidente Nicolau Lobato Dili, 09/09/2024

Papa Francisco enkoraja povu Timor-Leste atu moris ksolok iha fiar, armonia no diálogu tuir kultura Timor nian.

“Ha'u agradese ba Na'i tanba lori ha'u mai Timor-Leste no ha'u enkoraja ninia povu atu moris ksolok fiar nian, iha armonia no diálogu ho kultura”. Papa Francisco hakerek liu hosi karta de onra ne'ebe prepara iha Palasiu Prezidensiál Nicolau Lobato

Iha ne'e, Ázia no Oseânia hasoru malu, no iha sentidu sira liga ho Europa, jeografikamente dook, maibé besik tanba papél ne'ebé hala'o iha latitude sira-ne'e iha sékulu lima ikus.

Tuir loloos, misionáriu dominikanu dahuluk sira to'o hosi Portugál iha sékulu XVI, lori ho sira Katólisizmu no lian portugés, Hirak-ne'e hamutuk ho lian tétum, agora sai nu'udar lian ofisiál Estadu nian.

Ha'u mós hakarak husu ba ita-boot atu kontinua ho konfiansa foun iha matenek no konsolidasaun ba instituisaun sira estadu nian. Agora, orizonte foun ida loke ona iha imi nia leet maibé hasoru dezafiu foun sira no rezolve problema hirak ne'ebé mosu.

Ha'u hakarak husu fiar ne'ebé maka halo naroman no sustenta ita-boot iha pasadu, kontinua orienta ita-boot nia presente no ita-boot nia futuro. “Que a vossa fé seja a vossa cultura,” katak, bele inspira iha lei sira, projetu sira, no desizaun sira tuir Evanjellu.

Entre dezafiu atuál barak, ha'u hanoin kona-ba fenomenu emigrasaun nian ne'ebé sempre constitui indikadór ba utilizaun rekursu ne'ebé la suficiente ka la adekua, no mós difikuldade atu fornese ba ema hotu empregu ne'ebé prodús benefisiu justu no garante ba rendimentu família ne'ebé korresponde ba sira-nia nesesidade báziku sira.

Ha'u mós hanoin kona-ba pobreza ne'ebé prezente iha área rurál barak, nesesidade konsekuente ba asaun luan, koletiva ne'ebé envolve forsa oioin, responsabilidade relijioza no sosiál oioin atu hadi'a no oferese alternativa viável sira ba emigrasaun.

Ha'u hanoin kona-ba situasaun sira ne'ebé bele konsidera hanesan peste sosiál loloos, hanesan abuzu alkol entre foin-sa'e sira. Favor ida, kuidadu ida-ne'e. (Fó idea ba foin-sa'e sira atu ajuda sira halai sees hosi lasu sira-ne'e).

Fenomenu ida kona-ba tama iha gang balu ne'ebé enkorajadu hosi sira nia koñesimentu kona-ba arte marsiál sira, envezde uza ida-ne'e atu serbí ema sira ne'ebé laiha defeza, explora ida-ne'e hodi hatudu kbiit efémeru no prejudisiál violénsia nian (Violénsia sempre sai ameasa ida ba povu sira).

Keta haluha labarik no adolexente barak ne'ebé kanek iha sira-nia dignidade, fenomenu ida-ne'e mosu iha mundu tomak. Ita hotu hetan bolu atu atua ho responsabilidade hodi prevene forma abuzu hotu-hotu no asegura kreximentu ida ne'ebé hakmatek ba ita-nia foin-sa'e sira.

Atu rezolve problema sira-ne'e, nune'e mós atu jere di'ak liután rekursu naturál sira

nasaun nian, inklui rezerva petróleu no gás nian ne'ebé bele oferese oportunidade dezentvolvimentu nian ne'ebé laiha presedente, esensiál atu prepara ho adekua, formasaun espesializada iha futuro.

Kreda oferese ninia doutrina sosiál nu'udar baze ba prosesu formasaun ne'ebé constitui pilar indispensavel ida ne'ebé atu dezentvolve eventu espesífiku sira, presiza nafatin atu depende ba nia, atu verifika se realizasaun foun sira sei fó benefisiu duni ba sentidu integrál.

"Igreja nia doutrina sosiál la'ós ideolojia ida, nia bazeia ba fraternidade, doutrina ida ne'ebé tenke promove dezentvolvimentu povu espesiál ka kiak liu, iha buat ida mak ha'u hakarak hateten ba imi, ha'u kaer metin tebes iha ha'u-nia fuan, loos ka lae ? Ida-ne'e nasaun furak ida, maibé saida maka di'ak liu kona-ba nasaun ida-ne'e ? Kuidadu ita-nia povu. Hadomi ita-nia povu. Povu ida-ne'e furak tebes. Sira maka povu ne'ebé ksolok."

Ita-boot sira ema joven ida, la'ós haree ba ita-boot sira-nia kultura no tempu hela iha rai ida ne'ebé lulik tebes, maibé tanba por volta de 65% populasaun Timor-Leste nian ho idade tinan 30 mai kraik. signifika katak ne'e maka rikusoin ida.

Númeru ida-ne'e hatete mai ita katak área dahuluk ne'ebé presiza investe maka edukasaun. Ha'u kontente ho saida maka ha'u aprende hosi Prezidente Horta kona-ba saida maka ita-boot halo daudaun. Continua nafatin. Ha'u fiar katak iha universidade oioin, eskola sekundária oioin, buat sira ne'ebé karik la eziste iha tinan 20 liubá. Ida-

ne'e maka taxa kreximentu ne'ebé boot tebes.

“Investe iha edukasaun tantu iha uma no iha eskola. Edukasaun ida ne'ebé sentraliza iha labarik, foin-sa'e sira no promove sira-nia dignidade”.



Ha'u haksolok tebes haree labarik sira hamnasa ho sira-nia nehan mutin nabilan. Iha labarik sira iha fatin hotu-hotu. Entuziazmu, fresku, vizaun ne'ebé haree ba oin, aten-barani, no enjeñu típiku hosi foin-sa'e sira, kombina ho esperiênsia no matenek hosi katuas sira, kria mistura riku ida hosi koñesimentu no impulsu jenerozu sira ba futuro.

Iha ne'e ha'u hakarak oferese konsellu ida. Lori labarik sira hamutuk ho avó sira. Interasaun entre labarik sira no avó sira lori matenek. Hanoin to'ok. Hamutuk, entuziazmu no matenek juvenil ida-ne'e reprezenta rekursu boot ida ne'ebé la permite pasividade ka pesimizmu.

Kreda, ninia doutrina sosiál, ninia instituisaun sira asistênsia no karidade nian ba ema kiak sira, nune'e mós ninia asistênsia edukativa no méдика, hotu-hotu iha servisu ba ema hotu no konstitui rekursu folin-boot

ida ne'ebé permite ita atu hateke ba futuro ho matan esperansa nian.

Kona-ba ida-ne'e, importante atu nota katak Igreja nia kompromisu ba bem-komún, hametin ho kooperasaun no apoiu estadu nian iha kuadru relasaun kordiál ne'ebé desenvolve entre Igreja no República Demokrátika Timór-Leste, rekoñese iha Akordu entre Parte sira ne'ebé tama iha vigór iha loron 3 fulan Marsu tinan 2019.

Iha tinan 2016, (Relasaun exelente). Timor-Leste, ne'ebé hasoru ona tribulasaun boot ho pasiênsia, determinasaun, no heroismu, oras ne'e moris nu'udar nasaun pasífiku, demokrátiku ne'ebé komprometidu atu hari'i sosiedade ida ne'ebé haburas no desenvolve relasaun pasífika ho nia viziñu sira iha comunidade internasionál.

Haree ba Ita-boot nia pasadu resente no saida maka atinji ona to'o agora, iha razaun sira atu fiar katak nasaun ne'e mós sei bele hasoru difikuldade no problema atuál sira ho inteligênsia, klareza, no kriadividade. Fiar ba matenek povu nian. Povu iha nia matenek. Fiar iha matenek ne'ebá.

Ha'u elojia Timor-Leste no ninia abitante sira hotu ba protesaun Imakulada Konseisaun nian, ninia patrona lalehan nian, ne'ebé invoka ho título Na'i-Feto Aitara nian. Atu nia nafatin akompaña no tulun ita-boot sira iha misaun atu hari'i nasaun ida ne'ebé livre, demokrátiku, apoiu, no ksolok, iha ne'ebé laiha ema ida maka sente eskluído no ema hotu bele moris iha dame no dignidade.

Maromak haraik bensaun ba Timor Loroasa'e.

3.3 Obrigadu Papa Francisco ! Lori Damen, Fraternu & Bensaun Ba Mundu



Imagem : Santu Padre Papa Francisco iha Aeroportu Internasionál Nicolau Lobato Dili, 09/09/2024. Foto : Vatican News

SAPNewsTL : Prezidente Repúblika José Ramos Horta fo agradese ba Santu Padre Francisco tanba bele vizita nasaun ne'e, Sua Santidade nia vizita akontese iha momentu krusiál ida ba futuru kolektivu, la'ós de'it iha Timor-Leste maibé mós iha nivel globál, lori mensajen dame, rekonsiliaaun, fraternidade umana no esperansa ne'ebé nesesáriu tebes ba mundu.

Istórikamente, vizita ne'e nu'udar tinan ida ne'ebé partikularmente signifikativu ba povu no nasaun, marka eventua importante oioin ne'ebé marka tranzisaun Timor-Leste nian iha loron 25 fulan-abríl tinan 2004, Timor-Leste selebra ho maun-alin sira husi Portugál aniversáriu ba dala lima-nulu revolução dos carvos.

“Revolusaun foun ida laho ódiu, persegisaun no vingansa, ida-ne'e maka revolusaun umanista ida ne'ebé loke odamatan dame ba Portugal nia demokrasia iha teritóriu koloniál portugés sira hotu”.

“Ita selebra tinan 25 konsulta populár ne'ebé organiza husi ONU iha loron 30 fulan Agostu tinan 1999, entre Sekretáriu Estadu ONU nian mak ita nia belun Antonio Guterres ne'ebé nu'udar Primeiru Ministru Portugal. Iha períodu manas no perigozu tinan 1999, Antonio Guterres revela nia korajen, integridade, konviksaun umanista ho nia lideransa diplomátiku nia kontribui ho desizivu ba dezvoltamentu pozitivu ida iha loron 15 fulan-agostu tinan 2024, marka aniversáriu ba dala 25 hosi aprovasaun misaun interfet sira hosi Konsellu Seguransa ONU no asaun bázika nesesária ba estabesimentu UNTAET”.

Iha loron 12 Outubru 2024, Timor-Leste selebra tinan 35 vizita Saun João Paulo II nian mai Timor-Leste, vizita ida ne'ebé tau kauza autodeterminasaun Timor-Leste nian iha agenda globál, lii tiha tinan 35, ohin ho laran ksolok povu ne'e simu Sua Santidade Papa Fransisco.

Órgaun soberania hotu-hotu, autoridade nasional sira, instituisaun relijioza no organizasaun sosiedade sivíl sira, leigu timoroan sira, ema estranjeiru ho fiar no prátika relijioza hotu-hotu hamutuk hodi venera nia Santidade.

“Ami hato'o ami nia agradelementu ba Santu Padre tanba hala'o vizita ida ne'e no haraik bensaun ba ami nia rai. Ita husu ba Na'i Maromak atu rona nafatin ita-nia orasaun hodi kuida Santu Padre nia Saúde, nune'e bele inspira no guia nafatin humanidade iha dalan dame no fraternidade umana nian”.

Parlamentu Nasionál vota ho unanimidade hodi adota deklarasaun kona-ba fraternidade umana, dokumentu ida ne'ebé orienta humanidade tomak, hakerek hosi Sua Santidade Papa Francisco no profesór Dr. Ahmad Al-Tayyeb, magnetu boot Alazar Cairo nian, ne'ebé asina ho solene iha loron 4 fulan-Fevereiru tinan 2019 iha Abi Dhabi, durante vizita istóriu Sua Santidade nian.

Governu Timor-Leste aprova dekretu lei número 32/24 loron 6 fulan-setembru, ne'ebé aprova kurrikulu báziku nasional ba siklu báziku eskolár datoluk introdús dixiplina fraternidade umana, morál no étika. Inspira husi hanorin husi Sua Santidade Amu Papa Fransisco no lider-boot Alazar Cairo nian husi profesór Dr. Ahmad Al-Tayyeb hodi promove pás mundiál no moris armonia iha ambiente diversidade sosiál.

“Ha'u hato'o agradesimentu kle'an ba Sua Eminénsia Dom Virgilio Cardial do Carmo da Silva SBD, Bispu Metropolitanu Dili, Bispu Konferénsia Episkopál Timorensen, sua eminénsia Monseñor Marco Sprizzi, responsavel ba proklamasan apostólika no membru relijiozu sira hotu Dioseze nian, leigu sira no sarani sira ba imi nia dedikasaun, espírito, misaun no sakrifísiu, la kolen serbisu iha ekipa no koordenasaun ho representante Igreja Katólika no sosiedade timoroan sira alkansa misaun importante ida-ne'e ne'ebé halibur ita”.

Liafuan espesiál ba família sira liuliu joven feto no mane, labarik no adolexente sira partisipa ativu iha eventu oioin ho dignu no ezemplár, Sua Santidade nia vizita akontese iha momentu krusiál ne'e.

“Vizita Sua Santidade ida ne'e ba ita-nia futuru koletivu, la'ós de'it iha ita-nia rain maibé mós iha nivel globál, lori mensajen dame, rekonsiliaun, fraternidade umana no esperansa ne'ebé nesesáriu tebes iha mundu ne'ebé kontraditóriu ba beibeik, iha ne'ebé fuan nia malirin troka diálogo no dame, atu mensajen Sua Santidade nian kona ema nia fuan liuliu lider mundiál sira ho responsabilidade boot ba ita-nia seguransa komún”.

“Ami nia esperansa hela ho vítima sira hosi konfliktu armadu iha mundu tomak hanesan Ukrânia, Palentina, Sudaun no Yémen, Síria, Kongo no ami nia rejiaun liuliu iha Myanmar, iha península Koreanu. Ami reza ba ostilidade sira nia rohan no fila fali ba damen hodi hafoun fiar feto, labarik, katuasferik no vulneravel sira ne'ebé maka sofre liu tanba dezarmonia globál”.

“Ami luta hasoru kiak multidimensionál, hamlaha no seguransa alimentár malnutrisaun inan no labarik, violénsia ho tipu saida de'it, forma oioin hosi eskluzaun no marzinalizasaun sosiál, sira ne'ebé moris hi'as, labarik no joven sira iha direitu ba mundu ida ne'ebé di'ak liu atu bele dezenvelope sira nia potenciál iha ambiente pasífiku, dignu no ekilibradu”.

Liu hosi hanorin Sua Santidade Papa Fransisco nian ema hotu bele hetan inspirasaun atu hari'i uma komún ne'ebétoleránsia liután até hakmatek liután, inkluzivu no fraternu ho nia liafuan sira ne'ebé halo naroman, matenek no kompaixaun sei orienta no hametin iha ema hotu viajen. “Obrigado barak, ita bo'ot nia Santidade, Maromak haraik bensaun”.

3.4 Sua Pontífise Vizita Koléjiu Orfanatu Irmã Alma

3.4.1 Papa Francisco : Labarik Sira Mak Ita Nia Mestre



Imajem : Papa Francisco hamutuk ho labarik sira iha Koléjiu Irmã Alma Pantai-Kelapa, 10/09/2024.

SAPNewsTL : Durante vizita Santu Padre Papa Francisco iha Koléjiu Irmã Alma Pantai-Kelapa, Papa Francisco hateten husik Maromak mak tau matan ba ita no aprende husi ema seluk nia tau matan tanba sira mak ita nia mestre.

Wainhira vizita Koléjiu Irmã Alma ne'ebé halibur labarik no ema ho defisiénsia sira iha Tersa feira, loron 10 fulan Setembru tinan 2024, Papa Francisco fó agradese ba Madre sira tanba bele tau matan ba labarik no ema ho defisiénsia sira.

Xefe Estadu Vatinaku ne'e haktuir Jesus dehan ba hamutuk ho nia, maibe Jesus la dehan ba povu atu hamutuk tanba hetan ona baptizmu, krisma, kazamentu, la bosok no la na'ok, signifika ema hotu ne'ebé moris ne'e halo salan no Jesus konvida ema hotu atu ba hamutuk ho nia.

“Iha buat ida ne'ebé halo ha'u hanoin nafatin. Bainhira Jezús ko'alia kona-ba juizu ikus, nia dehan ba ema balun: “Mai hamutuk ho ha'u”, maibé nia la dehan: “Mai hamutuk ho ha'u tan imi sarani ona, tan imi simu ona Krisma, tan imi kaben ona iha Kreda, tan

imi la bosok, tan imi la na'ok”. Lae, nia dehan; “Mai hamutuk ho ha'u tan imi tau matan mai ha'u”. Tenik Santu Pasre Papa Francisco iha Koléjiu Irmã Alma Pantai-Kelapa, Dili, 10/09/2024.

Papa Francisco hatutan, Jezús dehan: “Mai hamutuk ho ha'u tan imi tau matan mai ha'u bainhira ha'u hamlaha, no imi fó han mai ha'u, bainhira ha'u hamlaha, imi fó bee mai ha'u, bainhira ha'u moras, imi vizita ha'u”, no ba tan oin.

Amu Papa Francisco hakarak domin ne'ebé bele enkoraja, hari'i no hametin iha fiar sarani idak-idak nian.

“Ha'u hanaran ne'e sakramentu ema ki'ak nian. Domin ne'ebé enkoraja, hari'i, hametin. Buat ne'ebé ita hetan iha ne'e maka domin. Domin la iha karik, ida ne'e la iha sentidu. Nune'e mak ita komprende Jezús nia domin. Nia saran nia moris tan ita. Ita la bele komprende Jezús nia domin bainhira ita la hahú hadomi”.

Papa Francisco hateten, fahe ita nia moris ba ema ne'ebé presiza liu mak programa ida ba ema hotu-hotu. Agradese ba Madre sira ne'ebé halibur labarik sira iha koléjiu.

“Fahe ita-nia moris ho sira ne'ebé prezisa liu mak programa ida, programa ida ba imi, no programa ida ba sarani idaidak. Ha'u hakarak fó agradese ba imi ba buat ne'ebé imi halo daudaun no ha'u hakarak fó agradese mós ba labarik mane no fetu sira ne'ebé ko'alia ho ami kona-ba husik ema tau matan ba sira”. Papa Francisco hateten



Santu Padre hatutan, “Sira hanorin ita atu husik Maromak tau matan mai ita. Husik Maromak tau matan mai ita no la’os ho númeru naran deit ideia, planu ka hanoin arbiru sira. Husik Maromak tau matan mai ita. Labarik sira ne’e mak ita-nia mestre sira. Obrigadu ba imi tan ida ne’e”.

“Ha’u haree labarik ne’e, nia naran sa? Silvano. Lori nia mai. Silvano hanorin ita saida? Nia hanorin ita atu hanoin (iha pre-okupasaun – peduli). Hodi tau matan ba nia, ita aprende atu hanoin maluk sira. Haree nia oin bá: nia kalma, ho pasiénsia, toba hakmatek. Hanesan nia husik ema tau matan ba nia, ita mós prezisa aprende atu husik ema seluk tau matan mai ita”.

Lider Mundial Igreza Katólíka ne’e subliña Maromak hadomi tebtebes humanidade sira, tanba ne’e nia sempre tau matan ba nia emar sira, imi tenki tau matan ba labarik sira iha Koléjiu Alma, Maromak sei tau matan fali ba imi.

“Husik Maromak tau matan mai ita, Maromak ne’ebé hadomi ita tebtebes, husik Na’in Feto tau matan mai ita. Nia ita-nia Inan. Ohin, mai ita reza Ave Maria ba Na’in Feto, no ha’u sei fó bensa ba imi. [Ave Maria no bensa. Bensa hotu tiha] Keta

haluha, keta haluha katak ita tenke aprende husik ema tau matan mai ita, ita hotu hanesan sira ne’e, husik ema tau matan ba sira. Obrigadu.”

Hafoin hato’o mensagem ba sira no fahe presente ba madres, labarik sira, defisiénsia sira no ema voluntáriu sira, Santu Padre kontinua husu ema hotu atu tau atensaun ba labarik sira hanesan Saun José tau matan ba Na’in Feto, Na’in Feto tau matan ba Jesus no Jesus tau matan ba emar sira.



“Ne’e mak presente ne’ebé ha’u husik ba uma ne’e. Fó atensaun bá, Saun José tau matan ba Na’in Feto, no Na’in Feto tau matan ba Jezús. Ida ne’ebé importante liu mak ida ne’ebé uluk liu husik ema tau matan ba Jezús. Nia husik Maria no José tau matan ba nia”. Nia tatoli.

Iha dader san nakukun, molok Santu Padre to’o iha Pantai-Kelapa, sarani sira forma naruk no nakonu iha luron ninin hodi hein no simu ho felisidade. Wainhira Santu Padre to’o labarik sira, ema ho defisiénsia, sarani sira barak hetan bensaun direta husi Santu Padre Papa Francisco liu hosi rein liman, simu tersu, simu stiker, no simu rebusadu.

3.5 Xefe Supremu Igreja Katólíka Enkontru Ho Bispus, Padres, Madres, & Leigus

3.5.1 Norberto : Sarani Laran Manas & Ksolok Rona Papa Francisco



SAPNewsTL : Diskursu Prezidente Conferénsia Episkopal Timorens (CET) Dom Norberto do Amaral deklara sentinu orgullozu povu Timor Lorosa'e nian ba Santu Padre katak sarani sira iha rai oriente extremu prontu no laran manas hodi rona Papa Francisco.

Ho ksolok no onra boot iha Katedrál ida ne'ebé sai inan ba Igreja hotu-hotu iha Timór Lorosa'e. Katedrál ida ne'ebé nia memória hadomi tebes ba ita tanba Ita-Boot nia Predesesór.


Amu-Papa Saun João Paulo II, iha ninia Viajen Apostólíka iha tinan 1989, iha tempu susar bainhira Nasaun hetan subjugasaun, iha jestu ksolok nian hodi haraik bensaun ba nia. Liutiha tinan barak iha terus nian laran, ita rekupera Nasaun ne'ebé konsege hamriik no moris filafali hosi ahu-ruin destruisaun nian iha miléníu daruak ita-nia istória nian.

Nasaun foun no ki'ik ida ne'ebé kompostu hosi de'it rihun sanulu-resin-haat, atus ualu hitunulu-resin-haat. kilómetru kuadradu, ho populasaun millaun ida, abitante rihun atus tolu haatnulu, ho comunidade katólíka ne'ebé hamutuk liu millaun ida, fiar-na'in

rihun atus tolu, ne'ebé representa kuaze 98% hosi populasaun, no ho juventude ida ne'ebé aumenta. Timor-Leste mak nasaun ho persentajen Katólíku aas liu iha Ázia no, ema bele dehan, iha mundu tomak. Ida-ne'e lokaliza iha Oriente Extremu.

Ita-boot nia Santidade, iha Ita-boot nia eleisaun papal, ko'alia kona-ba Ita-boot nia an rasik, hatete katak kardeál sira bolu Ita-boot hosi mundu nia periferia. Di'ak, iha ne'e iha Nasaun ida ne'ebé situa iha mundu nia periferia no ema ida bele dehan, situa iha rai nia rohan. Iha ne'e nia bolu atu sai masin no naroman.

Bainhira, iha ami-nia vizita ad limina dahuluk, Ita-Boot nia Santidade hateten mai ami "atu imi-nia fiar sai imi-nia kultura", ami mantein nafatin liafuan sira-ne'e no atu hametin bolun ida-ne'e, iha-ne'e mak tema Ita-Boot nia Santidade nia vizita ida-ne'e mai Timor-Leste.



Imajem : Prezidente Conferénsia Episkopal Timorens (CET) Dom Norberto do Amaral

Santu Padre, hafoin tinan 35 vizita Saun João Paulo II nian, iha ne'e fali Vigáriu

Kristu nian iha ita-nia leet, atu fó kmaan mai ita no hametin ita iha fiar. Iha ne'e imi sei hetan: kleru sira, mane no feto relijiozu sira, seminarista sira, katekista sira no leigu balun, husi Timór Lorosa'e tomak, ne'ebé ho laran-manas simu no simu Ita-Boot ho

fuan ne'ebé moos, prontu atu rona Ita-Boot nia Santidade nia liafuan sira. Atu sai momentu ida orasaun nian, rona no haraik bensaun nian, saida de'it mak Ita-Boot nia Santidade hakarak hato'o mai ami.

3.5.2 Uza Batina Mutin ! Istória Pe. Sancho Tula Xanana Ba Ossu



Imajem : Pe. Sancho Amaral

SAPNewsTL : Iha momentu vizita Santu Padre Papa Francisco ne'ebe hala'o enkontru ho Bispu, saserdotes, diakonu, seminarista, Pe. Sancho Amaral hateten nia kontribui ba prosesu independensia hodi ajuda Komandante Xanana Gusmão halo viajen husi Díli ba Ossu.

Iha testemuña Pe. Sancho Amaral hateten, nia sai amlulik iha idade-68 anus, durante tinan 39 sai hanesan amlulik no involue aan hodi kontribui iha prosesu independénsia Timor-Leste.

"Ha'u Sancho Amaral ho idade-68 Amu-lulik Dioseze, tinan 39 nia laran sai nu'udar amlulik. involvimentu iha Timor-Leste nia prosesu independénsia, ha'u-nia kontribuisaun simples no badak tebes."

Pe. Sancho Amaral hateten, esperensia simples ne'ebe importante tebes, iha

momentu nia ajuda Komandante Jerál Kay Rala Xanana Gusmão ne'ebe husi Díli halo viajen ba Ossu.

"Ha'u-nia esperiénsia simples maibé importante tebes mak ajuda Komandante Jerál Kay Rala Xanana Gusmão muda husi Dili ba Ossu iha Juñu 1991".

Enkuantu Pe Sancho Amaral prezide misa iha Díli ne'ebe partisipa husi Amu-lulik parókia interiór, molok misa eskoltu Komandante Jerál Xanana Gusmão hasoru nia hodi husu tulun, tanba laiha dalan no ema seluk.

"Missa ida iha Dili ne'ebé Amu-lulik sira husi Parókia interiór sira mós mai, molok missa komandante nia eskoltu ida mosu ho pedidu ida, hodi dehan: "Senhor Padre! Maun Boot "Xanana" presiza duni atu ba ponta Leste, laiha dalan seluk no ema seluk, se la'os Na'i Padre." Rona ida-ne'e, ha'u sai konfuzaun no hakarak atu rekuza, maibé tanba to'o ona tempu atu misa, ha'u dehan de'it ba eskoltu hodi hein atu ami bele arranja". Nia konta.

Hafoin koalia ho eskoltu Komandante Jerál Pe. Sancho ba misa, reza hodi husu tulun, naroman no korajen ba Nai Maromak antes halo viajen ba Ossu.

"Ha'u ba hala'o misa atu reza hodi husu naroman, disernimentu no korajen. Missa hotu tiha, tanba eskoltu sei hein, ha'u deside atu bá hasoru Komandante Xanana hodi hahú viajen ba Ossu". Pe Sancho Amaral subliña.

Amlulik ne'e konta, durante hala'o viajen iha perturbasaun bainhira to'o iha foho lolon Subão militar Indonézia hapara sira, Komandante Xanana hateten sira sei la sees husi dalan ne'e, maibe ho batina Nai Lulik salva sira husi perigu.

"Ami sai husi Díli besik meiudia, tuir dalan kuaze buat hotu la'o di'ak iha de'it perturbasaun ki'ik ida bainhira, iha foho-lolon sa'e Subão nian, militar Indonézia fó sinál ba ami hodi para, depois Komandante Xanana dehan, "padre dalan ida ne'e ita sei la sees." Ho ida-ne'e, bainhira ha'u hatais kamizola, ha'u dudu janela karreta nian ho ha'u nia liman karuk sai, ho oin ne'ebé lantaridu no la amigavel hodi husu: "Ada apa?", katak, saida maka akontese, hodi hapara ami? Maibé bainhira militar sira haree katak ne'e Padre ida, sira husik ami liu".

Batina mutin sai identidade ba padre no madre, husi batina mutin mós subar no salva funu na'in sira no padre sira iha tempu difisil nia laran.

"Nune'e, batina nu'udar hatais identidade amlulik nian, liberta ami husi perigu. To'o iha Ossu iha loron ne'e kedas lokraik Komandante Xanana ho nia ema sira sai kedas hodi hala'o servisu hamutuk ho nia maluk sira iha ai-laran". Nia konta.

Pe. Sancho Amaral salienta, liu husi funu oioin ne'ebe susar nia agradese tanba to'o ohin nia sei moris hodi fó sasin moris nian nu'udar Amu-lulik, tanba nia hatene Maromak nafatin tau matan ba sira ne'ebe nia bolu no haruka hodi hala'o misaun.

"Ida-ne'e mak lisaun ne'ebé ha'u aprende nu'udar amlulik, liuhusi esperiênsia funu oioin ne'ebé susar, Maromak hatene tau matan ba sira ne'ebé nia bolu no haruka ba ninia misaun. ohin ha'u bele iha ne'e atu fó ha'u-nia sasin kona-ba moris, tanba Maromak hadomi ha'u no tau matan mai ha'u". Nia hakotu.

Bainhira Jezús ko'alía kona-ba juízu íkus, nia dehan ba ema balun: "Maí hamutuk ho ha'u", maibé nia la dehan: "Maí hamutuk ho ha'u tan ímí saraní ona, tan ímí símu ona Krísma, tan ímí kaben ona iha Kreda, tan ímí la bosok, tan ímí la na'ok".

Lae, nia dehan; "Maí hamutuk ho ha'u tan ímí tau matan maí ha'u".

3.5.3 Madre Rosa Deklara La Husik Fini Vokasaun Nian Namlaek



Imajem : Madre Rosa Sarmiento

SAPNewsTL : Madre Rosa Sarmiento deklara ba Santu Padre katak sei la husik fini sira-nia vokasaun nian namlaek maibe sei fó fuan vokasionál barak iha rai Timor Lorosa'e.

Ita-boot nia santidade, iha momentu folin-boot no grasiozu ida-ne'e, ha'u hakarak identifika ha'u-nia an nu'udar madre senior Kongregasaun Filhas Canossianas da Caridade Santa Madalena Canossa nian.

Ha'u Timoroan, nu'udar rezultadu husi asaun misionária naruk irmán Canossiana sira-nian ne'ebé tuir misionária sira-nia ain-fatin no S. Francisco Xavier, SJ misionária par excelência Oriente nian, mai iha Timór iha sékulu XIX nia rohan no kontinua sai prezente ohin loron iha formasaun relijioza no direitus umanus feto no joven timoroan sira nian.

Timor-Leste nu'udar país katóliku liu iha Sudeste Aziátiku no mós nu'udar oásis vokasaun saserdotál no relijioza nian. Ami mane no feto relijiozu barak hosi kongregasaun oioin prezente iha-ne'e, atu labele husik fini ami-nia vokasaun nian

namlaek, ami mai atu ko'a sira hodi fó fuan vokasionál barak.

Agradese ba Maromak, Timor-Leste haruka mane no feto relijiozu sira atu tulun rejaun sira seluk iha mundu. Ita maka nasaun joven ida ne'ebé hahú iha limiar sékulu XXI nian, maibé ita mós hanesan teritóriu ida ne'ebé hetan bensaun ho maioria hosi nia populasaun maka labarik sira, adolexente sira no joven sira.

Nune'e, Kreda no Nasaun nia futuru nabilan no promisór, ezije dezafiu oioin husi ita, atu hari'i comunidade sinodál komuñau no misaun nian no fó apoiu ba ideia sira fraternidade umana nian ne'ebé tau iha prátika iha ita-nia rai doben .

Iha Sua Santidade nia oin, ita aproveita oportunidade atu husu ninia bensaun espesiál ba ita-nia oan sira, adolexente sira, foin-sa'e sira, mane no feto sira, ferik-katuas sira no la haluha, ho modu espesiál ba deficiente sira ne'ebé barak.

Uluk, misionáriu sira mai hosi Europa atu evangeliza Timor no ohin loron, akontese kontráriu, Timor sei evangeliza Europa no parte seluk iha mundu.

Ha'u hakarak hodi misionária sira nia naran, mane no feto relijioza sira, katekista sira, agradese, ho laran tomak ba Sua Santidade nia mai iha ita-nia leet.

Bem-vindu ba Ita-Boot nia Santidade.

3.5.4 Florentino Sai Katekista Halo Tinan 68, Orgullu Sai Katólíku



Imajem : Katekista Florentino de Jesus

SAPNewsTL : Kuseñe klean Katekista Florentino de Jesus Martins ne'ebé sai katekista servi uma kreda halo tinan neenulu resin-ualu (68) no fo ninia sasin ba públiku iha vizita Santu Padre Papa Francisco.

Ha'u Florentino de Jesus Martins, katekista iha Parokia Nossa Senhora de Lourdes Ermera. Ha'u moris iha loron 21 fulan Feveireiru tinan 1935 no agora ha'u ho idade 89, ha'u ema Ermera, Timor-Leste.

Ha'u estuda iha eskola Nuno Álvares Pereira iha Soibada, husi tinan 1952 to'o tinan 1955. Iha tinan 1956, Mais Reverendu Padre Ezequiel nomeia ha'u nu'udar katekista voluntáriu iha Misaun Katólíka Ermera.

Nu'udar katekista voluntáriu, ha'u hahú fó katekúmenu sira iha Igreja Ermera, inklui estasaun misaun sira, mak hanesan Hatolia, Letefoho, Atsabe, Railaco no Fatubessi. Hafoin serbisu nu'udar katekista voluntáriu durante tinan 6 iha tinan 1962, ha'u hetan nomeasaun nu'udar katekista permanente Dioseze Dili nian husi Amu Bispu Mais Reverendo Dom Jaime Garcia Goulart, ha'u

hetan kolokasaun iha Misaun Katólíka Ermera nian.

Nu'udar Katekista Permanente, iha direitu ba saláriu ida pagamentu mensál ne'ebé selu husi Dioseze. Hafoin ha'u-nia nomeasaun, ha'u kontinua fó katekeze iha Kreda, iha estasaun sira misionáriu sira. Ha'u prepara katekumenu sira atu simu batizmu no simu Primeira Komuñan.

Iha tempu ne'ebá, seidauk iha transporte modernu. Dala barak ha'u tenke la'o entre tuku 6 no tuku 10 kilómetru atu fó katekeze. Durante viajen, dalaruma ha'u hasoru dezafiu sira hanesan udan, anin ka hela kalan iha viajen. Maski ha'u hasoru susar oioin, maibé ha'u nunka sai laran-kraik no kontinua serbisu ho responsabilidade, badinas no dedikasaun tomak.

Ha'u sempre iha entuziazmu no hakarak atu serbí Kreda maibé nu'udar ema ha'u iha limitasaun. tanba ha'u nia idade no kondisaun saúde nian (ha'u sofre moras Parkinson), ha'u tenke reforma hosi ha'u nia serbisu iha 2017 ho idade 82. Maibé ha'u kontinua fó konsellu no apoiu morál ba katekista sira seluk ne'ebé presiza ha'u-nia apoiu.

Ida-ne'e sai fonte orgullu boot ida, ha'u agradese tebes ba Maromak no Na'i-Feto tamba fó moris naruk mai ha'u no tamba hola parte iha evangelizasaun nu'udar katekista ativu durante períodu tinan 56 servisu nian.

Ha'u nia serbisu barak liu maka halo ho voluntáriu no Maromak rekompensa ha'u ho moris naruk no ksolok iha ha'u nia família.

3.5.5 Francisco : Perfuma Evanjellu Bele Transforma Realidade Nakukun, Injustisa & Korupsaun



Imajem : Papa Francisco iha Igreja Katedral Imaculada Conceição Dili, 10/09/2024. Foto : Ermelinda Soares

SAPNewsTL : Santu Padre Papa Francisco hateten perfume evanjellu bele transforma realidade nakukun, injustisa, korupsaun no violénsia sira ba umanidade hotu iha mundu rai-klaran. perfume ne'ebé simu husi Senhor tenke rai ho kuidaú, hanesan Maria Betânia nian rai loloos ba Jesus

Ha'u haksolok bele to'o iha imi-nia leet, iha kontestu viajen ida ne'ebé haree ha'u nu'udar peregrinu iha rai sira Lorosa'e nian. Ha'u agradece ba D. Norberto do Amaral ba liafuan ne'ebé nia ko'alia mai ha'u, hodi hanoin katak Timor-Leste hanesan nasaun ida “iha rohan mundu nian”. Tanba iha Kristu nia fuan, hanesan ita hatene, periferia sira ezisténsia nian mak sentru, Evanjellu nakonu ho ema, figura no istória sira ne'ebé hetan iha marjen sira, iha fronteira sira, maibé hetan konvokasaun husi Jezús no sai protagonista sira esperansa ne'ebé Nia hafolin.

Ha'u haksolok hamutuk ho imi no tan imi, tanba imi mak Na'i nia escolante iha rai ne'e. Hanoin kona-ba ita-boot nia kolen no

dezafiu sira ne'ebé ita-boot simu bolu atu hasoru, espresaun ida ne'ebé subjetivu tebes hosi Evanjellu João nian mosu iha ita-nia hanoin, ne'ebé konta epizódriu ida kazamentu nian no intimidade nian ne'ebé akontese iha Jesús nia belun sira nia uma: Lázaro, Marta no Maria (cf. . Jer 12, 1-11). Iha tempu ida, durante han-kalan, Maria “kose Jesus nia ain ho mina-morin ne'ebé moos, folin-boot, no hamaran ho nia fuuk.

Uma ne'e nakonu ho mina-morin nia morin, Maria kose mina ba Jesus nia ain no mina-morin ne'e namkari iha uma laran tomak. Ha'u hakarak hela hamutuk ho imi prezizamente kona-ba ida-ne'e: perfume, perfume Kristu nian no ninia Evanjellu, prezente ida ne'ebé ita tenke rai no ita simu bolu atu habelar. Rai perfume, difuza perfianu.

Salva no perfume. Ita sempre sente nesiedade atu fila fali ba orijen don ne'ebé simu, ita-nia hakaran atu sai sarani, amululik, katekista konsagradu. Ita simu Maromak nia moris rasik liuhusi Nia Oan Jesus, ne'ebe mate ba ita no fo Espiritu Santu mai ita. Kose mina ho mina ksolok nian no, hakerek apóstolu Paulo, ita ba Maromak Kristu nia morin di'ak (2 Kor 2, 15).

Belun doben sira, imi mak Kristu nia morin ! símbolu ida-ne'e la'ós estrañu: iha ne'e iha Timór, ai-sándalu loloos moris barak ho morin ida ne'ebé hetan apresiasaun maka'as no mós buka hosi povu no nasaun sira seluk. Bíblia rasik elojia nia valór, bainhira konta katak Liurai-feto Saba nian vizita Liurai

Salomão hodi oferese ai-sándalu ba nia (kf. Liurai sira, 10, 12).

Maun alin sira, imi mak morin Evanjellu nian iha rai ida ne'e hanesan ai-sándalu ho ai-funan ne'ebé matak nafatin, moris fó fuan, imi mós dixípulu misionáriu sira ne'ebé nakonu ho Espíritu Santu.

Ita keta haluha, maibé, buat ida: perfume ne ebé simu husi Senhor tenke rai ho kuidadu, hanesan Maria Betânia nian rai loloos ba Jesus. Ita mós tenke guarda Na'i halo ita-nia moris sai morin, nune'e labele lakon ka lakon nia aroma. Ida-ne'e signifika saida? Signifika konxiente kona-ba don ne'ebé simu, hanoin katak mina-morin la'ós ba ita, maibé atu kose Kristu nia ain, hodi fó sai Evanjellu no serbí ema kiak sira, signifika tau matan ba ita-nia an rasik, tanba mediokridade no laran-manas espirituál sempre subar hela.

Hakarak aumenta tan buat ida: ami hateke ho gratidaun ba istória ne'ebé maka antesede ami ba fini fiar nian ne'ebé kuda iha ne'e hosi misionáriu sira, ba eskola sira formasaun nian ba ajente pastorál sira, no buat barak seluk tan. Maibé ida-ne'e to'o ona? Loos duni, ita tenke hamahan nafatin ahi-lakan fiar nian. Tanba ne'e, ha'u hakarak dehan ba imi atu keta haluha aprofunda imi-nia doutrina sarani, atu sai maduru liuhusi formasaun espirituál, katekeze no teolójika, tanba buat sira-ne'e hotu serve atu fó sai Evanjellu ba imi-nia kultura no, iha tempu hanesan, atu hamoos nia husi arkaiku, dalaruma superstisiozu, forma no tradisaun sira.

Iha buat furak barak tebes iha ita-boot nia kultura ! Ha'u hanoin liu kona-ba fiar iha

moris-hi'as no iha matebian sira-nia klamar nia prezensa; maibé buat sira-ne'e hotu tenke purifika nafatin iha naroman Evanjellu nian no Kreda nia doutrina. Kompromete imi-nia an ba ida-ne'e, tanba kultura hotu-hotu no grupu sosiál hotu-hotu presiza purifikasaun no maturidade (Ap. Exhortation Evangelii Gauduan, 693).

Ita mai iha aspetu daruak, espalla perfume. Kreda eziste atu evangeliza, ita simu bolu atu lori ba ema seluk perfume midar moris foun Evanjellu nian. Maria husi Betânia la uza aimoruk folin-boot atu tau mina-morin ba nia an, maibé atu kose mina-morin ba Jezús nia ain, nune'e nia habelar iha uma tomak. Liután, Evanjellu Marcos nian espesifika katak Maria, atu kose mina ba Jezús, sobu alabastru franku ne'ebé iha mina morin (kf. 14,3).

Evanjelizasaun akontese bainhira ita iha aten-barani atu “sobu” botir ne'ebé rai minamorin, atu sobu “koncha” ne'ebé ema barak besik ba ita-nia an rasik no husik relijiozidade ida baruk-teen no konfortavel, moris de'it ba nesesidade pesoál sira. Ha'u gosta espresaun ne'ebé Irma Rosa uza iha ninia sasin: Kreda ida iha movimentu, Kreda ida ne'ebé la hamriik metin, la nakfilak iha nia an rasik, maibé ne'ebé sunu husi paixaun atu lori ksolok Evanjellu nian ba ema hotu.

Ita-boot nia rain, ne'ebé iha abut iha istória sarani naruk, presiza mós impulsu foun ida. evangelizasaun, atu Evanjellu nia morin to'o ba ema hotu, morin rekonsiliaun no dame nian, hafoin tinan todan sira funu nian; perfume ida kompaixaun nian ne'ebé tulun ema kiak sira hamriik no enkoraja empeñu atu hadi'a nasaun nia destinu ekonómiku no sosiál; perfume ida justisa nian hasoru

korruptsaun. Perfume Evanjellu nian tenke habelar hasoru buat hotu ne ebé hatun, distorse no até estraga moris umana, hasoru kanek sira ne'ebé hamosu vaziu interiór no sofrimentu hanesan alkoholizmu, violénsia no falta respeitu ba dignidade feto nian. Jezús nia Evanjellu iha kbiit atu transforma realidade nakukun sira-ne'e no hamosu sosiedade foun ida.



Imajem : Papa Francisco Fahe Tersu Ba Labarik Sira

Belun doben sira, ita presiza impulsu ida-ne'e hosi Evanjellu, tanba ne'e maka presiza amu-lulik sira, apaixonadu, preparadu, kriativu konsagradu no katekista sira. Ha'u agradese ba sasin husi Sr. Florentino, katekista ida ne'ebé dedika parte boot ida husi nia moris ba ministériu furak ida-ne'e.

Partikularmente ba amlulik sira, ha'u hakarak dehan buat tuirmai ne'e, ha'u hatene katak povu dirije ba imi ho afetu boot hodi bolu imi, “Ha'u” ne'ebé mak titulu

importante liu iha imi-nia leet no signifika “Na'i sentimentu superioridade nian iha relasaun” ba povu hodi induz tentasaun orgullu no poder nian, labele halo ita-boot hanoin ministériu hanesan prestíjiu sosiál ida, atua hanesan líder sira ne'ebé domina ema seluk.

Mai ita hanoin ida-ne'e: ho mina-morin kose Kristu nia ain ne'ebé mak ita-nia maun-alin sira iha fiar hahú husi sira ne'ebé kiak liu. Espresaun ne'ebé fiar-na'in sira iha bainhira hasoru amlulik sira, sira kaer Ita-nia liman konsagrada no lori ba sira-nia reen-toos nu'udar sinál bensaun nian, elojente. Furak atu haree iha sinál ida-ne'e, Maromak nia povu santu nia afetu, tanba amlulik nu'udar instrumentu bensaun nian, nia nunka bele aproveita ninia knaar, maibé tenke haraik bensaun nafatin, konsola, sai ministru kompaixaun nian no sinál Maromak nia mizerikordia.

Carissimos, diplomata portugés sékulu XVI, Tomé Pires, hakerek nune'e: Maibé, ita hatene katak iha perfume seluk, ida Kristu nian no Evanjellu nian ne'ebé halo moris sai riku no hakonu nia ho ksolok.

Keta laran-kraik! Hanesan Padre Sancho fó hanoin mai ita iha ninia sasin ne'ebé emocionante: Maromak hatene fó kmaan ba sira ne'ebé nia bolu no haruka ba misaun. Ha'u haraik bensaun ba ita-boot tanba ita-boot nia favor ne'ebé ita-boot reza ba ha'u. Obrigadu

“Perfume evanjellu bele transforma realidade nakukun, injustisa, korupsaun no violénsia sira ba humanidade hotu iha mundu rai-klaran”.

3.6 Sua Potífise Prezide Misa Istóriku Tasi-Tolu, Dili, Timor-Leste.

3.6.1 Dekadénsia Moral & Rikusoin, Halo Ema Barak Sai Egoista



Imajem : Peregrinu Rihun Atus Hitu Limanulu (750.000) partisipa iha misa ne'ebé prezide hosi Santu Padre Papa Francisco iha Tasi-Tolu Dili, 10/09/2024. Foto : Marciana da Conceição

SAPNewsTL : Durante prezide misa iha Tasi-Tolu, Santu Padre Papa Francisco hateten, infelizmente dekadénsia moral buras, rikusoin barak maibe halo ema kbi'it laek sira matan delek hodi haksolok ho ideia auto-suficiente hodi la presiza ona Na'i Maromak.

“Kosok oan ida moris ona ho ita, Oan mane ida Maromak haraik ona ba ita, ida ne'e maka liafuan sira ne'ebe profeta Izaias hato'o ba ema jerusalém sira, iha tempu ne'ebe sidade ne'e riku los, maibe infelizmente dekadénsia moral mós buras tebes, iha rikusoin barak tebes maibe moris diak ne'e halo ema kbiit laek sira matan delek hodi habosok sira ho ideia ida atu sai auto-suficiente ne'ebé la presiza ona Na'i Maromak no sira nia hanoin ida ne'e halo sira sai egoista no injustu”. Dehan Santu Padre Papa Francisco liu husi nia omilia ba sarini sira iha Tasi-Tolu, Tersa-Feira, 10/09/2024.

Santu Padre Papa Francisco sublinha Timor-Leste iha rikusoin barak maibe ema ki'ak sira sai abandonadu no moris ho hamlaha,

infidelidade sai buras no prátika relizioja menus.

“Maske sidade ne'e iha rikusion barak maibe ema kiak sira sai abandonadu no moris ho hamlaha, infidelidade sai buras no pratika relizioja sai menus, loron ba loron sai formalidade ida deit, mundu ida ne'ebé husi oin habosok ema ka falsu maibe subar hela realidade ida ne'ebe nakukun, triste, todan no kruel, honestidade ba konversaun, laran luak no mizerikórdia sai kuran”.

Na'i Maromak sei halo sira nabilan ho roman boot hodi hasai sira husi nakukun sala nian laos ho forsa liman kroat, kilat ka rikusion maibe ho haraik oan mane ida.

“Tanba ne'e profeta haklaken ba nia sidadaun sira katak Maromak sei loke orizonte foun ida ba sira, futuru ida ho esperansa no ksolok iha ne'ebé ho presaun no funu sei hetan bandu ba nafatin, Nai Maromak sei halo sira nabilan ho roman boot ida ne'ebe sei hasai sira husi nakukun sala nian ne'ebe hanehan no ida ne'e Na'i Maromak sei halo la'os ho forsa liman kroat nian laos ho kilat ka rikusoin maibe hodi haraik oan mane ida, mai ita para oituan hodi reflète imajen ida ne'e, Nai Maromak halo nabilan no roman maksoin liu husi karan ka dom oan mane ida”.

Santu Padre sublinha iha mundu tomak bainhira labarik ida moris mai ne'e sai hanesan momentu nabilan ho ksolok no sai dezeju ba ema hotu hodi hafoun an iha buat di'ak, atu fila fali ba pureza no simplesidade.

“Iha fatin hotu-hotu no iha mundu ne’e, lora labarik ne’ebe moris mak momentu ne’ebé nabilan ho ksolok no festa ne’ebé hamosu iha ema hotu-hotu, dejezu ka hakarak diak sira atu hafoun aan iha buat diak, atu fila fali ba pureza no simplesidade”.

“Iha bebe oan foin moris ida nia oin, ema nia fuan ne’ebé toos liu mos sei sai mamar no nakonu ho ternura, ema sira ne’ebé dezanimadu mos hetan fali esperansa, ema



sira ne’ebé rende ka hakiduk ona mos mehi fila fali no fiar iha possibilidade atu hetan moris ida ne’ebé di’ak liu tan”. Santu Padre hatutan.

Kosokoan ida nia frazilidade lori mensajen ne’ebé forte tebes, to’o ba ema sira ne’ebé fuan toos hodi lori fila fali propozitu ba sira hodi hetan armonia no hakmatek.

“Kosokoan ida nia frazilidade lori ho mensajen ida ne’ebé forti tebes, ne’ebé taka to’o ba ema sira ne’ebé fuan toos liu hotu, lori fila fali hakarak ka propóztu atu hetan armonia no hakmatek, maravillozu tebes buat ne’ebé akontese bainhira kosokoan ida moris”.

”Simplesmente roman oan ida ne’ebé hatudu ba ita roman ida boot liu tanba iha moris ne’e nia abut tomak ita hetan Na’i Maromak nia domin rohan laek, grasa, providénsia no nia kbi’it liafuan nian ne’ebé kria”.

Enkuantu, iha misa espanada ne’e partisipa husi makaer ukun sira, Bispu sira, padre no madre sira, no sarani katólíka timorense hamutuk rihun atus hitu limanu resin (750.000), peregrinu hirak ne’e mai hosi Dioseze Baukau, Maliana no Metropolitana de Díli inklui peregrinu balun hosi Kupang no Atambua (Indonésia), Austrália, Portural.

“Maske sidade ne’e iha rikusion barak maibe ema kiak sira sai abandonadu no moris ho hamlaha, infidelidade sai buras no pratika relizioja sai menus, lora ba lora sai formalidade ida deit, mundu ida ne’ebé husi oin habosok ema ka falsu maibe subar hela realidade ida ne’ebe nakukun, triste, todan no kruek, honestidade ba konversaun, laran luak no mizerikórdia sai kuran”.

“Iha bebe oan foin moris ida nia oin, ema nia fuan ne’ebé toos liu mos sei sai mamar no nakonu ho ternura, ema sira ne’ebé dezanimadu mos hetan fali esperansa, ema sira ne’ebé rende ka hakiduk ona mos mehi fila fali no fiar iha possibilidade atu hetan moris ida ne’ebé di’ak liu tan”.

3.6.2 Kaebauk & Belak ! Papa Francisco : Timor Furak & Buras Ho Labarik Sira



Imajem : Papa Francisco Prezide Misa Esplanada Iha Tasi-Tolu, Dili, Timor-Leste, 10 Setembru 2024



Timor-Leste sai realidade ne'ebé furak tanba iha labarik barak, nasaun ida ne'ebé nurak, ema bele sente moris, book an no nafunan sai domin boot ho prezensa foinsa'e no labarik sira kontinualmente hafoun energia, ksolok no entuziasmu povu nian.

Realidade ida ne'e sai furak iha Timor-Leste tanba iha labarik barak, imi mak nasaun nurak ida, iha fatin hotu-hotu ita bele sente moris ida ne'ebé book an no funan mak domin bo'ot ida, prezensa ema foinsa'e barak no labarik sira kontinualmente hafoun moris matak ka buras, energia, ksolok no entuziasmu.

Ne'e hatudu sinal ida tanba fô fatin ba sira ne'ebé ki'ik liu, simu no tau matan ba sira, halo ita an sai kiik iha Maromak nia futar oin no iha ema seluk nia oin, sira ne'e hotu prezizamente mak atitude ne'ebé halo ita nakloke ba Maromak nia asaun no halo ita an sai ki'ik, ita husik Nai Maromak kbi'it tomak Nai bele halo buat boot sira tuir nia domin hanesan Maria hanorin mai ita.

Ita venera Nossa Senhora nu'udar liurai feto nu'udar liurai ida nia inan, Jesus ne'ebé hakarak moris nu'udar kosokoan atu sai ita nia maun alin hodi konfia nia hahalok kbiit na'in ba resposta sim ne'ebé mai husi inan foinsa'e ida kbiit la'ek no kiak, Maria



komprende ida ne'e di'ak loos, to'o ba nia hili atu kontinua sai kiik nafatin iha nia moris tomak, loron ba loron sai kiik liu tan hodi servi no reza.

Maun alin, inan feton sira :

Mai ita keta tauk atu sai kiik iha Nai Maromak futar oin no iha ema seluk nia oin atu lakon ita nia moris, atu fó ita nia tempu no haree fila fali ita nia programa sira husik tiha buat ruma husi ita nia an atu maun alin ida ka inan feton ida bele sai diak liu tan no haksolok, mai ita keta tauk toba hodi mensiona fila fali ita nia projetu sira, se ida ne'e nesesáriu laos atu hamenus projetu sira ne'e maibe atu halo sira sai furak liu tan liu husi ita nia fó an rasik, hahalok simu ema seluk no inprevijilidade ne'ebé ita lori.

Buat sira ne'e hotu simbolizadu di'ak los liu hosi adornu ka futar rua ne'ebé furak tebes maka kaebauk no belak, buat rua ne'e hotu

halo husi osan folin boot signifika katak ne'e sasan importante.

Kaebauk simboliza karau dikur no loron matan nia roman no ida ne'e tau iha aas hafutar rentos, nune'e mos iha uma kakuluk tutun la'o tuir forma uma kakuluk nian, ida ne'e hatudu ba kbiit, enerjia no manas bele reprezenta kiit Nai Maromak nian ne'ebé fó moris maibe laos ida ne'e deit tanba ema koloka nia iha ulun no iha uma kakuluk tutun ida ne'e fo hanoin ita katak ho roman Nai Maromak nia liafuan no forsa husi ita nia grasa, ita mos bele servisu hamutuk iha planu boot salvasaun nian liu husi ita nia eskolla no asaun sira

Belak, ema tau iha hirus matan no nia kompleta kaebauk, nia fó hanoin ita kona-ba fulan be nabilan, kona-ba raikalan ne'ebe ho haraik aan reflète loron matan nia roman hodi falun buat hotu ho roman mihis, mamar ida futar ne'e signifikan paz, fertilidade no

laran maus ne'ebe simboliza inan ida nia ternura, inan ida ne'ebe ho nia domin delikadu tebes halo nabilan hotu ne'ebe nia kaer ho roman ne'ebe nia simu husi Nai Maromak.

Kaebauk no Belak, forsa no ternura husi aman no inan, nune'e mak Nai Maromak hatudu nia realidade ne'ebe halo ho karidade no mizerekordia, tanba ne'e iha eukarístia ida ne'e hamutuk ita ida-idak nu'udar maun no feton.

Igreza no sosiedade husu grasa no sabedoria atu bele reflète iha mundu roman ne'ebe forti no ternura husi Maromak domin na'in, Maromak ida ne'ebe hanesan ita hananu iha salmu resposorial, nia foti ema kbiit laek husi rai-rahun laran no hasai ema kiak husi kiak atu halo sira bele tuur iha ema boot sira leet iha nia povu.



“Mai ita keta tauk atu sai kiik iha Nai Maromak futar oin no iha ema seluk nia oin atu lakon ita nia moris, atu fó ita nia tempu no haree fila fali ita nia programa sira husik tiha buat ruma husi ita nia an atu maun alin ida ka inan feton ida bele sai diak liu tan no haksolok”

3.7 Papa Francisco Ko’alia Kona-Ba Lafaek, Kuidadu



Imajem : Amu Papa Francisco Iha Tasi-Tolu, Dili

SAPNewsTL : Papa Francisco hateten nia hadomi povu Timor-Leste, povu ne’ebé simples, familiar no ksolok tebes, Nia husu atu kuidadu ho lafaek sira ne’ebé atu estraga kultura armonia entre Timoroan sira.

Ligadu ho liafuan ne’ebé ko’alia kona-ba Lafaek, Papa Francisco define katak lafaek ne’e kona-ba ideia oioin ne’ebé mai hosi liur ka kultura foun ne’ebé mosu hodi estraga armonia no kultura moris nian.

“Bainhira ha’u ko’alia kona-ba lafaek sira, ha’u ko’alia kona-ba ideia sira ne’ebé bele mai hosi li’ur hodi estraga armonia ida ne’ebé povu Timor iha”. Hateten Santu Padre Papa Francisco.

Santu Padre ne’e husu Timoroan sira atu kuidadu ho lafaek sira no labele besik tanba bele tata no estraga kultura Timor nian.

“Imi iha mós lafaek sira, iha tasi-ibun sira be furak ne’e iha lafaek barak iha laran, sira nani hakmatek mai tasi-ibun, kuidadu ho lafaek sira tanba bainhira sira tata sei la namkore, imi kuidadu ho lafaek sira ne’e tanba lafaek sira ne’e sei mai han buat hotu no han mós imi nia kultura, imi sei kuidadu

imi nia an atu labele besik ba lafaek sira ne’e”.

Francisco husu ba sarani sira hodi mantein sira nia fiar no istória, tau matan ba joven sira no ferik katuas sira hodi hakat hamutuk ba oin ho esperansa.

“Mantein imi nia kultura no istória, mantein imi nia fiar, ha’u dezeja ba imi atu iha paz, oan barak, hamanasa barak, tau matan ba joven sira tanba sira mak futuru no tau matan ba ferik katuas sira tanba sira mak memoria, obrigadu ba imi nia fiar no domin, imi sei la’o nafatin ba oin ho esperansa”. Tenik Papa Francisco iha Tasi-Tolu, 10/09/2024.

Xefe Estadu Sante Sé ne’e deklara nia vizita Timor-Leste tanba ninia povu ho nia joven sira, buat ne’ebé diak no furak liu iha Timor-Leste mak ninia povu sira.

“Ha’u hanoin hela katak mai iha Timor ne’e buat ne’ebé furak liu la’os tanba ninia sândalu ka buat seluk, maibé uluk knana’in tanba nia povu”.

“Buat ne’ebé diak liu husi povu ida ne’e maka ninia foinsa’e sira, povu ida ne’ebé iha joven sira, povu ne’e iha futuru”.

Santu Padre dehan nia laran monu ona ba povu Timor-Leste, povu ne’ebé simples, familiar no ksolok tebes. “Timor-Leste iha kultura ne’ebé simples, familiar no ksolok ne’ebé sai kultura moris nian, iha oan barak no barak teb-tebes. Ha’u sei hatete tan buat ida, ha’u nia laran monu ba Timor-Leste, ha’u hadomi Povu Timor-Leste, fo ha’u nia komprimentus ba povu Timor.” dehan Santu Padre.

3.8 Lider Mundial Igreja Katólíka Ko’alia Ho Juventude Timorense

Francisco : Jovens Tenki Iha Mehi, Halo Barullu & Foti Responsabilidade



Imagem : Santu Padre Papa Francisco iha Centro Convenções de Dili (CCD), 11/09/2024. Foto : Marcela Mery da Costa

SAPNewsTL : Sua Santidade Papa Francisco dezeja juventude Katólíka Timoroan atu bele konkretiza valores fraternidade sai maun alin, dezeña ninia mehi, hatene halo barullu no foti responsabilidade hodi serví Timor-Leste.

Iha diskursu Santu Padre hateten, valor ida ne’ebe mak imi tenke hatene liu tan mak fraternidade umana sai konseitu importante iha foinsa’e sira nia fuan, hodi kontinua halo barullu barak maibé tenki determina ho konseitu respeita, rona no tau matan ba ema hotu-hotu hanesan umanu.

“Joven sira gosta hakilar halo barullu hanesan imi ohin hakilar halo barullu. Ha’u agradese ba sira ne’ebe mak fô sasin ba sira nia pergunta, maibe konseitu ida ne’ebé importante liu maka fraternidade, sai maun alin laos sai inimigu ba malu.” Hateten Sua Santidade Papa Fransisco, iha Sentru Konvensaun Dili (CCD sigla Portugues), Quarta, (11/09/2024).

Lider masimu igreja katolika mundial ne’e fô agradese ba joventude sira ne’ebé mak

hatudu dansa, tanba dansa ne’e esprime sentidu tomak ba ema nia isin no ema nia sentimentu, imi koñese joven ruma ne’ebe mak la hetene dansa, imi rai ida ne’ebé mak nakonu ho joven, tanba pontu importante ida ne’ebé ohin hato’o ba bispu sira mak oin midar no hamansa.

“Ha’u agradese ba joventude sira, buat ida ne’ebé ohin dader ha’u hateten ba bispu ida katak buat ne’ebé mak ha’u nunca haluha mak imi ninia hamanasa midar (smile), nu’udar joven labele para hodi hamanasa midar, imi maka maioria iha povu Timor, halo rai ida ne’e nakonu ho ksolok no esperansa, imi labele lakon entusiasmu fiar nian, imajina joven ida mak fiar la iha oin naruk hanesan kuda”.

Papa Francisco fundamenta, papel nu’udar joventude obrigatoriamente tenki hatene saida mak halo ema ida oin nakraik no triste, joven tenke kuidaду aan tanba iha ema barak sei mai hodi fa’an felisidade ba ema hotu-hotu.

“Ita sira ne’ebé fa’an fali felisidade hanesan droga ne’ebé mak fô ba imi felisidade ne’ebe mak dura iha horas balun nia laran, ha’u dezeja ba imi atu la’o ba oin ho alegria, foinsa’e sira nian maibe imi labele haluha imi mak liman rohan husi sira ne’ebe mak hari’i nasaun ida ne’e tanba ne’e la bele lakon memoria sira ne’ebe uluk ona ho sakrifisiu barak hodi hari’i nasaun ida ne’e”.

Sua Santidade Papa Francisco hatutan, pontu importante rua ne’ebe sai eskollidu ba nia, hodi halo movimentu durante loron tolu (3)

iha kapital Díli, mak hamansa midar ne’ebe foinsa’e sira kria no povu ida ne’ebé mak hatene hatudu hamnasa ba ema hotu-hotu, signifika povu ida ne’ebe hatene hadomi.



Imajem : Santu Padre bensa ba juventude Timor-Leste iha Sentru Konvensaun Dili, 11/09/2024

“Iha buat rua (2) ne’ebe mak toka liu ha’u nia fuan bainhira ha’u la’o iha Díli, ne’e mak juventude sira no hamnasa midar, imi povu ida ne’ebé mak hatene hamnasa midar no joven sira tenke hatene mehi, saida mak ita bele halo atu ita bele mehi, ha’u konvida imi atu mehi ba buat boot iha moris, joven ida ne’ebé la hatene mehi nia hanesan ho ema ne’ebe mak reforma ona iha moris, joven sira tenke hatene halo barullu atu hatudu katak moris mak ne’e”.

Santu Padre salienta, joven sira iha moris ne’e, imi to’o ona iha dalan klaran, entre moris labarik nian no ema katuas sira nian no imi hatene saida mak rikusoin ida furak liu iha sosiedade nia laran ne’e mak katuas no ferik tanba sira mak fó matenek ka sabedoria ba joventude sira.

“Ema katuas ferik sira husik sira nia fatin no historia ba foinsa’e sira, iha sosiedade ida nia osan mean mak labarik, ferik no katuas sira, tanba ne’e iha sosiedade ida nia laran mak labarik barak tenke kuida sira ho didiak

no iha katuas ferik sira ne’ebé mak mesak memoria sosiedade nian tanba ne’e imi respeita no tau matan ba sira” Dehan Papa Francisco.

Osan mean ne’ebé iha sosiedade mak labarik, ferik no katuas sira tanba ne’e favor kuidadu sira, Iha imi nia paz, imi lori istoria ida ne’ebé marka ho terus bo’ot maibé mos ho ezemplu furak tebes fiar nian kona-ba martíriu liu-liu kona-ba rekonsiliaaun ida ne’e rekomenda ba foinsa’e sira hotu ba futuro ne’e maka liberdade, komprimisiu no fraternidade.

Lider masimu igreja katolika mundial afirma, pontu primeiru kona ba liberdade nian ne’e mak ukun rasik aan ne’e katak kapasidade atu moris independente, foinsa’e ida ne’ebé mak la hatene ukun nia aan ne’e saida mak ne’e? ema ne’ebé mak la hatene ukun nia aan nia ne’e atan ida.

“Joven ne’ebé hadomi ema seluk no hamutuk ho ema seluk, atu hadomi ho responsabilidade ne’e joven ida ne’ebé hadomi nia rain. Foinsa’e ida tenke hatene katak liberdade la signifika halo saida deit tuir nia hakarak maibé indika ba joven atu iha responsabilidade ne’ebé signifika hatene tau matan ba ita nia uma komum tanba ne’e joven ida tenke iha komprimisiu ba nia aan, iha provérbu ida dehan iha tempu difisil bele haforsa ema”.

“Mehi boot iha moris, joven ida ne’ebé la hatene mehi nia hanesan ho ema ne’ebe mak reforma ona iha moris, joven sira tenke hatene halo barullu atu hatudu katak moris mak ne’e”.



Entretantu, Sua Santidade Papa Fransisco enkoraja joventude sira atu hadomi no respeita ema ferik no katuas sira tamba sira mak fo sabedoria ba joventude sira, maske

ema bele ideia ne'ebe mak la hanesan, relijiaun ne'ebe mak la hanesan maibe respeita malu, mak sai sasukat ba ema atu bele hatene diferensia sira no hatene moris hamutuk ho ema seluk iha diferensia nia laran, nune'e joventude tenki tane as valor fraternidade sai maun alin laos sai inimigu.

Juventude sira ne'ebé partisipa iha enkontru ho Papa Francisco ne'e mai hosi Dioseze Baukau, Maliala no Dioseze Metropolitana de Dili hamutuk rihun tolu (3.000) inklui foinsa'e sira hosi relijiaun Musulmanu, Protestante, Adventista no seluk tan.

3.9 Molok Husik Hela Timor-Leste ! Favor, Tau Matan Ba Povu Diak Ne'e



Imajem : Domingas dos Santos

SAPNewsTL : Hafoin enkontru ho juventude timoroan iha Sentru Konvensaun Dili, Santu Padre Papa Francisco kontinua hala'o viagem ba Aeroportu Internasionál Nicolau lobato Comoro, iha dalan sarani sira forma naruk hodi komprimenta no simu bensaun hosi Amu Papa.

Molok husik hela Timor-Leste, momentu ne'ebé Prezidente Repúblika José Ramos Horta no Primeiru Ministru Kayrala Xanana Gusmão akompanha Papa Francisco iha Aeroportu Nicolau Lobato, sira simu bensaun no mensajem save husi Sua

Santidade katak ukun na'in sira favor kuidadu no tau matan ba povu di'ak ida ne'e.

“Ha'u rasik akompanha Amu Papa to'o nia sa'e ba aviaun laran, nia mak dada ha'u nia liman to'o aviaun, nia hakarak hateten deit liafuan rua ba ha'u, Amu Papa ema Argentina, ami rua ko'alia lian español dehan nune'e, 'Cuidem Bien Este Pueblo Marivolhoso' signifika hateten ba lider sira 'imi tau matan didiak ba povu di'ak ida ne'e', ne'e mak liafuan Amu Papa nian”.

Tuir mai, Santu Padre dehan ba Prezidente Repúblika katak hafoin sai Papa nunka akontese resesaun ida ne'ebé Timoroan sira halo no hatudu ba nia iha vizita durante loron tolu iha Timor-Leste.

“Hafoin, Santu Padre hateten tan 'nunka ha'u simu resesaun ida di'ak nune'e', la'os deit tanba ema barak no populasaun kuaze metade ne'ebé partisipa maibé tanba hanesan sentimentu ne'ebé nia haree, ita

konsege halo vizita ne'e diak teb-tebes, comunidade internasionál apresia no apoia ita”.



Sarani sira ne'ebé forma iha dalan ninin hahú hosi Sentru Konvensaun Dili to'o Aeroportu Comoro, wainhira Papa Francisco ho karreta liu, sarani sira haklalak hodi dehan “Papa Francisco, Viva Viva El Papa, Boa Viajem Papa”, Santu Padre foti liman

ho oin midar no hamanasa hodi fo bensaun ba sarani sira.

Iha tempu hanesan, sarani barak hamonu matan-ween haree Papa Francisco hakat liu no husik hela Timor-Leste, sarani Domingas dos Santos hosi Atauro ne'ebé hetan entrevista hosi SAPNews dehan “Ha'u nia sentimentu ne'e labele espresa hosi liafuan, so matan ween mak fo sasin ba sentimentu ne'e, konsiente katak momentu kmanek ne'e sei la repete tan iha moris ne'e, ha'u nia fuan hakmatek no ksolok haree Amu Papa nia oin”.

Iha Aeroportu internasionál, Xanana Gusmão ne'ebé akompanha direta mós hamonu matan-been, wainhira Santu Padre hakat ba aviaun laran no kontinua nia vizita ba Singapura, molok fila hikas ba Vatikanu.



“Iha sosiedade ida nia osan mean mak labarik, ferik no katuas sira, tanba ne'e iha sosiedade ida nia laran mak labarik barak tenke kuida sira ho didiak no iha katuas ferik sira ne'ebé mak mesak memoria sosiedade nian tanba ne'e imi respeita no tau matan ba sira” Dehan Papa Francisco.

Amu Papa ema Argentina, ami rua ko'alia lian español dehan nune'e, ‘Cuidem Bien Este Pueblo Marivolphoso’ signifika hateten ba lider sira ‘imi tau matan didiak ba povu di'ak ida ne'e’, ne'e mak liafuan ikus Amu Papa nian”.

KAPÍTULU IV

4 Espresaun Gratidaun Hosi Povu Timor-Leste

4.1 Virgílio Cardeal : Papa Francisco Hakfodak Ho Sarani Nia Fiar & Domin



Dom Virgílio Cardeal do Carmo da Silva

SAPNewsTL : Dom Virgílio Cardeal do Carmo da Silva ho laran ksolok fo agradese ba povu Timor-Leste, Cardeal haktuir Papa Francisco hakfodak ho fiar no domin ne'ebé povu Timor Lorosa'e hatudu iha mundu nia matan.

“Ita hotu haree bainhira Aviaun semo tun ita hotu mai hein ho kontente, bainhira aviaun semo, barak mak matan-ween monu”. Loron tolu ida ne'e sai hanesan festa boot ida ba povu no igreja Timor.

Desde Amu Papa to'o la haree Timoroan sira nia kolen, hamlaha no hamrok, estrada nakonu nafatin, “Amu Papa molok ba Tasi-Tolu nia hasoru ha'u hodi dehan 'Ha'u admira teb-tebes no hakfodak haree povu no sarani ida ne'e nia fiar' kleur ona Amu Papa rona kona-ba Timor no sarani Timor, ita sempre dehan sarani hadomi Amu Papa”.

Iha loron tolu ne'e Amu Papa sente duni Timor nia domin boot oinsa ba uma kreda no Amu Papa. Ema hotu partisipa no haree buat ne'ebe akontese bele dehan katak

momentu ida ne'e timoroan hotu sente kontente.

“Lori Konferénsia Episcopal Timorens, Bispu, Amu-lulik dioseze tolu nian naran, relizioju no relizioja sira, katekista no povu Timor sira hotu agradese tanba Maromak fó ona oportunidade ne'e mai ita hodi esperiensi enkontru boot ida ne'e iha ita nia rai”.

Agradese ba Primeiru Ministru ho governante sira hotu, Parlamentu Nasional, Polítiku sira, Seguransa FALINTIL Forsa Defeza Timor-Leste (F-FDTL) no Polísia Nasionál Timor-Leste (PNTL) no ba ema hotu ne'ebé servisu hamutuk hodi realiza eventu boot ida ne'e ho susesu no kapas loos.

“Ida ne'ebe aas liu no boot liu hotu hakarak lori Amu Papa nia naran no ema hotu nia naran agradese ba povu Timor no sarani Katólíka Timor. Tasi-Tolu horseik halo mundu hakfodak hodi dehan ema rihun atus hitu, rihun atus neen maibe atu dehan deit katak povu no sarani Timor iha ne'ebá hodi haree no hatudu ita nia fiar. Mundu liu hosi media dehan katak metade hosi populasau Timor mai tuir hotu misa”.

Iha oportunidade ida ne'e hodi Amu Papa, Igreja no governu nia naran hakarak agradese liu-liu ba povu Timor, hosi kiikoan to'o boot, katuas, ferik to'o joven, agradese ba ema hotu-hotu tanba durante loron tolu nia laran ema hotu kolabora masimu no buat hotu la'o ho diak.

Ema rihun ba rihun ne'ebe halibur hamutuk iha Tasi-Tolu, hafoin misa remata bainhira fila ba idak-idak nia uma, akonpaña liu hosi media haree kapas no hakmatek, hanesan ho “Ita nia tema vizita Amu Papa ninian katak ita nia fiar ne'e komesa hatoman aan no ita nia fiar hanorin ita atu hadomi malu, kaer liman hodi la'o hamutuk”.

Hafoin Amu Papa nia vizita sai konvite foun ida ba Timoroan sira hotu hodi kaer liman hamutuk hanesan Amu Papa fo mensajen rua ne'ebé nia husik ba joven sira katak “joven sira tenke haksolok nafatin hodi halo barullu, barullu ida ne'ebé diak, nune'e haksolok nafatin iha kanta, joga no halo buat

ne'ebé diak hodi haksolok nafatin”, ikus ne'ebe maka impotante liu mak “respeita”, repeita ema kiikoan no katuas sira. “Labarik kiik sai futuru nasaun nian no katuas ho ferik sira sai sabedoria ka matenek ba kiik no foinsa'e sira”, ne'e mak mensajen ne'ebé Amu Papa husik hela mai ita nia rai no povu Timor.

“Amu Papa fila ona maibe nia husik hela memoria lubuk ida iha ita nia fuan, la'os deit loron manas, hamlaha no hamrok ne'ebe ita sente, ida ne'e sei kuda metin iha ita nia fuan, buat ne'ebe ita rona no sente durante loron tolu nia laran”.

4.2 Expresaun Representante Sante Sé Monsenhor Marco Sprizzi

4.2.1 Timor Riku Ho Ninia Povu Sira



Imagem : Monsenhor Marco Sprizzi

SAPNewsTL : Hafoin vizita Amu Papa Francisco iha Timor-Leste, Representante Santa Sé Monsenhor Marco Sprizzi gratidaun no agradese ba Maromak tanba durante loron tolu buat hotu la'o ho diak no hatudu identidade Timor nian furak ba mundu.

“Ita hotu ho ksolok bo'ot agradese ba Maromak ba Santu Padre nia vizita no satisfasaun bo'ot, haksolok hato'o agradesimentu ba governu Timor-Leste ne'ebe fasilita visita Santu Padre ba povu

Timor- Leste. Santu Padre repete dala barak katak Timor ne'e riku ho nia povu”. Sita Representante Santa Sé Monsenhor Marco Sprizzi iha Aeroportu Internasionál Nicolau Lobato Comoro, 11/09/2024.

Santa Sé mós agradese tebes ba Prezidente Konferénsia Episkopál Timorense (CET) Dom Norberto do Amaral, Dom Virgilio Kardeál do Carmom da Silva, Dom Leandro Maria Alves Bispu Dioseze Baucau, no Timoroan tomak.

“Bainhira iha eventu boot hanesan ne'e, dalaruma buat hotu bele sai la perfeitu, maibé ita agradese ba Maromak tanba buat hotu la'o di'ak, selebrasaun ida ba povu, ema simples, labarik, joven, ema moras, ferik no katuas sira hodi hamutuk ho Santo Padre”.

Monsenhor Marco Sprizzi fo deskulpa ba públiku ligadu ho insatisfatóriu balun ne'ebe

mosu durante loron tolu nia laran, wainhira Santu Padre estadia iha Timor-Leste.

“Ha'u husu de'it deskulpa hodi Santu Padre nia naran, karik buat ruma la la'o di'ak hosi

ami nia parte, no dalaruma ami rona katak povu hakarak Santu Padre atu halo viajen ne'e la'o neneik liután, maibé dalaruma nia tenke jere ejijénsia husi inseguransa Santo Padre nia saúde”.

4.2.2 Ita Tenki Manan Ita Nia Egoismu, Hari'i Futuru Naroman



Imajem : Entrevista Representante Papa Francisco iha Timor-Leste, Monsenhor Marco Sprizzi iha Nunsiatua Motaél, 04/02/2025

SAPNewsTL : Representante Papa Francisco iha Timor-Leste, Monsenhor Marco Sprizzi konsidera rikusoin lolos Timor nian maka ninia povu, tan ne'e presiza tau matan didiak, lorloron moris furak no riku ho valór sira evanjellu nian liuliu dame, rekonsiliasaun, domin, respeito, unidade, solidariedade no serbisu hamutuk ba bem estar komun.

1. Oinsa ita nia hanoin kona-ba “Atu imi nia fiar sai, imi nia kultura” ?

Monsenhor : Ha'u-nia pontu de vista imi-nia fiar mak imi-nia kultura, lema ida-ne'ebé di'ak tebes, katak fiar sarani povu timoroan nian laiha opozisaun, laiha kontráriu ho kultura povu Timor nian, iha ligasaun no armonia barak entre kultura timoroan no fiar katólíka, entaun lorloron moris furak no riku

ho valór sira evanjellu nian liuliu dame, rekonsiliasaun, domin, respeito, unidade, solidariedade no serbisu hamutuk ba bem estar komun sai kultura povu nian.

Tema vizita “Atu imi nia fiar sai imi nia kultura”, ne'e iha tinan 2020, wainhira iha vizita “Ad Limina” hosi Conferénsia Episkopál Timorense (CET) iha Vatikanu, Papa Francisco dehan katak “que a vossa fé, seja a vossa cultura”. Dom Basilio do Nascimento lembra ona liafuan ne'e, wainhira halo enkontru no apresenta proposta ba vizita, ami konkorda ho bispu sira katak, timoroan sira-nia moris tenke orienta hosi fiar sarani, sira-nia kultura rasik no hetan naroman nafatin hosi fiar.

2. Oinsa Amu Papa Francisco ninia sentimentu iha loron 09-11 Setembru 2024 ?

Monsenhor : Amu-Papa nia sentimentu ida ho entuziazmu no ksolok boot tebes, hamnasa iha tempu tomak, maski iha programa ida ne'ebé maka'as no ativu tebes. Amu Papa super kontente no hakfodak haree labarik, jovens, adultu, ferik no katuas sira iha dalan ninin, hanesan nia komenta dala barak katak nia laran monu ba povu Timor.

3. Iha Misa Esplanada Tasi-Tolu, Papa Francisco husu kuidadu lafaek sira, katak sa ?



Monsenhor : Amu Papa iha tempu ne'ebá la uza testu eskrita omolia nian, ita dehan inventa ka kria iha momentu ne'ebá, loron ida antes ami iha Nunsiatúra Apostólíka Motael, ami tur iha meza nia gosta ami ko'alia kona-ba lafaek. Iha Timór nia nunka hatene katak iha lafaek sira.

Normalmente, ema hotu hanoin kona-ba lagoa sira, mota sira no bee-moos, tanba ne'e nia sente impresionadu ho sira nia prezensa no mós ho relasaun ne'ebé kultura Timor nian iha ho lafaek sira. Ita haree ona lafaek sira iha ne'e, maibé iha tempu hanesan ita hatene katak lafaek sira ne'e perigu.

Dala ruma nia halo piada ida-ne'e, maibé ha'u ladún hatene, kuidadu ho krokodilu sira ne'ebé iha li'ur, katak dalaruma sira hakarak lori no modifika, lahó respeitu tomak ba kultura lokál, tradisaun no valór sira hosi kultura timoroan nian.

Nia la hanoin kona-ba entidade partikulár ida, nia la akuza ema ida, nia la fó atensaun ba ONG sira, instituisaun estranjeiru ida. Papa hanoin kona-ba mentalidade, kultura no ideia seluk mai hosi rai-liur ne'ebé sein respeita klean kultura lokal, sira hakarak impoin buat hirak ne'e ho forsa finanseiru nian no arrogansia poder ekonmiku nian. Nune'e, Amu Papa dehan, kuidadu, imi defende ita nia kultura.

4. *Papa Francisco dehan jovens halo barullu, respeita ferik no katuas sira, dehan tan ba Presidente República José Ramos Horta katak 'cuidem bien este pueblo maravilhoso', oinsa ho sentidu hosi liafuan ne'e ?*

Monsenhor : Bainhira Amu-Papa to'o Timor, Papa dehan katak rikusoin boot liu Timór Lorosa'e nian maka ninia povu, rikusoin la'ós de'it petróleu, gás no aikameli. Povu timoroan mak rikusoin lolos ba Timor. Ita sei laiha independénsia, dignidade, liberdade no democracia, wainhira ita la hetan forsa hosi povu. Metade husi populasaun ne'ebé ita-boot temi sei la iha dalan-dalan, se karik povu Timor la riku hanesan ne'e iha nia kلامar no isin.

Nune'e, Amu Papa hateten ba polítiku sira atu tau matan ba ema sira ne'e, labele despreza povu no labele trata aat povu. Korupsaun mos dalaruma mosu halo povu lakon esperansa, kuandu ida ne'e akontese ne'e bele fo desprezu povu, entaun ita hotu, igreja, politiku, empresáriu, negociante no jornalista sira, tenki tau matan ba ema furak sira ne'e (cuidem bien este pueblo maravilhoso).

Nune'e mós, foinsa'e sira halo barullu signifika mantein sira nia enerjia, sira nia mehi, sira nia forsa atu mehi kona-ba futuro no hari'i futuro ida. Labele barullu ho maneira halo problema ka kria konflitu, maibe hamutuk ko'alia ba malu, relasaun diak no hamosu ideia inovativu, kreativu no produtivu. Kria relasaun diak ida ho ferik-katuas sira, tanba katuas-ferik sira iha matenek barak iha pasadu, wainhira ita laiha memória, laiha futuro.

5. *Papa Francisco temi Perfuma evanjellu bele transforma injustisa, korupsiun no realidade nakukun sira ?*

Monsenhor : Liafuan sira ne'e importante, Amu Papa uza ida ne'e imajen perfume evanjellu nian katak ida ne'e rai morin ida. Aroma ho morin tradisionál ai-kameli nian maibé mós aroma ho ai-funan sira, aroma ho natureza furak ida-ne'e no aroma evanjellu nian, hanesan Papa João Paulo II uza liafuan “imi roman no masin ba mundu”, atu hatete katak evanjellu maka anúnsiu Kristu nian, liafuan sira kona-ba rekonsiliaaun, perdaun no kuidadu ema kiak sira, kbiit laek, ema moras no ferik-katuas sira.

Liafuan hirak ne'e hotu tenke orienta asaun igreja nian. Igreja labele sai igreja ema riku nian ka igreja poder nian. Padre sira presiza hakbesik an, hamutuk no haree povu iha area rural. Nune'e, igreja iha dalan atu hakbesik ba povu no orienta sira tuir evanjellu. Ida-ne'e sempre dalan ne'ebé labele sai realidade dala ida de'it.

Jesus Kristu la hela iha palásiu ho riku sira, maibe Jesus sempre la'o iha dalan no hamutuk ho ema ki'ak sira iha Palestina no Israel hodi guia povu iha ksolok sagrada eskritura no evanjellu nian, ne'e mak ita presiza banati tuir.

6. *Oinsa ho observaun kona-ba realidade “Atu imi nia fiar, sai imi kultura” ?*

Monsenhor : Rona, ha'u nia amigu, ida ne'e sempre sai dalan la'os sai realidade dala ida ba nafatin, ha'u nia observaun di'ak, nafatin entuziazmu no ksolok hosi

Amu-Papa nia vizita. Agora ita presiza kontinua Amu-Papa nia liafuan sira, joven sira-nia entuziazmu hosi família hotu-hotu atu kontinua iha dalan ida-ne'e hodi atualiza evanjellu, Maromak nia liafuan iha moris lorloron nian liuliu iha joven sira-nia leet, ita mós presiza hamutuk, ezemplu mak inisiativa sira SAPNews nian ne'ebé la'o hamutuk ona. hamutuk iha fiar no kolaborasaun sosiál ba tempu naruk.



Ha'u hatene dezafiu no obstákulu barak atu imi nia fiar sai imi nia kultura, dejafiu prinsipal ne'e iha ita ida-idak nia laran, ita hotu sala na'in (somos pecadores). Nune'e dezafiu prinsipál sira maka oinsa bele ultrapasa no manan ita-nia egoíзму, ita-nia hakarak manan no sai diak liu atu sai nafatin iha ema seluk nia leten. Ita tenki kombate no batalla hasoru ita nia an rasik.

Depois iha mós dezafiu sira hanesan falta kondisaun sosiál adekuada, falta empregue, falta tratamentu sosiál ne'ebé justu ba ema hotu, balun sai privilejiadu no balun sai marzinaliadu, ita hotu so bele lamenta.

Buat hirak ne'e hotu la'ós obstákulu, maibé ezemplu diak ne'ebé SAPNews hatudu, ita boot sira iha vontade no sinergia halo ita boot sira ninia obra no empenhu servisu diak ba públiku liu hosi fahe informasaun, haklaken Maromak nia lian no povu nia lian.

7. Saida mak ita presiza halo hodi hari'i futuru ne'ebé diak liu ba jersaun foun sira ?

Monsenhor : Jovens tenki hamutuk kria kondisaun pozitiva, oinsa dezanvolve agrikultura, ekonomia, turismu, sosial, kria kampu servisu, jornalismu no buat hotu neebé konsidera diak ba sosiedade ida ne'e liu hosi hamutuk ho foinsa'e sira no ema ho vontade di'ak, ema sira ne'ebé fiar duni iha valór sarani no umanu.

Luta hasoru prátika neopotizmu, injustisa no korrupsaun. Buat hotu kona-ba halo hamutuk no fó ezemplu di'ak no buat di'ak sira, tanba di'ak ne'e hada'et, di'ak da'et ba ema hotu, nune'e dezafia an no manán hasoru buat aat iha Timor-Leste.

8. Ita nia mensajem ida ba povu Timor-Leste ?

Monsenhor : Ha'u nia lia menon mak kontinua fiar no fiar iha Maromak nia bensaun. Sinseramente, ha'u fiar ho laran tomak katak Timor nu'udar povu ida ne'ebé espesiál, povu ida ne'ebé Maromak hili no povu ida ne'ebé maioria katóliku, nune'e kontinua iha fiar no amizade ho Maromak, halo barullu no hari'i sosiedade ida inkluzivu no fiar metin iha Maromak.

Ba joven sira, keta laran taridu. Ha'u komprende katak dalaruma imi iha difikuldade, maibe keta lakon optimismu ba futuru, karik ita nia jersaun tuan sira ne'e dezanima tiha ona, wainhira sira iha okupasaun invazaun nia okos, sira sei la manan, luta ida ne'ebe kuaze imposivel maibé sira konsege manan ukun rasik an. Se ita boot sira nunka rende, iha fiar, forsa no kontinua luta iha dezafiu oin-oin maka imi sei sai ema ne'ebé diak no susesu, labele halai ba buka buat ne'ebe fasil liu, fiar katak iha Timor imi bele hari'i imi nia futuru.

9. Mensajem Monsenhor ba SAPNews ne'ebé produz revista vizita Papa Francisco ?

Monsenhor : Sim, ha'u lahatene SAPNews, ha'u koñese ita-boot iha loron hirak ikus ne'e, wainhira ita-boot kontaktu ha'u, ha'u apresia tebes ita-boot sira nia mehi, ita-boot nia projetu no realizasaun sira. Ha'u haree katak ita-boot halo hela buat sira impériu (proprietáriu úniku), kompeténsia no enkorajamentu.



Agora, halo tinan tolu ona, ha'u enkoraja ita atu kontinua liután ho profesionalismu, atensaun, halo sasan ho didiak ho ksolok, hatudu kompetensia teknika profesional ho entuziasmu nu'udar joven laos atu iha kompetisaun interna, imi labele kria divizaun internal, maibé kria comunidade, unidade no kuidadu malu ho domin.

Espera bele remata revista furak no istóriku ne'e, ha'u dezeja susesu barak atu bele habelar ho furak no gosta husi ema hotu, pelumenus husi metade populasaun 700.000, sira bele lee, gosta no halo tuir revista ida ne'e, posivel to'o millaun ida, Parabéns ba Timor-Leste.

4.3 Expressaun Primeiru Ministru Timor-Leste, Kayrala Xanana Gusmão

4.3.1 Xanana Apresia Juventude, Fraternidade Umana Sai Realidade



Imagem : Primeiru Ministru Kayrala Xanana Gusmão hamutuk Bispu sira iha Palásiu Governu Dili, 11/09/2024. Foto : Média PM

SAPNewsTL : Governu no Igreja Katólíka agradese ba povu Timor-Leste tanba partisipa máskimu iha eventu nasionál vizita Sua Santidade Papa Francisco ho paz no hatudu imajem diak iha comunidade internasionál nia matan.

Hafoin Papa Francisco fila hikas husi Timor-Leste hodi kontinua vizita apostólíka ba nasaun Singapura, lider maksimu igreja katólíka hala’o enkontru ho Primeiru-Ministru (PM), Kay Rala Xanana Gusmão hodi parabeniza povu tomak ne’ebe kontribui ambiente hakmatek, harmonia no estabilidade durante loron tolu hodi fó susesu bá vizita Sua Santidade Papa Francisco iha Timor-Leste.

“Sira mai hasoru-malu ho Governu, la’ós atu agradese malu maibé hamutuk felisita tanba

ho servisu hamutuk mak sai susesu bo’ot ida. Ita atu felisita karik felisita povu ne’ebé ho laran tomak to’o iha Dili, desde tersa kalan tomak aguenta iha Tasi-Tolu”.

“Ha’u felisita liu mak joven sira tanba sira-nia komportamentu di’ak teb-tebes, hatudu katak Timoroan sira bele kria nafatin armonia, laiha violénsia, hatudu domin hodi fraternidade umana bele sai realidade iha itania rain, ita hatudu ba mundu katak Timor-Leste nasaun ne’ebé metin iha paz, sivilizadu no estabilidade”. Hateten Primeiru Ministru Kayrala Xanana Gusmão iha Palásiu Governu, 11/09/2024.

Xanana Gusmão sekunda Santu Padre nia liafuan katak “Joven tenki kuidadu ho lafaek sira katak labele lori organizaun sira hodi haketak ka fahe malu, hamutuk kria paz no estabilidade hodi haree rai no povu ne’e ba oin tanba buat ne’ebé furak liu no di’ak liu maka ninia emar sira”.





Wainhira Santu Padre to'o hikis Aeroportu Nicolau Lobato, Xanana Gusmão akompanha hodi fo fatin ba Timoroan sira hodi simu no hetan bensaun hosi Papa Francisco liu hosi kaer liman, fo adeus, fahe tersu no fo bensaun.

Molok Sua Pontífise sai sa'e ba Aviaun Aero Dili, Primeiru Ministru Kayrala Xanana Gusmão foti nia liman ba hirus matan, laran triste no matan-ween turuk husi nia matan, la'o neineik no hakat ain husik hela Santu Padre nia liman

Iha fatin hanesan, Arsebispu Arkedioseze Dili, Dom Virgílio Kardeál do Carmo da Silva, SDB akresenta hasoru malu ho parte Governu hakarak fahe ksolok bá malu tanba durante eventu vizita Papa Fransisco bele kolabora hamutuk hodi fó susesu ba eventu nasionál refere.

“Ksolok ne'ebé ita hetan loron hirak ne'e tanba povu no joven ninia maturidade. Ema hotu-hotu hosi ki'ik to'o bo'ot, buat furak ne'e mundu haree tanba esforsu ema hotu-hotu nian. Tanba ne'e Governu ho Igreja hakarak felisita sarani Timor tomak. Hanesan Amu Papa dehan, igreja mak povu, nasaun mak povu ne'ebé tane a'as povu,” Dom Virgílio dehan.

Povu ne'ebé hatudu nia maturidade, servisu makaas, terus hamutuk iha loron manas nia laran durante loron tolu, ulun bo'ot kreda Timor ne'e konsidera hanesan aktu ida kompaixaun sarani nian liu hosi sira nia unidade ho Ierarkia Igreja Universál.

Ententantu, iha sorumuru ne'e partisipa husi Primeiru-Ministru Kay Rala Xanana Gusmão, Arsebispu Metropolitana de Dili, Dom Virgilio Cardeal do Carmo, Bispu Dioseze Baucau Dom Leandro Maria Alves, Bispu Dioseze Maliana Dom Norberto do Amaral no representante Santa-Se iha Timor-Leste Marco Sprizzi.

4.3.2 PM Xanana Apresia Kobertura Mídia Iha Vizita Papa Francisco & António Guterres



Imajem : Primeiru Ministru Kayrala Xanana Gusmão hamutuk ho Lideransa Midia Nasional no Parseiru sira ne'ebe halo kobertura ba Santu Padre Papa Francisco iha Salaun Laline Larigutu CNE Dili, 05/10/2024. Foto : Marciana da Conceição

SAPNewsTL : Primeiru-Ministru (PM) Kay Rala Xanana Gusmão enkoraja média nasionál no jornalista sira, atu bele esforsu an nafatin aumenta kbiit analiza kritika, bainhira halo produsaun ba notisia edukativa, informativa hodi bele influensia sosiedade nia komportamentu.

Xefi Governu informa, Imprensa laos deit atu fó informasaun maibé, imprensa buka kria, hametin hanoin hodi influensia sosiedade bele hadia sira nia komportamentu nu'udar sidadaun ida ne'ebe intelektuias hodi garantia substentabilidade maske mosu diverzensia no kotradasoens politika oi-oin iha sosiedade nia le'et.

“Jornalismu tenki loke imi nia hanoin ba mundu hodi foti buat ruma husi mundu mai iha ne'e, imi tenki sai matenek liutan, hametin hanoin hodi influensia sosiedade bele hadia sira nia komportamentu nu'udar sidadaun”. Dehan PM Xanana Gusmão liu husi nia diskursu. Hafoin partisipa iha serimónia atribuisaun sertifikadu

apresiasaun ba média nasionál sira, Sabadu, (05/10/2024)

Primeiru-Ministru Kay Rala Xanana Gusmão, sublinha média laos atu lori deit notisia diak ba mundu no husi mundu mai povu Timor-Leste, maibé lori notisia ne'ebe bele eduka no influensia sosiedade Timorensen kompriende diversidade oin-oin iha aspetu imprensa, hodi buka atu akompanha ramo husi atividade jornalismo ne'ebe media sira produs.

“Kona-ba funu foka ba paz foka ba ne'ebá, ita nia sosiedade hodi ita bele kompara ho aspetu oin-oin, Ita nian sai fali media uma laran, lori Timor ba mundu no Timor sira mos tenki lori mundu mai ita nia leet para ita bele senti katak ita halo buat ruma klaru, selae ita haree deit mak ita nia sepatu”. Nia husu

PM Xanana akresenta, Imprensa la'os de'it fó informasaun, maibe halo analiza ba asuntu kobertura, foku ba objetivu prinsipal sira ne'ebe sai tarjetu ba informasaun públiku, ho nune'e ho kbi'it ne'ebe média sira iha, bele produs informasaun ne'ebé los edukativa, no hametin sidadania iha sosiedade Timor-Leste.

“Imi tenki hadia an nafatin, maibé iha konstrusaun nasaun, ita tenki dudu ita nia setor privadu, ho kbiit ne'ebe ita boot sira analiza, investiga, haree ba mundu no mundu bele haree ba ita, imi bele produs informasaun ne'ebé los edukativa hodi hadia liután sidadania”.

Primeiru-Ministru Kay Rala Xanana Gusmão apresia ho kobertura média nasionál sira ne'ebe hala'o atividade kobertura durante loron tolu (3) vizita, Sua Santidade Papa Fransisco iha Timor-Leste inklui vizita Sekretáriu Jeral Nasoens Unidas António Guterres.

“Ha'u apresia liu mos ba kobertura ida ne'ebe bo'ot tebe-tebes durante vizita Papa Fransisco nian, problema bo'ot ida iha mundu mak ida ne'e, notisias falsas, problema ida ne'ebe sai espalhada mak defende parte balun hodi lansa informasaun akuzativu, provokativu, kria divizinismu iha sosiedade nia laran”. Tenik PM Xanana.

Iha Timor-Leste notisia balun la edukativa, la fó valor imprensa ba sosiedade hodi hanorin sosiedade atu hametin paz, unidade no haree ba desenvolvimentu, Média tenki iha konsiensia katak iha sosiedade ida nia laran, ema iha obrigasaun nu'udar sidadaun diak labele provoka divizinismu iha sosiedade nia le'et.

“Imprensa laos de'it fó informasaun maibé imprensa tenki buka informasaun, hametin hanoin, kria hanoin ida ne'ebe moos, ko'alia kona-ba situasaun hodi influensia sosiedade liu-liu ita nia joven sira atu bele komprende mudansa sira, ne'e duni imprensa presija prepara ema sira ne'ebe iha esperiensa kona-ba finansas, atu nune'e hato'o informasaun ho koiñesementu ne'ebe kle'an”.

Aleinde ne'e, Primeiru-Ministru mos aprofunda katak, Fundu Desenvolvimentu Kapitál Humanu sei atu ajuda formasaun rekursu humanu ne'ebe bele halo jestaun ba atividade hotu-hotu, no bele apoiu

formasaun sientifika ba jornalista no média sira hodi aumenta qualidade informasaun, nune'e bele hatene ba desenvolvimentu.

“Ba politika la'os imi tenki tama ba partidu sira, maibé imi tenki hatene katak ita nia nasaun hari'i dadauk ona husi baze, mai sentral sai uma boot, ne'e duni Fundu Desenvolvimentu Kapitál Humanu, atu ajuda formasaun rekursu humanu ne'ebe bele halo jestaun ba atividade hotu-hotu”. Xanana afirma



Imagem : Primeiru-Ministru Kay Rala Xanana Gusmão entrega sertifikadu apresiasaun ba Diretor Midia SAPNewsTL Sergio Alves da Costa iha Salaun Laline Larigutu CNE.

Xefi Governu informa, iha Estadu Direitu Demokratiku, liberdade buras iha Timor-Leste, maibé la signifika katak numeru jornalista aumenta, asuntu liberdade la'o diak ona, maibé jestor média sira tenki buka hadia produsaun ba notisia liu-liu area oin-oin.

“Jornalista barak, ita nia imprensa la'o diak ona, imi tenki hadia nafatin, haka'as an nafatin, kona-ba diplomasia jornalista buka aprende, atu nune'e plataforma barak tebe-tebes ne'ebé akumula iha media, balun iha koiñesementu iha area finansas, diplomasia, balun bele preparadu liu iha politika, no balun iha seguransa, selae ita ko'alia mais

ita sai asal buni (informasaun falsa ka laiha dadus/faktus), ida ne'e mak ita tenki prepara rekursu umanu ne'ebe kualifikativu, iha area oin-oin hodi halo kobertura kobre aspetu hotu-hotu”.

Governu aprofunda nia konfiansa ba média sira katak, papel média importante ba imprensa ne'e hodi bele halo analiza kritika molok lansa informasaun, tamba konstrusaun nasaun laos de'it halo lansamentu, maibé liu husi prosesu.



“Ida ne'e apelu ida ba imi laos de'it atu fó informasaun mai hakilar, halo analiza molok lansa informasaun ba públiku ho koiñesementu sientífiku no tékniku, halo analiza hakerek, tamba Fundu Dezenvolvimentu Capitál Humanu prontu atu simu kandidadus husi kada instituisaun média sira, lalika hanoin atu ba buat oin-oin, maibé importante liu média sira iha

intelijente politika redasaun nian hodi verifika notisia sira ho balansu”.

Xanana afirma katak, Governu iha planu estratéjiku atu oferese bolsa kandidatu ba média sira ne'ebe interesse hodi hasa'e abilidade média nian no hasa'e numeru rekursu humanu iha Timor-Leste, nune'e média sira bele aumenta kbiit opiniaun no informasaun hodi apoiu atividade média nian.

Portantu, Primeiru-Ministru prefere ba SECOMS atu bele kria komisaun ida hodi halo kontrolu ba ramo atividade journalistiku ne'ebe kada tinan média sira halo produsaun, hodi nune'e bele limita informasaun falsa no hadia imprensa iha Timor-Leste.

Entretantu, Governu liu husi Sekretáriu Estado Comunicação Sosiál (SECOMS) distribui sertifikadu apresiasaun ba média nasionál hanesan SAPNews, Radio Televizaun Timor-Leste (RTTL), GMN, jornal Timor Post, Jornal Díli Post, Jornal Independente, Lafaek News, G-News, Média Mudansa, Labeh TV, MFTV, Média ONE Timor, SMNews, Loluari, VIP TV, STL, inklui parseiru sira hanesan Telkomcel, Telemor, TIC Timor, no seluk tan.

“Jornalismo tenki loke imi nia hanoin ba mundu hodi foti buat ruma husi mundu mai iha ne'e, imi tenki sai matenek liutan, hametin hanoin hodi influensia sosiedade bele hadia sira nia komportamentu nu'udar sidadaun”.

4.4 Sentimentu & Esperansa Hosi Povu Timor-Leste

4.4.1 Vizita Santu Padre ! Ermelinda : Momentu Osan-Mean & Istóriku



Xefe Redasaun Ermelinda Soares

SAPNewsTL : Relasiona ho Sua Santidade Papa Francisco nia vizita mai Timor-Leste iha loron 9-11 Setembru, Xefe Redasaun SAPNews Ermelinda Soares konsidera ne'e momentu osan-mean no istóriku ne'ebé presiza aproveita hodi marka ida-idak nia istória.

Tinan 1989, Santu Padre João Paulo II vizita Timor-Leste katak 'imi masin rai nian no naroman mundu nian', liu tiha dékana tolu, tinan 2024, Amu Papa Francisco halo vizita pastoral katak 'Atu Imi Nia Fiar Sai Imi Nia Kultura'.

“Vizita ne'e tempu osan mean no momentu istóriku ne'ebé ita presiza atu aproveita, aproveita hodi reflete, reza, haksolok, fiar na'in, rona na'in ne'ebé diak, hatene foti responsabilidade no hakat hasoru dejafiu luta nian iha moris ne'e”. Teknik Xefe Redasaun SAPNews Ermelinda Soares iha Dili, 09/09/2024

Fiar ne'e konkretiza liu hosi serví, karidade no moris ho unidade iha diversidade, la haree kor, ras, relijiaun, etnia no grupu ka partidu.

“Ita hotu presiza aproveita momentu istóriku ne'e hodi hatur valor fraternidade, unidade, onestidade, responsabilidade, laran diak, laran kmaus, laran loos, haraik an sai kultura ita nian nian hodi se rvi ho domin, promove

família unidade hodi serví sosiedade Timoroan”. Ermelinda Sublinha

Lider Foinsa'e ne'e akresenta, Santu Padre nia visita ho vizaun hametin fiar katóliku, promove unidade nasional, inspira ema hotu halo nia fiar sai kultura damen, amizade, fraternidade, solidariedade, karidade, toleránsia, halakon violénia, diskriminasaun, explorasaun, exploitasaun, korupsaun, koluzau, nepotismu no injustisa sosial iha mundu.

“Vizita ne'e bele sai motivasaun boot ba sarani no sidadaun hotu, ita bele marka ita nia istória, istória ne'ebe sei la repete iha moris ne'e, tan ne'e ita bele promove unidade nasional, toleránsia, halakon violénsia, diskriminasaun, explorasaun, korupsaun, nepotismu, koluzau no injustisa sosial iha Timor-Leste”. Lideransa SAPNews ne'e fundamenta

Ligadu vizita Papa Francisco, Xefe Redasaun SAPNews afirma media SAPNews sei foku ba kobertura durante loron hodi haklalen ba públiku esénsia husi vizita ne'e, haklaken povu nia lian no prezerva memoria furak ne'e liu hosi média.

“Ami sei halo kobertura ba vizita Papa Francisco, ami sei buka haklaken esénsia husi vizita apostólica ne'e, mensagem Amu Papa nian ba públiku, hatutan sarani sira nia lian no prezerva memoria furak ne'e liu hosi halo kobertura”. Ermelinda Soares afirma

Ermelinda Soares dezeja katak vizita apostólica Papa Francisco ne'e bele fanun no motiva ema hotu hodi moris iha fiar no hahalok tulun malui no moris iha toleránsia no diversidade nia laran.

4.4.2 Dircia Subliña Jovens Tenki Hatene Kuidadu Labarik, Ferik & Katuas Sira



Imagem : Dircia Sarmento Belo

SAPNewsTL : Fundadora Laudato Si Movimentu Timor-Leste, Dircia Sarmento Belo, senti orgulhu bainhira partisipa iha dialogu ne'ebe lidera husi lider masimu katolika mundial Papa Francisco iha sentru Konvensaun Dili (CCD sigla Português).

Tuir Fundadora Laudato Si Movimentu Timor-Leste, Dircia Sarmento Belo, hanesan mos joventude katolika Timor-Leste hateten, nia parte senti kontenti no orgulhu tebes, tanba bele hetan oportunidade hodi partisipa iha dialogu ne'ebe Sua Santidade Papa Fransisco hato'o hodi enkoraja foinsa'e katolika sira iha Timor-Leste.

“Ha'u sente orgulhu no kontente ne'e hanesan bensaun bo'ot ida mai ha'u no ba maluk joven sira hodi partisipa dialogu ho Amu Papa no ne'e hanesan grasa bo'ot ida husi Maromak” Dehan Dircia Sarmento Belo, ba SAPNews iha CCD, Quarta (11/09/2024)

Nia salienta, nu'udar sidadaun Timoroan agradese ba santu Padre nia korajen nu'udar lider igreja katolika mundial, hodi hato'o mensajem ne'ebé nakonu ho inspirasaun, motivasaun, domin no fiar hodi tulun foinsa'e sira atu bele moris iha dalan los.

“Santu Padre bele fo mensagem diak ba ami jovem sira hotu no mensajen ne'ebe mak Amu Papa ohin temi mak Jovem tenke halo barulhu, Jovem tenke iha espirtu badinas no mensagem ida seluk mak tenke kuidadu Labarik oan no mos katuas no ferik sira”. Nia sublinha

Nia hatutan liu husi diskursu Sua Santidade Papa Francisco, sita mós kona-ba Laudato Si ne'ebé mak husu jovem sira iha liberdade atu halo saida deit mak jovem sira hakarak maibe tenke iha responsabilidade hodi tau matan ba uma komum (rai ne'ebé ema hotu moris bá).

“Ha'u nia esperansa liu husi mensagem ne'ebe mak Amu Papa ohin fo bele fo hanoin mai ita halo ita atu foti tempu oituan halo reflesaun, oinsa mak ita renova fila-fali ita nia fiar no hasoru ita nia maluk sira liu-liu ba Maromak no kriasaun ne'ebe mak haleu ita”.Dircia hateten

Entretantu, iha dialogu refere akumulá Joventude katolika Timoroan hamutuk 3.000 resin ne'ebe mai husi Aldeia, Suku, Postu Administrativu no estudante universitariu balu.

4.4.3 Simu Bensa Direta Husi Papa ! Joana : Maromak Nia Planu Sempre Furak



Imagem : Jerente Telkomcel Joana Pereira Miranda simu bensaun hosi Amu Papa iha Pantai Kelapa, 10/09/2024. Foto : Vatican News

SAPNewsTL : Jerente Telkomcel no Voluntária ba Vizita Santu Padre Papa Francisco, Joana Pereira Miranda sente kontente bainhira hetan bensaun no simu tersu direta husi Papa Francisco.

Joana Miranda konsidera simu bensaun no tersu ne'e nu'udar grasa no domin Maromak nian ne'ebé nia hetan iha momentu istóriu vizita Papa Francisco iha Timor-Leste liliu iha Koléjiu Irmã Alma.

“Ha'u sente orgulloza no gratidaun tanba bele simu bensaun no tersu direta husi Santu Padre Papa Francisco, ha'u haree ida ne'e nu'udar grasa boot ne'ebé ha'u simu tanba mai hosi fiar no orasaun ne'ebé ha'u iha durante ne'e”.

“Nu'udar sarani labele baruk atu reza tersu iha ita nia familia, Maromak nia planu buat hotu furak tuir nia tempu, kontinua reza tersu atu husu Nain Feto bele akompanha ita

nia aktividade tomak”. Tenik Jerente Telkomcel Joana Pereira Miranda ba SAPNews iha Timor Plaza, 12/09/2024

Jerente Telkomcel ne'e fundamenta, hafoin Santu Padre Papa João Paulo II vizita, liu tiha tinan 35, Papa Francisco Vizita Timor-Leste, momentu istóriu ne'e fo inspirasaun ba Timoroan hotu katak presiza moris ho valoriza malu, tane malu, proteze malu no serví malu sai kultura moris sosiedade nian.

“Tinan 35 depoisde vizita husi Santu Joao Paulo II mai Timor Leste, hafoin Papa Francisco vizita sarani katólíka iha país ida ne'e nu'udar sarani iha fatin servisu nian no familia boot Telkomcel nian, ita kontinua valoriza malu, tane malu no proteze malu, koko nafatin atu haraik an, moris simples hanesan Santu Papa Francisco dehan”.Sublinha Joana Pereira Miranda

Feto potensial ne'e hatutan, “Sarani tenki hametin ita nia fiar, atu fiar ne'e rasik bele sai ita nia kultura, iha Telkomcel ami sempre hahú aktividade hotu ho orasaun no taka semana servisu ho orasaun”.

“Operador Telkomcel la’os deit fornese linha hodi konekta ema ho ema, maibé sita mos referénsia husi Embaixador Indonesia katak Telkomcel konekta ema ho Maromak, hanorin ita oinsa haboot ita nia fiar. Buka aprende barak no servisu ho liberdade ne’e parte ida importante hodi ema bele sente paz no fraternidade umana iha ambiente servisu tanba ami iha multirelijaun mak servisu hamutuk maibe respeitu malu no la iha diskriminasaun”.

Joana Pereira salienta, iha era teknolojia ema barak uza sala teknolojia no mosu ona degradasaun moral hodi insulta malu, tolok malu no hatun ema nia dignidade”.

“Ohin loron ema barak uza sala teknolójia, wainhira ita hatene uza teknolojia hodi tulun ita ho hafasil ita nia servisu, maibe realidade hatudu degradasaun moral hahu buras iha Timor Leste, tanba ema barak uza teknologia hodi halo mal trata ba ema seluk hodi hatun dignidade ema nian”. Nia.dehan

Joana Pereira sublinha “Padre barak presiza kontinua fo formasaun ba foinsa’e sira atu lori hikas sira ba dalan ne’ebé diak hodi fanu sira uza teknologia tuir nia dalan hodi bele kontribui ba desenvolvimentu nasaun no kreda.

Feto Potensial ne’e mós husu ba makaer ukun sira liliu lider nasional sira atu bele hamutuk hodi desenvolve nasaun sai desenvolvidu, modernu, prósperu no sivilizadu.

“Mensagem ba lider sira hodi buka hadame malu hodi bele hamutuk desenvolve Timor-Leste sai pais desenvolvidu no sivilizadu. Ba foinsa’e sira kontinua aprende respeita malu, no halo barulhu hanesan Papa Francisco dehan maibe tenki halo barulhu ba buat ne’ebé positivu no fo valor diak ba nasaun no Kreda”. Nia husu



Imajem :Asistente Tékniku Adri Lebre & Joana Pereira Miranda ne’ebé simu bensa direta hosi Papa Francisco iha Koléjiu Irmã Alma, 10/09/2024.

Iha Fatin hanesan, Asistente Tékniku Adri Lebre senti kontente teb-tebes tanba konsege hetan bensaun direta husi Santu Padre Papa Francisco

“Sente kontente ho matan-wen nakonu tanba bele hetan bensaun direta husi Papa

Francisco, grasa boot ne'e dala ruma Maromak nia planu para hakbesik liután ita ba Maromak no uma kreda”.

Joven ne'e husu ba nia maluk foinsa'e sira hodi haklaken paz no unidade, buka hakbesik an ba Maromak hodi moris tuir nia ukun fuan.

“Mai ita hotu haklaken damen, unidade no fraternidade, hakbesik an ba uma kreda, hadia ita nia mentalidade hodi kontribui ba uma kreda no ita nia nasaun.”

“Igreja tenke hakbesik an ba nia joven sira, aplika mós iha eskola sira kada semana tenke reza hamutuk no haklaken biblia,

agradese ba maromak tanba sempre fo bensa mai ha'u nia pessoal, kompanha no mós ba ita nia nasaun Timor-Leste”. Adri sublinha

Durante estádiu iha Dili, Santu Padre husu joven sira atu kuda mehi boot, hatene halo barullu, uza liberdade hodi hala'o ninia responsabilidade hodi serví ninia maun alin sira iha Timor-Leste tanba foinsa'e sira mak futuru no forsa ba nasaun.

Enkuantu, Santu Padre Papa Francisco vizita Timor-Leste iha loron 9-11 fulan Setembru tinan 2024, oras ne'e Santu Padre iha fali ona Vatikanu hodi hala'o nia knaar nu'udar Xefe Estadu Vatikanu no Lider Mundial Igreja Katólíka.

4.4.4 Telkomcel Kontribui Vizita Papa Francisco Ho Gratuita & Susesu



Imajem :Chief Ezeutive Officer (CEO) Telkomcel Benedictus Ardiyanto Pryo hala'o komunikadu imprensa iha Salaun Telkomcel Timor Plaza, 12/09/2024. Foto : Ermelinda Soares

SAPNewsTL : Operador Telekomunikasaun Telkomcel sente onradu hodi kontribui no partisipa iha vizita Sua Santidade Papa Francisco mai Timor-Leste durante loron tolu ho susesu.

Chief Ezeutive Officer (CEO) Telkomcel Benedictus Ardiyanto Pryo hateten Telkomcel sente gratitude envolve iha preparasaun no kontribui ba vizita Papa Francisco mai Timor-Leste durante loron tolu.

“Telkomcel laiha dúvida hodi fó apoiu ba comunidade, sente onradu bele envolve iha preparasaun ba vizita Sua Santidade Papa Francisco to'o mai la'ós de'it eventu significativu ida ba Timor-Leste maibé mós okaziaun importante ida ba comunidade katólíka globál”.

CEO Telkomcel ne'e konsidera vizitasaun Papa Francisco ho objetivu atu promove damen, unidade, refleksaun fiar no hametin relasaun espirituál no kulturál ho comunidade katólíka mundiál.

“Ita-nia fiar sai kultura, lema ofisiál vizita nian, sai hanesan “ezortasaun no enkorajamentu atu moris fiar iha harmonia ho kultura, tuir tradisaun Timoroan nian, vizita ne'ebé ho objetivu atu promove dame, unidade, no reflesaun espirituál, hametin Timor-Leste nia ligasaun kulturál no espirituál ho comunidade katólíka mundiál”.

Papa Francisco nia vizita, Telkomcel kontinua nia apoiu hodi fornese assisténsia téknika iha terrenu, habelar kobertura rede nian, no oferese WiFi gratuitu iha fatin xave sira.

“Telkomcel fasilita ona kanál komunikasaun no transporte ba representante média ofisiál sira, hodi garante kobertura ne'ebé la'o ho di'ak no efektivu ba eventu istóriu ne'e. Telkomcel mós suporta Comissão Nacional Juventude Catolica Timor Leste no Conferencia Episcopal Timorese durante Papa Francisco nia vizita”. Nia sublinha

Durante vizita Santu Padre, Telkomcel estabelese sentru atendimentu ba kliente tolu iha fatin krusiál sira hanesan Basecamp Atauro-Oecusse (Tasi Tolu), Basecamp NTT (Tasi Tolu), no Hilton Hotel. Sentru sira-ne'e tau iha fatin estratéjiku hodi oferese asesu fásil ba servisu sira Telkomcel nian ba turista sira, média, no kliente sira ne'ebé reflete empreza nia dedikasaun hodi fornese apoiu no konetividade esepSIONál.

“Telkomcel halo kolaborasaun ho Comissão Nacional Juventude Catolica Timor Leste (CNJCTL) no Conferencia Episcopal Timorese (CET), distribui ona kartaun SIM gratuita hamutuk 3.000 ba juventude sira ne'ebé tuir eventu iha CCD, no SIM 100 ba média sira hosi internacional, Kartaun SIM sira-ne'e fornese Sms, xamada sira, no asesu internet gratuitu durante eventu”.

“Ami nia apoiu abranje mobilizasaun husi Papa Francisco nia tripulasaun no ofisiál sira hotu parseiru média sira hodi garante kobertura ne'ebé efektivu no la interrompe ba eventu istóriu ne'e. Telkomcel prova ona katak bele halo konetividade ne'ebé la interrompe durante eventu ida-ne'e”.

Telkomcel hala'o atualizasaun ne'ebé signifíkativu hodi apoia vizita Amu-Papa Francisco ba Eskola Irmán Alma, Katedrál, Santa Misa iha Tasi Tolu, no Enkontru Foin-sa'e sira iha CCD. Antisipa partisipante liu 750,000, Telkomcel habelar lalais nia rede hodi konstrui infraestrutura B2S foun 9, estasaun IMacro 11, massive-mimo 2 no koloka hotspot WiFi ho velocidade aas gratuita 26 iha fatin xave sira.

Iha mós asesu internet gratuitu durante eventu Koléjiu Irmã Alma no Katedrál. Abordajen proativu ida-ne'e garante katak momentu hotu-hotu hosi eventu dala ida iha moris ida-ne'e laho problema, no fahe hosi ema hotu hodi subliña Telkomcel nia kompromisu kle'an atu hasa'e esperiénsia comunidade nian durante okaziaun importante ne'e.

Garante konektividade konfiavel, Telkomcel konsege aseguira apoiu backup liña internet liuhosi kontratu ho MTC, ANC, no TIC Timor I.P Agency. Parseria ida-ne'e destaka konfiansa tau iha Telkomcel nia kapasidade ne'ebé komprovalu no reputasaun sólidu nu'udar parseiru estratéjiku. Apoiu husi MTC, ANC, no TIC refleta Telkomcel nia dedikasaun hodi presta servisu esepcional no fó prioridade ba unidade no selebrasaun.

Benedictus Ardiyanto agradese ba konfiansa ne'ebé fo ba Telkomcel hodi kontribui ba eventu istóriu Timor-Leste halo iha comunidade internacional nia matan.

“Ami agradese ba konfiansa ne'ebé tau mai ami husi governu no ami nia parseiru sira, MTC no TIC. Agradese ba oportunidade ida ne'e hodi serbí no suporta okaziaun istóriu ida ne'e ho exelénsia” dehan Benedictus Ardi, CEO Telkomcel.



“Sarani tenki hametin ita nia fiar, atu fiar ne'e rasik bele sai ita nia kultura, iha Telkomcel ami sempre hahu aktividade hotu ho orasaun no taka semana servisu ho orasaun”.

4.4.5 Papa Francisco Lori Grasa & Ispíritu Kombate Injustisa Ba Timor



SAPNewsTL : Sarani Katólíka Judite Dias Ximenes konsidera vizita Papa Francisco hanesan grasa boot ida ba rai doben Timor-Leste, vizitasaun ne'e bele fanun ativista, akadémiku no polítiku sira hodi sensível liután ba problema sosial sira no injustisa iha nasaun ne'e.

“Amu Papa Francisco nia vizita mai rai Timor Lorosa'e hanesan grasa bo'ot ida, vizita ne'e fanun ema hotu liliu ita hanesan ema ne'ebe ativista, polítiku, akademista hodi haree ba problema sosial, polítiku, ekonomia no kultura iha rai lafaek ne'e”.

“Liu husi Sua Santidade nia prezensa, ita hotu sei liberta ita nia povu liu husi ignoránsia, terus, mukit no injustisa, igreja katolika ne'ebe mai ho doutrina no ukun fuan Na'i Maromak nian, vertude ne'ebé igreja katolika sempre hanorin ita maka adora na'i Maromak mesak ida deit no hadomi ema seluk hanesan ita an rasik”.

Maibe dala barak mos sarani falla hodi prátika sagrada eskritura haruka, ho prezensa Amu Papa sai momentu krusial ne'ebé sarani katólíka hamutuk ho na'i ulun sira hametin liután sira nia fiar sai kultura hodi serví no desenvolve Maromak nia povu.

“Bainhira sarani sira rona, dehan Amu Papa mai ita nia rai doben Timor senti kontenti hamutuk, vizita Amu Papa mai, na'i ulun no povu ki'ik sira, ita hamutuk atu hametin liu tan ita nia fiar, sai kultura hodi desenvolve povu nia moris, nafatin hadomi malu hodi moris iha dame, domin no amizade”.

“Amu Papa mai vizita iha ita nia rai Timor ho tema ‘Que A Vossa Fé Seja Vossa Cultura’ ne'e refleta ba ita sarani katak ita nia fiar ne'e maka fiar igreja katolika ho nia sofrimentu universal, katolika universal ne'e katolika domin nain, doutrina hanorin ita sai sarani ne'ebe di'ak no hatene respeita ita nia doutrina sira, ita tenki pratika iha ita nia moris lor-loron hanesan ema sarani”.



Vizita Amu Papa nian ne'e fó matak, malirin no bensaun ba Timoroan sira atu luta hamutuk liberta ninia povu, prepara foinsa'e sira no prepara futuru ba jersaun foun sira, futuru nasaun iha lider nasional nia liman. na'i ulun sira tenke fó liman no konsidera malu tanba haree sira la valoriza malu.

“Ita atu hasai ema husi ki'ak no mukit, oinsa maka ita liberta ema hotu, enkuantu iha mentalidade ladiak, dala barak halo politizasaun, privatizasaun, familiariza instituisaun públiku sira, ita tenki husik

interesse privadu iha interesse komun nia leet, uluk Saudozu Fernando Lasama dehan ‘Ha’u nia dignidade la aas liu dignidade nasaun nian’, katak dignidade privadu ne’e tau ses hodi tau interesse nasaun boot liu no iha buat hotu nia oin”.



Futuru jersaun foun labele halo tuir saida mak agora akontese ona, ukun karik tenke fó liman ba malu no kahe kabaas ba malu, ema barak maka sakrifika aan ba rai ida ne’e. Ba jersaun foun aprende buat ruma ne’ebe diak atu bele hadia di’ak liután nasaun ne’e iha futuru.

Ema hotu kontinua halo orasaun, hatudu hahalok di’ak, kria paz no unidade hodi lori dezvoltamentu inkluzivu, integradu, sustentável no justisa ba maubere no buibere oan hotu.

4.4.6 Papa Francisco Lori Ksolok Ba Timoroan Sira



SAPNewsTL : Padre Cirilo Dos Santos Maia sente gratidaun tanba vizita Santu Padre transmite felisidade no domin ba sarani sira hotu, sira ne’ebé ho kondisaun difisiénte no moras, bebe no labarik, ferik no katuas, jovens no adultu sira iha Timor Lorosa’e.

Ita haksolok tanba sarani sira refléta duni ba ita nia tema katak ita nia fiar mak ita nia kultura, durante loron tolu Amu Papa mai vizita ita nia rai ne’e hanesan klosok boot ba ita hotu liuliu ba sarani katolika sira.

Ita haree ohin loron sarani sira kontente ho domin no pasiénsia, laos sarani sira de’it maibe ba ema moras, ema defisiénsia sira forma tuir dalan hodi hein ita nia Santu Padre Papa Francisco, ha’u nu’udar padre ida mós kontenti hatudu ita fiar ba Maromak.

Felisidade hanesan iha igreja katolika ne’e sempre hanorin ema ho eukaristia, felisidade lolos ne’e mak wainhira halo tuir Maromak nia ukun fuan depois partisipasaun iha Eukaristia. Ita iha destinasaun rua. 1. ema haksolok ho momentu ida ne’ebé eventual no 2. depois ida ne’e hotu ida ne’e kontinua husi igreja atu sosializa nafatin felisidade liu husi manifestasaun da fé, publika liu husi doutrina igreja nian atu hanorin mos ema sira ne’e bele selebra sira nia fiar iha sira nia moris.

Fiar maioria iha Timor-Leste nu’udar sarani katólíka, agora ida ne’ebé ita nia kestaun ne’e mak buka atu selebra klean liu mak iha eukaristia, formasaun sira ne’ebé molok simu Papa ne’e iniciativa igreja hosi kada Dioseze, realidade hatudu katak ida ne’e ne’e tama iha fiar sarani sira nian. kultura lolos mak wanhira ita konsidera Na’i maromak ne’e sai prinsipiu.



Orgullu boot ida ba sarani iha Timor, Depois vizita Santu Padre, ita hatudu nafatin entusiasmu ida ne’e, laos iha por momentu de’it mais ita nia prejsensa ba eukaristia, Domingo-Domingo keta haluha partisipa iha eukaristia hodi selebra ita nia fiar hanesan sarani tanba amu lulik halo instrumentu Na’i Maromak nian nafatin iha sosializasaun hodi lori hanoin ba sarani sira hotu atu nafatin hari’i eukaristia ne’e katak Jesus Kristu mak sai sentru ba buat hot-hotu.



4.4.7 Karta Pastoral ! Esperansa La Bosok



SAPNewsTL : Karta Pastoral Bispu sira nian ba Tempu Adventu-Natal 2024, Konferénsia Episkopál Timorens (CET) nia karta ba sarani ho tema esperansa la bosok.

“Ami Bispu sira konvida ita hotu atu halo: conversão pastoral no missionária; conversão estrutural; conversão hosi maromak falso sira mundo ohin loron nian: kan ba isin, osan no poder conversão”.

“**Esperança La Bosok**” (Rm: 5,5) ``

Na'i-Lulik, diácono, madre, irmão, seminaristas, maun-alin no bin-feton sira no ema hotu nebé iha hakaran di 'ak: Graça no domin Maromak nian horik ho imi hotu!

“Sira nebé titu Na'i sei hafoun sira nia kbiit hodi semo ho liras hanesan makikit, sira sei halai no sei la kole, sira sei la'o no kbi'it sei la nahas” (Is 40,31).

Povu Timor, povo ne'ebé hatene hein. Ita sei hanoin, wainhira povo ida ne'e hahu nia luta ba ukun an, mundu tomak la fiar katak mehi ne'e ikus mai bele sai realidade. Experiência hatudu katak, maske timoroan sira mate rihun ba rihun maibe ninia esperança nunca mate. Povo nebé hatene hein, nia iha futuro. Mesmo que futuro ne'e nakonu ho incerteza

no insegurança, ba ema nebé hatene hein la hein nale'et de'it. Basa, hein mak atitude nebé nakonu ho optimismo katak loron aban sei sai diak liu.

Iha era uku an nian, sei iha nafatin ka la'e razões de esperança? Atu reflete no descobre hikis kbit ida ne'e ita precisa uluk nanain hateke ho laran mos ba realidade Timor ohin loron nian: iha desafio oi-oin nebé sadik ita nia consistência no persistência nu'udar povo ida hein nain to'o halo ema barak halerik tamba lakon esperança ba moris diak iha futuro; injustiça social, la fo fatin ba solidariedade no justiça atu nadelun.



foinsa'e sira ladauk hatudu sira nia an nudar esperança Kreda no Nação nian; escola sira seidauk sai fatin ba criatividade no iniciativa nebe bele haburas esperanca rai ne'e nian.

Falta de kontrolu ba uso media social ida responsável, halo ema lakon tiha respeito, hahi no tane malu, to'o harahun valor sira cultura, ética no moral iha sociedade Timor nian. Ita hotu akompanha, ikus ikus ne'e mosu fenómeno grupo oi-oin nebé kahur politica, religião, cultura no fiar.

Grupu balun laiha fundamentu moral no ética, hakiak distúrbuiu no desordem social hodi usa arbiru atributo sagrado sira to'o

hasai lia foer hasoru autoridade Kreda Católica nian iha Timor-Leste. Seita sira ne'e, sai desafi boot pastoral no katequese Kreda Católica nian. Ba ida ne'e, ami Bispu sira tane aas sarani sira nebê fiar metin nafatin no husu atu matan moris neon nain hodi la monu ba tentação sira nebê mak mosu.

Apostasia katak ema sarani ne'ebe publikamente la fiar ka nega total doutrina Igreja Católica nian, heresia katak ema sarani nebe publicamente nega parte balun husi doutrina Igreja Católica nian, cisma katak ema sarani nebe publikamente rezeita comunhão plena ho Igreja Católica.

Na'i lulik, diácono, madre, irmão, seminaristas, maun-alin no bin-feton sira no ema hotu nebê iha hakaran di ak:

Hori wain kedas Maromak nunka husik nia povu la'o mesak: iha moris atan nian iha rai Egipto", iha dalan sira rai fuik maran nian", iha halerik sira povu nian ba hamlaha no hamrook", iha povo sira nia murmura hasoru Moisés no Maromak, iha sira nia neon nakukun no tauk nia laran", iha sira nia dúvida no sira nia fila kotuk ba Maromak". Iha situação hirak ne'e hotu, Maromak hatudu nafatin nia laran luak no nia laran sadia, Nia promessa sira la'os liafuan mamuk", maibe nakonu ho esperança".

Adventu mak tempu esperança nian. Tempu atu hakbiit ita nia neon titu; tempu atu halakon ita nia laran taridu no neon nakraik; tempu kmanek ba perdão no reconciliação ho Maromak, maun-alin sira no kriptura tomak, tempu atu foti ulun hateke ba oin, ho laran metin katak, ita la la'o mesak, Nia la'o hamutuk no horik ho ita nafatin basã Nia

naran mak Immanuel katak Maromak ho ita."

Maromak ida nebê hori uluk koalia fila-fila ona ba ita nia bei-ala sira ho dalan oi-oin, liu husi profeta sira, no oras ne'e, iha tempo ikus, Nia koalia mai ita liu husi nia Oan Mane. Jesus Cristo mak ita nia esperança! Esperança nebê ita hala'o iha biban adventu ne'e hetan nia sentido nakonu wainhira Jesus tama no hola isin ema nian no horik ho ita iha ita ema nia história.

Tinan rihun rua resin liu ba, Jesus hiit an tiha ona iha ita nia história; oras ne'e Nia mai nafatin iha Eucaristia no nia sei hiit an mai iha tempu ikus hodi tesi-lia ba ema moris no ema mate. Esperança ida ne'e mak ita haklaken fila-fila iha eucaristia: "Na'i, ami fo hatene ita nia mate, ami haklaken ita nia moris hias, Na'i Jesus hi'it an mai".

Hasoru Na'i nia hi'it an mai, husu husi ita: laran badinas atu reza, laran haraik an atu hakribi salan, laran manas ba caridade. Iha biban nebê Kreda tomak hafoun an fali ho espíritu sinodalidade nian hodi moris iha comunhão, participação no missão.

"Ami bispu sira convida ita hotu atu halo: conversão pastoral no missionária; conversão estrutural; conversão hosi maromak falso sira mundo ohin loron nian: kan ba isin, osan no poder conversão".

Esperança advento nian realiza iha mistério Natal. Mistério konaba Kosok Oan Jesus nebê "maske Maromak, la tanesan An ho Maromak, maibe hamamuk nia An, hodi halo An sai atan, no sai ida de'it hanesan ema. Nu'udar ema, Nia haraik An liutan hodi halo tuir to'o mate no mate iha cruz",

Husi exemplo lala'ok moris Cristo nian nebe hatene hamamuk no haraik An mak ami Bispo sira exorta:



Atu ita hatene configura an ho Cristo Jesus, iha ita nia hanoin, hakaran, hahalok no lala'ok; Atu virtude haraik an no simplisidade sai iis moris sarani nian, tuir lia menon Papa Francisco nian iha Tasi tolu dehan: “Keta tauk atu sai ki'ik iha Maromak futar oin no iha ema nia oin. Atu hatene saran ita nia moris, fo ita nia tempo, dedica ita nia programa sira ba ema seluk nia diak. Nune'e, ita bele husik buat ruma husi ita nia an atu maun-alin ida ka inan feton ida bele soi moris diak no haksolok”.

Atu ita ida-idak moris tuir vocação nebé ita simu ona, bele aproveita biban adventu nian

hodi halo exercicio espiritual nebé lori ita sai instrumento no manu ain esperança nian ba futuro; toman sira halo presépiu iha dalan ninin ho ahi lakan artificial oi-oin bele sai biban kmanek atu hafutar presépio fuan nian;

Atu ho Kosok oan Jesus nia moris halo Natal sai festa dame, domin no ksolok boot, nune'e fuan nebé malirin sai manas, fuan nebé toos sai mamar, néon nebé nakraik nakfilak ba néon ksolok, no ida nebe lakon esperança hetan néon metin.

Hamutuk ho Rahun diak Virgem Maria, inan esperança no banati kmanek haraik an nian, ita la'o hamutuk ba hasoru Na'i nia loron moris, ho néon nakloke no fuan metin katak ho Maromak buat hotu bele deit no loron aban sei sai diak liu.

Karta pastorál ne'e asinadu hosi Dom Norberto Bispo de Maliana e Presidente da CET, Dom Virgilio Cardeal do Carmo da Silva, SDB, Arcebispo de Dili e Pro-Presidente da CET. Dom Leandro Marjaa Alves, Bispo de Baucau e Secretário Geral da CET. Dili, 1 Dezembro 2024

“Sira nebé títu Na'i sei hafoun sira nia kbiit hodi semo ho líras hanesan makikít, sira sei halai no sei la kole, sira sei la'o no kbiit sei la nahas” (Js 40,31).

: “Na'i, ami fo hatene ita nia mate, ami haklaken ita nia moris hias, Na'i Jesus hi'it an mai”.

4.4.8 Istória Susesu ! Ki’ak Serví Ki’ak Sai Kultura Moris Ba Januário



SAPNewsTL : Januario Soares maka joven mane ida hosi Suku Barikafa, Postu Administrativu Luro, Munisípiu Lautém ne’ebé susesu iha perkursu akadémiku no ajuda ema vulneravel sira hamutuk rihun rua resin liu hosi fahe hahan, halo uma no facilita oan-kiak sira ba eskola, asaun karitativa ne’e sai kultura ka toman ne’ebé nia hatudu iha Timor-Leste.

1. Se mak Januario Soares iha públiku ninia matan ?

Januario : Ha’u maka Januario Soares (Rio Soares88) hosi Ussufassu, Suku Barikafa, Postu Administrativu Luro, Munisípiu Lautém, ha’u mai hosi família ne’ebé simples no kiak tebes, ha’u nia istória família ne’ebé aat liu no vulneravel, inan aman fahe malu, alin sira mate hotu. realidade ida ne’e sai hanesan forsa no motiviasaun ida mai ha’u hodi hala’o estudu, tanba edukasaun sai hanesan bukae ida atu ita bele la’o hanesan ho ema sira seluk. Maske ita ki’ak iha sasan maibe tenke hariku ita nia aan iha koñesimentu.

Ha’u koko estuda, finaliza Licenciatura (S1) ha’u foti iha Jogjakarta ho Area Mining Engineering no kontinua Mestradu (S2) iha

Bandung ho area Telkom Univesity iha programa Human Recourse Manegement no Human Recourse Developmat. Agora hakarak foti tan doutoramentu. Durante hala’o ha’u nia estudu buat ne’ebé sai dezafiu maka laiha família ne’ebé apoiu, ha’u tenke esforsu hodi buka rasik ka buka ema ne’ebé bele ajuda ita, maibe graças a Deus buat hotu-hotu bele ultrapasa.

2. Oinsa ita nia hakat sira iha kareira profesional ?

Januario : hafoin finaliza estudu iha mestradu, tuir mai servisu tinan barak iha area oioin hanesan sentru treinamentu East Timor Development Agency (ETDA) sai treinadór, fasilitadór no supervisor, tempu kontinua la’o, ha’u servisu fali iha Ministériu Finansas nian iha area Monitoring and evolution no Overseas Tranning Oficcer.

Tuir mai, hetan konfiansa hosi servisu iha Ministériu Interior nu’udar Asesor Administrativu Autoridade Protesaun Civil (APC), hafoin servisu mos iha Project Coordenator ba United States Global Fund, ikus liu agora servisu nu’udar jestor projetu ba muzeum no Xefe Departamentu iha Muzeum Memorizasaun Centro Nacional Chega (CNC, I.P).

Durante hala’o kareira profesional to’o ohin loron, ha’u sempre hatudu kredibilidade no servisu ho transparente, hatene saida maka ita atu halo, se ema ruma fó ona kontratu servisu tenke iha ona planu hodi hatudu katak Ministériu, instituisaun ka organizasaun ne’ebé maka simu ita, sira iha

ona planu maibe ita mós tenke iha inovasaun ne'ebé merese duni atu ema iha konfiansa hodi fó servisu ne'e ba ita. Graças a Deus projetu no programa hotu ne'ebé ha'u kaer sempre hetan susesu no ema hotu gosta, sira bolu atu ba servisu depende ba ha'u hodi hili atu ba servisu.

3. Saida maka sai ita nia motivasaun hodi servi no tulun ema vulneravel sira ?

Januario : Ha'u nia istoria família nian ne'ebé aat liu no vulnerável tebes, inan aman fahe malu, no alin sira mate hotu, ha'u nia prosesu akademiku halo ha'u promete ba ha'u aan katak bainhira iha paun fuan ida iha liman tenke fahe ba ha'u nia maluk sira.

Bainhira to'o iha momentu ida ne'ebé ha'u bele hodi la'o maibe iha prosesu la'o nia laran hodi tulun ita nia maluk sira ne'ebé maka hamlaha no terus iha buat hotu-hotu, ita bele dehan direitu umanus ne'e sira laiha iha ne'ebá, entaun saida maka ita prezisa halo ? Ita koko atu responde ba situasaun ne'ebé maka sira hasoru.

Iha katerogia barak kona-ba ajudu ne'ebé maka ita halo, ezemplu maka tenke halo sira nia uma, oferece kursi roda, ai-han, fó eskola, ropa no fó mós osan hodi sira fila liman, buat sira ne'e hotu. Iha momentu ne'ebé labele ona, ha'u uza sosial média hanesan meius komunikaun ida oinsa bele buka fundus hosi ita nia maluk timoroan sira ne'ebé iha rai liur hanesan Corea do Sul, Austrália, United Kingdom, Portugal, Indonésia no iha Timor dala barak mós iha ita nia maluk sira ne'ebé maka hakarak kontribui ha'u loke liman hodi simu.

Ha'u mesak forsa lá to'o, ita hakarak kobre ema hotu iha teritóriu nasionál, ita nia hakarak maka ne'e, laiha Timoroan ida iha rai ida ne'e atu sente hamlaha, sira tenke bosu no sente kontente, ita moris ona iha independénsia nia laran tenke moris ho kontente, *“se ha'u hatene katak independénsia ne'e lori terus no susar tanba sa maka ha'u hakarakukun rasik an”*.



4. Asaun sosial hirak ne'e ninia valor saida ba públiku ?

Januario : Ita nia hakarak ne'e buat ne'ebé maka ita halo sai hanesan lisaun ida katak iha rai ida ne'e hosi lorosa'e to'o loromonu, Jaco to'o Citrana, ita mesak maun alin, timoroan tenke fó tulun ba malu. Graças a Deus laiha ida maka duni ha'u maibe iha balun ezemplu hanesan ema ne'ebé defisiénsia mental, sira la komprende hodi lori katana duni ami, ida ne'e ami la tau iha video, ami halai bulak rai nian, maibe barak ne'ebé maka kontente tebes ho ami nia prezensa.

Ohin (08/02/2025) iha Maslidun durante tinan barak iha família ne'ebé aman deficiente, inan faluk ne'ebé laiha kbiit no laiha ema ida ne'ebé maka ajuda entaun iha vijinhu ida fó hatene ita bele ba fó tulun kedas. Sira sente kontente tanba primeira

vez sira simu tulun. Tulun ne'e mai hosi ita nia maun alin Timoroan sira tantu iha rai liur no iha laran.

Ha'u hanesan meius ka intrumentu ida ne'ebé uza hodi ajuda ita nia maluk sira ne'ebe maka prezisa, ita nunka temi ita nia maluk sira ne'e nu'udar ema kiak tanba ne'e ita nia maluk ne'ebé iha fuuk no isin kulit hanesan, iha rai ida ne'e, ita mesak ran no ruin ida deit.



5. Saida mak sai dejafiu ba ita durante apoia umanitária ?

Januario : Dezafiu mak ema balun la apoiau, sira sempre dehan katak ita buka oin no buka naran maibe ne'e la problema, ne'e hanesan pursentu kiik ida ne'ebe bele ultrapasa no hakat nafatin ba oin. Dala ruma iha familia balun ne'ebe prezisa duni ita nia ajuda, maibé fatin maka dook liu hanesan balun iha munisípiu Covalima, Oe-Cusse ne'e ita susar atu to'o iha sira tanba ita mós iha rekursu ne'ebe naton de'it atu bele tulun sira. Ita laos ema riku atu ajuda ema kiak maibe bainhira ita iha etu bikan ida tenke fahe fali sorin ba ita nia maluk, buat ne'ebe ita prezisa ne'e mak ita fahe, ita la fahe rikusoin ne'ebe maka restu, ne'e ita fahe mós la signifika buat ida ba ha'u,

ita fahe duni buat ne'ebe ita prezisa, iha signifikante ne'e boot liu duke ita fahe buat ne'ebe maka restu, ema la prezisa no ita la prezisa.

6. To'o ohin loron, ema na'in hira mak sai ona beneficiária ba asaun mak ita halo ?

Januario : Iha tinan 2024, ami kobre ona ba familia uma kain atus rua (200) hosi ema liu rihun rua (2.000) familias, ekipa mos fahe ona kursi roda 10 ba ema sira ne'ebe prezisa, apoiau estudqnte sira hodi asesu ba iha edukasaun hamutuk 25, fahe ona sasan kuaze tonelada 30 ba iha familia 2000, ita hari'i ona uma neen (6), atividade hirak ne'e hala'o iha munisípiu Manatutu, Aileu, Ermera, Likisa, Atauro, no Dili, iha Dili ita fahe ona ba comunidade Tibar, Hera, Akanunu, Maslidun no fatin ne'ebe maka ita bele ba.

Iha tinan 2025, ita hakarak kobre liután, komesa iha fulan Janeiru ne'e hari'i ona uma rua (2), ita sei iha tempu naruk. Iha osan ita sei hari'i tan uma ba familia sira ne'ebé maka prezisa, iha Liquiça ita sei buka hela ajuda hodi bele ajuda liután, semana ida ami fahe 20, entaun fulan ida hamutuk 80, uma 2, kursi roda 4 no apoia hahan. Labele deit kolen atu fo tulun ba ema ne'ebe prezisa ita nia tulun, labele para no labele haluhan hodi koko fó tulun bainhira ita koko fo tulun grasa sei mai hela deit.

Iha ha'u nia kotuk, iha ita nia maluk timoroan barak iha rai-liur no rai-laran, fo agradese tebes ba sira nia kolaborasaun, ita mesak timoroan de'it, se imi haree video ka lee notísia ne'e mosu iha

www.sapnewstl.com, tiktok, Facebook, youtube, iha plataforma online karik husi programa ida ne'e atu labele haluhan fo tulun, la prezisa atu fo kedas material hanesan osan, prezisa imi nia apoiu liu husi liafuan, apoiu husi share notisia, laiha kbit atu ajuda bele fahe tutan video, balun hakarak ajuda bele kontaktu direita atu ita fo kontribuisaun.

Ajuda ne'e bele osan, material, roupa, kursi roda ba ema ho defisiénsia, material hari'i uma nian kualker sasan ne'ebe senti karik bele atu fahe, labele hanoin katak montante ne'e kiik liu ne'e lae, ajuda ida ne'e la husu kona-ba nia montante boot ka kiik, ezemplu udan ne'ebe kiik mai tau iha mota ne'ebé kikoan, hamutuk ho Mota ne'ebe boot sei sai boot liu, entaun ki'ik no boot, ita hamutuk maka sai boot liután.

Uma ne'ebe furak hari'i husi rai nehek ne'ebe kik oan deit hamutuk maka sai uma ne'ebe boot no furak. Asaun ne'ebe maka ita konstrui hanesan domin hosi ita timoroan ba malu liu husi buat ne'ebe simples no ki'ik, ita la halo milagre, so Maromak maka bele hatene no halo buat hotu, ita halo buat ne'ebe simples, hamutuk atu metin liután to'o mundu nia rohan .

7. Saida mak governu presiza halo ba ema ki'ik no ki'ak sira ?

Januario : Parte governu la prezisa husu atu se mak bele ajuda, dala barak tau iha

pagina sira atu ministériu relevante atu anota katak los duni ita nia ema sira hetan ajuda, prezisa tun para atu tuir ha'u nia ain fatin no tulun direitamente maibe dala barak la akontese hanesan ne'e, buat ne'ebe hakarak tebes atu halo ho fuan no laran. Ministeriu relevante sira ida ne'e misaun importante, favor ida la'o tuir atu halo tanba comunidade sira prezisa ita nia tulun.

8. Mensajem ida ba timoroan sira ?

Januario : Ba maluk sira ne'ebe maka senti terus no susar laiha esperansa no lakon esperansa, labele tauk tanba buat hotu iha nia tempu, ita iha tempu susar, Maromak sempre hamutuk ho ita atu fo felisidade, susar ne'e badak, ita fiar katak loron mai kalan ba, entaun signifika katak susar mos mai, felisidade mos sei mai tanba buat hotu iha nia tempu.

Wainhira ksolok mai ona, ita tenki kaer metin tanba dala ruma moris hanesan roda, nia sei putar ba mai, ita tenke pasiénsia, orasaun no fiar katak buat ruma sei akontese tuir nia tempu. Ami ekipa hamutuk ema nain haat, ida maka ha'u rasik, kondutor lori karreta, videografer ne'ebe halo video, no ida ajuda lori sasan, ha'u bolu ekipa maibe misaun ne'e ita hotu nian nu'udar timoroan, ami hotu sei kontinua ba nafatin, mai ita hamutuk tulun ita nia maluk sira, ita kiak servi kiak.

“Ha'u mesak forsa lá to'o, ita hakarak kobre ema hotu iha teritóriu nasional, ita nia hakarak maka ne'e, laiha Timoroan ida iha rai ida ne'e atu sente hamlaha, sira tenke bosu no sente”.




“Bainhira ita ko'alia, liafuan ne'e anin ne'ebe semo, maibe wainhira ita hakerek, liafuan ne'ebe ne'e hela nafatin, tempu bele muda, espasu bele la hanesan, kondisaun bele diferente maibe hakerek ne'e mantein ba nafatin”.

KAPÍTULU V

5. Lia Agradesimentu & Maktakan

5.1 Agradesimentu IX Governu |Konstituisional Ba Orgaun Komunikasaun Sosial



A
T
U

I
M
I
N
I
A

F
I
A
R

S
A
I

K
U
L
T
U
R
A

5.2 Primeiru Ministru Kayrala Xanana Gusmão Sertifika Mídia SAPNewsTL



5.3 Agradesimentu

Revista ida ne'e nu'udar produktu jornalístiku ida ne'ebé hakerek no elabora hosi Mídia SAPNews. Nune'e hakarak hatu'o agradesimentu ba parte hotu-hotu mak kontribui tantu direta no indireta.

1. Agradese wa'in ba Na'i Maromak omnipotente, omnipresenza no omnisiénsia ho ninia grasa ne'ebé boot tebe-tebes hodi permite ninia bibi-atan mai vizita no fo bensaun ba sarani sira, fo kbit mai ami hodi halo kobertura no elabora revista ho susesu.
2. Agradese wa'in ba Sua Santidade Papa Francisco, maske ho idade ne'ebé avansadu ona maibé iha boa vontade hodi vizita sarani Timor-Leste.
3. Agradese wa'in ba Estado Timor-Leste no Governu Konstituisional Dasia ne'ebé ho esforsu an hodi halo preparasaun no simu vizita Sua Santidade Papa Francisco husi preparasaun to'o vizitasaun.
4. Agradese wa'in ba Bispu sira iha Konferénsia Episkopal Timorense (CET sigla portugues) ne'ebé serbisu hamutuk ho governu Timor-Leste no Santa Sé hodi halo preparasaun to'o remata simu vizita Sua Santidade Papa Francisco nian.
5. Agradese wa'in ba Jornalista sira hotu ne'ebé hamahan an iha mídia SAPNews ne'ebé dedika an tomak ba kobertura vizita Papa Francisco iha Timor-Leste.
6. Agradese wa'in no parabens ba povu doben Timor-Leste ne'ebé maduru tebes hodi simu vizita Papa Francisco.
7. Agradese boot ba operador telekomunikasaun Telkomcel ne'ebe apoia finanseiru ba produsaun revista ne'ebé hakerek hosi Mídia SAPNewsTL.

Ami sente gratidaun no agradese wa'in tebes ba parte hotu ne'ebé la temi ida-idak, mais ho imi hotu ninia orasaun ami bele susesa elabora revista ida ho remata.

Ikus liu, molok atu haksumik an iha ita nia futar matan, karik liafuan balu la apar ho ita ninia sentimentu nu'udar ema maksalak, ami ho hakraik an husu deskulpa no obrigadu barak ba ita boot sira.



5.4 Lia Maktakan

Revista ne'e elabora husi ekipa editorial Mídia SAPNewsTL, objetivu husi hakerek revista ne'e hodi asegura, prezerva, memoriza no haklaken istória vizita Papa Francisco ne'ebe úniku, diferente, ineskesível maka Timor-Leste marka iha istória igreja katólíka mundial, hafoin restaura ninia ukun rasik an.

Revista murak ne'e deskreve mensajem importante sira husi Santu Padre Papa Francisco, Presidente República José Ramos Horta, Primeiru Ministru Kayrala Xanana Gusmão, Presidente CET Dom Norberto do Amaral, Bispu Virgílio Cardeal do Carmo da Silva SDB, padre, madre, katekista, sarani sira no entidade oioin kona ba vizita Sua Santidade iha Timor-Leste. Esperansa boot ida ba leitor sira hotu bele hatene liután sentidu hosi vizita istóriu ne'e.

Istória ne'e ita hakerek, ita rai no ita conserva iha livru ne'e nu'udar lisaun no mata dalan ida ba jerasaun foun sira hodi konta tuir husi jerasaun ba jerasaun no konkretiza inspirasaun save sira iha kontekstu konstrusaun estadu direitu no demokrátiku.

Apresia tebes ba ekipa elaborador ne'ebe lidera husi Presidente SAPNewsTL Clementino Bragança Machado no Diretor Sergio Alves da Costa “Delekuar” hamutuk ho Xefe Redasaun Ermelinda Soares, Jornalista Marcela Mery da Costa, Conzita da Silva Mota Santos, Luis dos Santos Pailofo, Dircia Baptista Belo, Marciana da Conceição, Daniel da Silva, no Guilhermino Ramos da Cruz ne'ebe halo esforsu husi inisiu to'o finaliza revista ho susesu.

Liafuan save ne'ebe mosu durante elaborasaun revista maka, “Ha'u nia lapizeira sei la maran, wainhira ha'u nia iis sei iha, ha'u nia livru sei la taka, wainhira matan ne'e sei loke. bainhira ita ko'alia, liafuan ne'e anin ne'ebe semo, maibe wainhira ita hakerek, liafuan ne'e hela nafatin, tempu bele muda, espasu bele la hanesan, kondisaun bele diferente maibe hakerek ne'e mantein ba nafatin”. Obrigadu barak ba hakerek na'in sira hotu, agradese ba lee na'in sira, agradese rohan laek ba Santu Padre Papa Francisco, lalehan sadia no rai sei tane.



5.5 Bibliografia

1. <https://www.sapnewstl.com>
2. <https://www.vaticannews.va>
3. <https://www.facebook.com/SAPNewsTL>
4. <https://www.facebook.com/VaticanNews>
5. <https://www.facebook.com/Xananabaemahotu>
6. Homili Lengkap Paus Fransiskus dalam Misa Suci di Papua Nugini – KATOLIKANA
<https://www.katolikana.com/2024/09/11/homili-lengkap-paus-fransiskus-dalam-misa-suci-di-papua-nugini/>
7. Homili Lengkap Paus Fransiskus dalam Misa Suci di Singapura – KATOLIKANA
<https://www.katolikana.com/2024/09/14/homili-lengkap-paus-fransiskus-dalam-misa-suci-di-singapura/>
8. Isi Homili Lengkap Paus Fransiskus di Misa Akbar GBK dalam Bahasa Indonesia - Global Liputan6.com <https://www.liputan6.com/global/read/5694417/isi-homili-lengkap-paus-fransiskus-di-misa-akbar-gbk-dalam-bahasa-indonesia>



“QUE A VOSSA FÉ, SEJA A VOSSA CULTURA / ATU IMI NIA FIAR SAI IMI NIA KULTURA”



»Revista Visita Papa Francisco Iha Indonésia, PNG, Singapura & Timor-Leste «

A
T
U

I
M
I
N
I
A

F
I
A
R

S
A
I

K
U
L
T
U
R
A